

DIDZA' DXI'A BUZÚAJË' LUCAS

Didza' rigu'ë Lucas lu në'ë Teófilo

¹ Zián nupa chigulún bayudxi ulu'zúaj lu guichi idútë le nácatë, le guca ga zóaru', ² ca na' bila'lé'e nupa ni' dza ni'te, ate' bulu'luí'i rë'u, en bulu'zé didza' que. ³ Teófilo, bönni' tsáhui'do', runi neda' naca dxi'a uzúaja' quiu' lu guichi, ga ze lo dzö' yúgu'të lë ni, tu' chibuguílaj bubéquia' ga ze lo dzö' ca naca yúgu'të lë na' guca dza ni'te. ⁴ Ruzúaja' quiu' lu guichi ni para inózinu' naca idútë li lë na' chinazëdu'.

*Rulu'inë' gubáz lá'ayi queë' Dios ca si' gálajbi'
Juan, bönni' uquilë' bönachi nisa*

⁵ Dza ni'te cate' gunná bë'ë Herodes luyú Judea, ni' zoë' tu bixúz lë' Zacarías. Nabábalenë' cö' bixúz, nazí'i le Cö' Queë' Abías. Elisabet, nigula queë' Zacarías na' nácanu ca' zxí'ini xi'sóë' Aarón, bönni' gúquië' bixúz lo dza ni'te. ⁶ Nácagaquië' Zacarías, en Elisabet tsahui' lahuë' Dios, ate' idú ladxí'gaquië' tunë' ca rnna xtídzë'ë Dios, en le rinná bë' xibá queë'. Caní guca, cuntu nu guca bi innë quégaquië'. ⁷ Cuntu nu zoa bi'i quégaquië', tu' nácanu Elisabet nigula huödx, ate' chinagúlaguquië' irópatë'.

⁸ Guca beo' gul-la' uláz que cö' na' nabábalenë' Zacarías ilunë' dxin lahuë' Dios, lu yöl-la' bixúz quégaquië'. ⁹ Ca naca le nulaga lógaquië' tunë' bixúz, gul-la' uláz queë' Zacarías guyázië' lu lataj lá'ayi que yudo' para uzégui'ë yalaj lahuë' Xanru' Dios. ¹⁰ Tsanni ni' ruzégui'ë Zacarías na' yalaj,

gula'cuá' yúgu'të bönachi ní'ilö, tu'lidza Dios. **11** La' ná'asö bului'i lahuë' gubáz lá'ayi queë' Xanru' ga zoë' Zácarías na'. Zuínë' gubáz na' tsölä'a ibëla bucugu lá'ayi ga na' régui yalaj. **12** Cate' bilé'enë' Zácarías gubáz lá'ayi na', gurö'ë böniga, en gudxi bidzöbinë'. **13** Ní'irö gubáz lá'ayi na' gudxë' lë', gunnë':

—Zácarías, biti' gádxinu', tu' chibiyönnë' Dios le rinabu' lahuë', ate' Elisabet, nigula quiu', uzóanubi' tubi' bi'i bönni'do', ate' gu'u labi' Juan. **14** Gata' quiu' le uzi'u xibé, en udzéjanu', ate' zián nupa ulu'dzeja ládxigaca cate' gálajbi' bñido' na', **15** tu' gácatëbi' zxön lahuë' Dios. Biti' gui'ajbi' xisi uva, en calëga tu le rusudxi bönachi, ate' sóalenë'-bi' Dios Bö' Lá'ayi cate' isí lo si' gálajbi'. **16** Gunë' Juan ni ga ulu'huöáca zián bönachi Israel queë' Xanru'. **17** Inöruë' lë' ca Xanru', ate' ila'cuá'alen lë' Bö' na', en yöl-la' huáca na' gula'cuá'alen Elías, bönni' bë'ë didza' uláz queë' Dios dza ni'te. Caní gunë' para únë' tuz nupa nácagaca xuz len zxí'inigaquië', en uzéajni'inë' nupa ta'dá'baga' para ilácagaca tsahui', en ucözë' bönachi para ila'zí' lu né'eguequi Xanru'.

18 Zácarías gunábinë' gubáz lá'ayi na', rnnë':

—¿Bizxi gaca bë' para inözda' ilaca lë ni? Chinagúla' neda', en chinagúlanu ca' nigula quia'.

19 Bubi'ë didza' gubáz lá'ayi na', rnnë':

—Neda' lea' Gabriel. Runa' dxin lahuë' Dios. Lë cazë' gusöl-lë'ë neda' para gü'ilena' li' didza', en usiyönda' li' didza' dxi'a ni. **20** Na'a, tu' cabí guyéajlë'u xtídz'a'a, icödzu', en bíti'rö gaca innó' cate' gácarö lë ni. Yúgu'të lë ni udxín cate' idxín dza que.

21 Tsanni ni' raca lë ni, nacuá' böñachi ní'ilö, ta'böza Zacarías, ate' tu'bani tu' ridzenë' xidzé ga na' zoë' lu lataj lá'ayi. **22** Cate' burúajë' Zacarías, biti' guca güí'ilenë' légaquië' didza', ate' guléquibe'enë' bilé'enë' tu le bulu'i'inë' Dios lë' lu lataj lá'ayi. Bulá'a bulu'i'së' Zacarías, buzéajni'inë' légaquië', tu' cabí raca innë'.

23 Cate' bizá'a yugu' dza na' ral-la' gunë' dxin Zacarías lahuë' Dios, ní'irö bőajë' lidxe'. **24** Gudödi yugu' dza na' Elisabet, nigula queë' Zacarías na', biá'anu-bi' lë'ënu bí'ido', ate' idú gayu' beo' bugá'anasinu ga zoa lídxigaquië'. Guzá' ladxí'nu, rnnanu: **25** "Caní runë' Xanru' quia'. Ruzá' ladxë'ë quia' bí'ido', en runë' ga bí'ti'rö utu'iida' lógaca böñachi."

Riguíxjö'ë gubáz lá'ayi ca si' gálajbi' Jesús

26 Cate' chiguca xopa beo', bulu'i lahuë' gubáz lá'ayi na', tu' gusöl-lë'ë Dios lë cazë' Gabriel, tsejë' Nazaret, tu yödzö luyú Galilea. **27** Dios gusöl-lë'ë lë' ni' tsöjyúë'-bi' tubi' bi'i nigula ra'bando' lëbi' María. Chinazí' lu ná'abi' María utsaga ná'alenbi'-në' bönni' lë' José. Nababë' José di'a dza queë' David, bönni' gunná bé'enë' böñachi Israel dza ni'te. **28** Cate' guyázië' Gabriel na' ga zóabi' María, gudxe'-bi':

—Padiux. Dios ruzá' ladxë'ë quiu'. Xanru' Dios zóalenë' li'. Lë cazë' benë' ga nácaru' li' bica' ba ca yúgu'të nigula.

29 Cate' bilé'ebi' María gubáz lá'ayi na', gurö'öbi' böñiga tu' nözi didza' na' bë'ë, en rubani ladxí'bi' nacxi sa'yéaj didza' na' bulidzë'-bi' gubáz lá'ayi na'. **30** Ní'irö gubáz lá'ayi na' gudxe'-bi', rnnë':

—María, biti' gádxinu', tu' chibidéli'nu' le ruzá' ládxë'ë Dios quiu'. ³¹ Na'a, tsú'ubi' tubi' bí'ido' lë'u, ate' uzú'-bi' tubi' bí'i bönni'do', ate' gu'u labi' Jesús. ³² Jesús ni tsépisétérë', en si' Lë' Zxí'inë' Dios, Nu nayépisétérö. Xanru' Dios gunë' ga inná bë'ë ca na' gunná bë'ë David, xuz gula gudödi queë'. ³³ Jesús na' inná bë'ëtica'sinë' bönnachi Israel, ate' le inná bë'ë Lë' catu caz tödi que.

³⁴ Ní'irö María gunábibi' gubáz lá'ayi na', rnnabi':

—¿Nacxi caz gaca lë ni, tu' cabí zóalena' bönni'?

³⁵ Bubi'ë didza' gubáz lá'ayi na', rë'ë-bi':

—Guidë' Dios Bö' Lá'ayi ga zu', ate' yöl-la' huáca queë' Dios, Nu nayépisétérö, sóalen li', le gaca ca tu zxul-la rigú'u böaj ga zu'. Que lë ni na' bí'i bönni'do' na' ral-la' gálajbi', tsú'ubi' lu në'ë Dios, ate' si' labi' Zxí'inë' Dios. ³⁶ Cá'anqueze Elisa-bet, nigula dí'a dza quiu', chinuá'anu-bi' lë'ënu tubi' bí'i bönni'do' sal-la' chinagúlanu. Gula'nnë' queënu: "Nácanu nigula huödx", pero chizéaj xopa beo' nuá'anu-bi' lë'ënu bí'ido' na'. ³⁷ Biti' bi zoa le cabí séqui'në' Dios.

³⁸ Ní'irö María gunabi':

—Ni zoa'. Tsaz naca' huen dxin queë' Xanru'. Gaca quia' ca na' chigunnó'.

Ní'irö la' buza'të' gubáz lá'ayi na' ga zóabi' María.

María söjyubi'-nu Elisabet

³⁹ La' dza ní'isö guyú'ubi' nöza María, ate' carelö sa'yéajbi' ga naca guí'ado', en bidxinbi' tu yödzö luyú Judea. ⁴⁰ Ni' guyázabi' lidxë' Zacarías, en gúdxibi'-nu Elisabet:

—Padiux.

41 Cate' biyöninu Elisabet didza' na' bë'ëbi' María, la' butatë cuinbi' bi'i huë'ënido' na' yú'ubi' lë'ënu, ate' bidisóalenë'-nu Dios Bö' Lá'ayi. **42** Ní'irö bë'ënu Elizabet zidzaj didza', rnnanu:

—¡Chinunë' Dios ga nácaru' li' bica' ba ca yúgu'të nigula, en chinunë' ca' ga nácabi' bica' ba bï'ido' na' yú'ubi' lë'u! **43** ¿Núzxítë neda', zá'anu xiné'ë Xana' quia'? **44** Cate' biyönda' didza' bë'u, bulidzu' neda', lu yöl-la' rudzeja queëbi' la' butatë cuinbi' bi'i huë'ënido' ni yú'ubi' lë'a. **45** ¡Bica' ba li' tu' guyéajlë'u xtídzë'ë gubáz lá'ayi, ate' udxín caz lë na' gudxë' li' uláz queë' Xanru'!

46 Ní'irö gunabi' María:
 ¡Idútë le naca' rigú'u Xanru' yöl-la' ba,
47 en rudzeja ládxi'lena'-në' Dios, Nu rusólá neda'!
48 ¡Dios caz buzá' ládxë'ë quia' neda'!
 Yu'a lu në'ë, en tsaz naca' huen dxin queë'.
 Na'a isí lo, ca naca quia' ila'nná:
 Bica' ba nigula na'.

49 ¡Zxöntérö naca le benë' Dios unná bë' quia'!
 ¡Lá'ayi naca Lë'!

50 Lë' ruhuéchi' ládxi'tica'së' böñachi tadxi Lë'
 na'a dza, en dza zá'gaca.

51 Yugu' yöl-la' huáca zxön chibenë' Lë'.
 Buzötjë' nupa gulún zxön yöl-la' réajni'i quéguequi.
52 Bugúë' yöl-la' unná bë' quégaca nupa gulaca lo,
 en benë' ga gulaca lo nupa gulaca nöoxaj ladxi'.
53 Benë' ga bulu'huölaj bulu'dzë'e nupa gula'dún,
 en bucá'anë' cá'asö nupa bila'lé'e yöl-la' tsahui'.
54 Gúcalenë' böñachi Israel, nupa na' tun xichinë',
 tu' yöjenenë' légaquië', en buéchi' ládxë'ë légaquië'.

⁵⁵ Benë' ca guzxí' lu në'ë gunë' quégaquië' xuz xtó'oru'
enca' queë' Abraham, en quégaca di'a dza queë'.

⁵⁶ María bugá'analenbi'-nu Elisabet idú ca tsonna beo', ate' gudödi ni' bőajbi' lídxibi'.

Le guca cate' gúlajbe' Juan, bönni' uquile' böñachi nisa

⁵⁷ Cate' bidxín dza ral-la' sóabi' bí'ido' queënu Elisabet, buzóanu-bi' tubi' bi'i bönni'do'.

⁵⁸ Bila'yöni dzaga yu'u queënu, en yugu' di'a dza queënu ca na' guca, buéchi' ládxë'ë-nu Dios, ate' bulu'dzéjalen lënu. ⁵⁹ Cate' chiguca xunu' dza zóabi' bí'ido' na', bila'dxinë' di'a dza queënu para ila'chúguië' lu xipéla'bi' bi'i bönni'do' na' lë na' gaca bë' néquibi' queë' Dios, ate' té'ennë' ilu'ë labi' Zacarías ca na' lë' xúzibi'. ⁶⁰ Ní'irö bubí'nu didza' Elisabet, xiná'abi', rnnanu:

—Calëga. Juan si' labi'.

⁶¹ Gula'nábinë'-nu, ta'nnë':

—¿Bizx que? Cuntu nu di'a dza quiu' lë' Juan.

⁶² Ní'irö bulu'lá' bulu'lufisinë', gula'nábinë' xúzibi' nacxi rë'ënë' gu'ë labi'. ⁶³ Zacarías na' gunabë' tu blágado', ate' buzúajë' lahui caní: Juan lëbi'. Bulu'báninë' yúgu'të'. ⁶⁴ La' ní'isö böáljatë ru'ë Zacarías na', en buguítjatë lúdxë'ë, ate' bë'ë didza' le gulu'ë Dios yöl-la' ba. ⁶⁵ Ní'irö guládxinë', en bulu'báninë' yúgu'të dzaga yu'u quégaquië', ate' yúgu'të yödzödo' nacuá' lu gui'ado' luyú Judea, guzë didza' ca guca lë ni. ⁶⁶ Gula'zá' ládxigaca yúgu'të nupa bila'yöni ca na' guca, ta'nná: “¿Nacxi caz gácabi' bi'i bönni'do' ni? Le nácatë Xanru' zóalenë'-bi'.”

Didza' bë'ë Zacarías uláz queë' Dios

67 Ní'irö Dios Bö' Lá'ayi bidisóalenë' Zacarías, xúzibi' Juan, ate' bë'ë didza' uláz queë' Dios, rnnë':

68 ¡Yöl-la' ba Dios, Xángaca böñachi Israel tu' buduyuë' rë'u, böñachi queë', en böá'uë' rë'u!

69 ¡Gusöl-lë'ë queëru' Bönni' usölë' rë'u, len yöl-la' huáca zxön queë'!

Bönni' ni guljë' ládajgaca dí'a dza queë' David, huen dxin queë' Dios.

70 ¡Dza ni'te guzxi' lu në'ë gunë' ga gaca caní! Raca ca na' gunnë' lu ruá'agaquië' bönni' gulu'ë didza' uláz queë'.

71 Guzxi' lu në'ë usölë' rë'u lu ná'agaca nupa tequi rë'u zi', enca' lu ná'agaca nupa biti' ta'lé'e rë'u dxi'a.

72 Guzxi' lu në'ë huéchi' ládxë'ë xuz gudödi queëru', en tsöjenenë' le guzxi' lu në'ë le naca lá'ayi.

73 Lë ni benë' tsutsu xtídzë'ë, en guzxi' lu në'ë, le gunë' queë' Abraham, xuz gudödi queëru', le naca tu le ral-la' gunë' queëru' rë'u.

74 Guzxi' lu në'ë usölë' rë'u lu ná'agaca nupa biti' ta'lé'e rë'u dxi'a para cabirö gádxiru' gunru' xichinë' Lë',

75 en para gácaru' ba'a ladxi', en idú dxi'a lahuë' Lë' yúgu'të dza sóaru' ibanru'.

76 Li', zxi'ina'do', si' lo' bönni' ru'ë didza' uláz queë' Dios unná bë'

tu' tsöjnöru' ca Xanru' caz, en upó'o nøza ga tödë'.

77 Gunu'ga ila'nözi böñachi queë' ca gaca ulu'lágaca, en ca na' uniti lahuë' Dios dul-la' nabága'gaca.

78 Caní gaca, tu' ruhuéchi'da' ládxë'ë Dios rë'u, en runë' ga tsení' queëru' Bönni' na' náquië' bení' idú.

⁷⁹ Lë' uzení'ë quégaca nupa nacuá' gapa naca chul-la,
en gapa nacuá' nupa chizóa ilátigaca
para ugú'ë rë'u näza ga cö'ö dxi ládxi'do'oru'.

⁸⁰ Guzxönbí' bi'i bönni'do' na', en bidipa ládxi'bi'.
Guzóasibi' gapa naca lu lataj cá'asö cate' bidxinrö
dza bului'i lobi' lógaca bönnachi Israel.

2

Le guca cate' gúlajbi' Jesús (Mt. 1:18-25)

¹ Lu dza na' gunná bë'ë Augusto César, bönni' Roma, ila'yaza lu guichi yúgu'të bönnachi nacuá' yödzölió. ² Cate' gusí lo ta'yaza lu guichi caní, rinná bë'ë bönni' lë' Cirenio luyú Siria. ³ Yúgu'të bönnachi yójaca yödzö que queéguequi ga na' zeaj nababa para ila'yaza lu guichi. ⁴ Guzé'ë José yödzö Nazaret luyú Galilea, sa'yéajë' luyú Judea, en bidxinë' yödzö Belén, ga ni' guljë' David, tu' guljë' José ládajgaca dí'a dza queë' David na'. ⁵ Guyijë' José ni' para tsázië' lu guichi, ate' dzágabi'-në' María, bi'i nigula nazi' lu ná'abi' utsaga ná'alenbi' lë', en chizóa sóabi' bí'ido' queëbi'. ⁶ Cate' ni' nacu'ë lu yödzö Belén, bidxín dza sóabi' bí'ido' queëbi'. ⁷ Buzóanu-bí' tubi' bi'i bönni'do', bi'i huáca queénu. Buchölinu-bí' yugu' lári'do', ate' gudíxjanu-bí' tu lu yú'udo' ga tun chi'i le táguba' böa' quégaca bönnachi yú'ugaca näza. Caní guca, tu' cabí bidzöli lataj ila'cu'ë lu yu'u ga ni' ta'dxín bönnachi yú'ugaca näza.

*Tu'lui'i lahuë' gubáz lá'ayi queë' Dios ga nacu'ë
bönni' tu'yúë'-ba' bö'cu' zxila'*

8 Gala' ra' yödzö Belén nacu'ë bönni' tu'yúgaquië'-ba' bö'cu' zxila' la' guixi', tapa chíigaquië'-ba' chi'i dzö'ölö. **9** La' buluítë lahuë' gubáz lá'ayi queë' Xanru' ga na' nacu'ë. Yöl-la' bení' queë' Xanru' buzení' ga na' nacu'ë, ate' guládxinë'. **10** Níirö gubáz lá'ayi na' gudxë' légaquië', rnnë':

—Biti' gádxili'. Na'a rusiyönda' libí'ili' didza' le gun ga udzéjade'eli', le ulu'zí' ca' xibé yúgu'të bönachi. **11** Na'a chigúlajbi' lu ladzë' David Nu usólá libí'ili'. Nu ni naca Cristo, Xanru'. **12** Lë ni gaca bë'ëbi'. Udzölbili'-bi' Bí'ido' na', narölibi' yugu' lári'do', en dëbi' tu lu yú'udo' ga tun chi'i le táguba' böa' quégaca bönachi yú'ugaca nöza.

13 Ga na' zoë' gubáz lá'ayi na', tsálido'os bulu'lui'i lógaquië' ziánrö ca' gubáz lá'ayi queë' Dios, narúajgaquië' yehua' yubá, en ta'gu'ë Dios yölla' ba, ta'nnë':

14 ¡Yöl-la' ba Dios zoë' xitsá',
ate' luyú gaca le cuéqui dxi ládxí'do'gaquië'
bönni' raza ládxë'ë Dios légaquië'!

15 Cate' bulu'zë'ë gubáz lá'ayi na' ga ni' nacu'ë, söjhuöjgaquië' yehua' yubá, níirö gulé luzë'ë tuë' ia'túë' bönni' uyú bö'cu' zxila' na', ta'nnë':

—Uyéajtsöca'ru' Belén para ilé'eru' lë ni chiguca ca na' chibusiyönnë' Xanru' rë'u.

16 La' yöjácatië', ate' yöjxáca'gaquië' María len José, enca' bí'ido' na', dëbi' tu lu yú'udo' ga tun chi'i le táguba' böa' quégaca bönachi yú'ugaca nöza. **17** Cate' bila'lé'enë' lëbi', gula'guíxjö'ë lë na' si' busiyönnë' gubáz lá'ayi na' légaquië' ca naca queëbi' bí'ido' na'. **18** Bulu'bani yúgu'të nupa bila'yöni didza' gulu'ë bönni' tu'yúë' bö'cu' zxila'

na'. ¹⁹ María gulú'usö icja náganu didza' ni, ate' guzá' ládxí'nu ca naca que. ²⁰ Söjhuōjgaquië bönni' na' tu'yúé'-ba' bö'cu' zxila', tuné' zxön Dios, en ta'gu'ë Lë' yöl-la' ba ni'a que yúgu'të lë na' bila'yönnë', en bila'lé'enë', le guca ca na' busiyönnë' gubáz lá'ayi na' légaquië'.

Ta'gu'ë-bi' bí'ido' Jesús lu në'ë Dios

²¹ Cate' chiguca xunu' dza zóabi' bí'ido' na', gula'chúguië' lu xipëla'bi' lë na' naca bë' néquibi' queë' Dios, ate' gulu'ë labi' Jesús ca na' chibë' cazë' labi' gubáz lá'ayi na' zí'alö cate' si' tsú'ubi' lë'ënu xiná'abi'.

²² Cate' chibizá'a dza que le tu'pá'a cuíngacanu nigula ca rinná bë' xibá queë' Moisés, gula'chë'ë-bi' bí'ido' Jesús yödzö Jerusalén para ila'gu'ë-bi' lu në'ë Xanru' Dios. ²³ Caní gulunë', tu' nazúaj lu guichi lu xibá queë' Xanru' le rnna: "Yúgu'tëbi' bi'i bónni'do' nácagacabí' bi'i zí'alö queénu xiná'agacabí', ulu'béajë'-bi' quez queë' Xanru' Dios." ²⁴ Que lë ni na' yójáquië' ni' para ilútië'-ba', en ila'gú'ë-ba' lahuë' Dios chónpaba' gúgudo' o chónpaba' budödu' ca na' rinná bë' xibá queë' Xanru' Dios.

²⁵ Dza ní'isö zoë' tu bönni' lë' Simeón lu yödzö Jerusalén. Bönni' ni náquië' tsahui', en reaj ládxë'ë Dios. Ribözë' Bönni' na' isöl-lë'ë Dios, Bönni' na' gácalenë' bönachi Israel. Dios Bö' Lá'ayi zóalenë' Simeón na', ²⁶ en chibuluí'inë' lë' biti' gátië' cate' ilé'erönë' Cristo, Bönni' na' isöl-lë'ë Xanru' Dios. ²⁷ Bidxinë' Simeón na' chila yudo' tu' guchë'ë Dios Bö' Lá'ayi lë' ni'. Cate' xuz xiná'abi' gula'chë'ë-bi' bí'ido' Jesús chila yudo' para ilunë' queëbi' ca

rinná bë' xibá na', ²⁸ ní'irö bunidë'-bi' Simeón na', en guyéaj ládxë'ë Dios, rnnë':

²⁹ Xana', na'a huáca gunnu' neda' lataj gátia', soa dxi ládx'a'a tu' chiguca le gudxu' neda', huen dxin quiu'.

³⁰ Chibilé'eda' Nu na' buzóa cazu', Nu usólá böñachi,

³¹ Nu na' ulú'u lahui lógaca yúgu'të böñachi.

³² Lëbi' nácabi' bení' le uzení' böñachi izá'a, en nácabi' ca' bení' quégaca böñachi Israel quiu'.

³³ Bulu'báninë' José, en María, xiná'abi' bí'ido' Jesús, ca naca lë na' gunnë' Simeón ca naca queëbi' Jesús. ³⁴ Simeón na' gunábinë' Dios gunë' ga gaca dxi'a quégäquië', ate' gudxë'-nu María, xiná'abi' Jesús, rnnë':

—Buyútsöca'. Bi'i ni nuzóë'-bi' Dios para gunbi' ga ila'chixi böñachi zián, ate' ulu'huöásä böñachi zián ladaj böñachi Israel. Gácabi' tu le naca bë', ate' ila'nnë böñachi queëbi'. ³⁵ Gaca caní para ila'lá' lahui le ta'zá' ládx'i'gaca böñachi zián. Yugu' lë ni ilaca quiu' ca tu guíë tuchi' le tsaza ládx'i'do'o.

³⁶ Ana, nigula ruí'inu didza' uláz queë' Dios, zóanu ca'ni'. Nácanu zxí'inë' Fanuel, bönni' nababë' dí'a dza queë' Aser. Chinagúlada'anu Ana na', tu' guzóalennu bönni' queënu idú gadxi iz gudödi gúcanu ra'bando', ³⁷ ate' bugá'ananu tuzi cate' bidxitë dza chiyú'unu idú ca tápalalaj yu' tapa iz. Biti' ca' rubí'i ruzá'anu ga naca chila yudo'. Rëla, en te dza reaj ládx'i'nu-në' Dios, runnu gubasa, en rulídzanu-në' Dios. ³⁸ La' ná'asö bidxitënu ni', rënu-në' Dios: "Xclenu'." Gudíxjöi'nu yúgu'të böñachi ca naca queëbi' bí'ido' Jesús, böñachi na'

nacuá' Jerusalén, nupa ta'böza dza idxín Nu na' isöl-lë'ë Dios para gácalen bönachi.

Söjhuōjgaquië' José, en María yödzö Nazaret

³⁹ Gudödi gulunë' José, en María yúgu'të le rinná bë' xibá queë' Xanru' Dios, yöjhuōjgaquië' ládzagaquië' Nazaret luyú Galilea. ⁴⁰ Guzxönbí' bí'ido' Jesús, en bidipa ládxí'bi'. Guta' queëbi' yöl-la' réajni'i, ate' zxön naca le ruzá' ládxë'ë queëbi' Dios.

Rudxinbi' bí'ido' Jesús chila yudo'

⁴¹ Yugu' iz röjáquië' xuz xiná'abi' Jesús Jerusalén cate' raca Laní Pascua, laní tu'subanë' bönni' judío ca benë' Dios, bubéajë' xuz xtó'ogaquië' luyú Egipto. ⁴² Cate' chiyú'ubi' chinnu iz bi'i Jesús, yöjáquië' Jerusalén ca tun cazë' cate' raca laní na'. ⁴³ Cate' gudödi laní, söjhuōjgaquië', ate' bugá'anabi' bí'ido' Jesús Jerusalén, pero biti' téquibe'enë' José, en María, xiná'abi' Jesús. ⁴⁴ Tu' téquinë' nútsa'bi' ladaj bönachi zián yú'ulengaca légaquië' nöza, tu dza nayá' gula'zé'ë. Ní'irö cate' bulu'guiljë'-bi' gapa nacuá' di'a dza quégaquië', en gapa nacuá' nupa núnbë'gaquië' ⁴⁵ biti' bulu'dzölinë'-bi'. Que lë ni na' yöjhuōjgaquië' Jerusalén, söjdíljagaquië'-bi'.

⁴⁶ Cate' chiguca dza bunni, bulu'dzölinë'-bi' ga naca chila yudo', rö'öbi' gatsaj láhui'lë' bönni' yudo' tu'sédinë'. Ruzé nágabi' didza' tu'ë, en rinaba yúdxibi' légaquië'. ⁴⁷ Bulu'bani yúgu'të nupa bila'yöni didza' bë'ëbi' ca naca yöl-la' réajni'i queëbi', en ca nácagaca didza' bubí'ibi'. ⁴⁸ Cate' bila'lé'enë'-bi' xuz xiná'abi', bulu'báninë', ate' gúdxinu-bi' xiná'abi', rnnnanu:

—Zxi'ina', ¿bizx que benu' caní queétu'?
 Buyútsöca', len yöl-la' ruúbi rugu'i neda', en xuzu'
 buguíljatu' li'.

49 Ní'irö gúdxibi' Jesús légaquië', rnnabi':

—¿Bizz que buguíjali' neda'? ¿Naru' cabí nözili'
 run bayudxi guna' xichinë' Xuza'?

50 Biti' gula'yéajni'inë' xuz xiná'abi' didza' na'
 gúdxibi' légaquië'.

51 Jesúś bőajlenbi' légaquië', budxinbi' Nazaret,
 ate' benbi' ca rnna xtídza'gaquië' xuz xiná'abi'.
 María, xiná'abi' Jesúś, gulú'usönu icja ládzi'do'onu
 yúgu'të lë ni. **52** Ráta'rö yöl-la' réajni'i queébi' bi'i
 Jesúś, en rizxönbí'. Burúajbi' dxi'a lahuë' Dios, en
 lógaca böñachi.

3

*Libán runë' Juan, bönni' ruquile' böñachi nisa
 (Mt. 3:1-12; Mr. 1:1-8; Jn. 1:19-28)*

1 Cate' chiguca chinu iz rinná bë'enë' Tiberio
 César idútë yödzölió, rinná bë'ë Poncio Pilato luyú
 Judea, ate' Herodes rinná bë'ë ca' luyú Galilea. Fe-
 lipe, böchë'ë Herodes na', rinná bë'ë luyú Iturea,
 en luyú Traconite, ate' Lisanias rinná bë'ë luyú
 Abilinia. **2** Yugu' dza na' nácagaquië' bixúz lo
 Anás, en Caifás, ate' la' ná'asö Dios bë'lenë' Juan,
 zxí'inë' Zacarías, didza' cate' ni' zoë' Juan lu lataj
 cá'asö. **3** Ridë' Juan ni yúgu'të lataj nacuá' ra'
 yegu Jordán, runë' libán ca ral-la' ila'dila nisa
 nupa tu'bí'i ládzi'gaca para uniti lahuë' Dios dul-
 la' nabága'gaca. **4** Guca caní ca na' nazúaj lu guichi
 lá'ayi yugu' didza' bë'ë Isaías, bönni' bë'ë didza'
 uláz queë' Dios, rnna:

Riyōn chi'ë bönni' rulidzë' lu lataj cá'asö, rnnë':
 "Buli'pá'a nöza lu icja ládxido'oli' para idxín Xanru'
 queëli'.

Buli'béaj li yugu' nöza lasi ga tödë'.

⁵ Ral-la' ulígaca yúgu'të gapa naca röga',
 en ulu'huöáca lachi' yúgu'të guí'a sibi, en guí'ado'.
 Ral-la' ulu'rúaj li nöza nayecja nabí'igaca,
 ate' ulu'huöáca dxi'a nöza guiój.

⁶ Illa'lé'eni yúgu'të bönachi Bönni' na' isöl-lë'ë Dios,
 Nu usölä bönachi."

⁷ Cate' bila'rúaj bönachi zián para ila'dila nisa lu
 në'ë Juan, lë' gudxë' légaquië':

—Libi'ili', di'a dza quégacaba' bëla sínia'. ¿Zoa
 nu bulu'i libi'ili' ral-la' izxúnnajli' yöl-la' rusiúdxsi
 si' gaca quégaca bönachi? ⁸ Na'a, guli'gún le ilaca
 bë' chibubi'i ládx'i'li', en biti' sa' ládx'i'li', biti' in-
 nali': "Nácatu' tsahui' tu' nácatu' di'a dza queë'
 Abraham", tu'rea' libi'ili', huáca quélë'ë Dios yugu'
 guiój ni, en gunë' ga ulu'huöáca di'a dza queë'
 Abraham. ⁹ Nácali' ca yugu' yaga. Chizóa riböza
 guíë huága para ichugu yugu' yaga. Yúgu'të yaga
 biti' ta'bía le naca dxi'a, ila'chúguië' yaga na', en
 ila'gu'ë léquequi lu guí'.

¹⁰ Ní'irö bönachi nacuá' ni' gula'nabi lë', ta'nná:
 —¿Nacxi gúntsatu'?

¹¹ Bubi'ë didza' Juan, rë' légaquië':

—Nu dë chopä cö' zxe ral-la' unödzaj que nu biti'
 dë que, ate' nu dë le gagu, lësca' caní ral-la' quasi
 quégaca nupa biti' dë le ilágugaca.

¹² Bal-lë' bönni' tu'quizxjë' lázagaca bönachi uláz
 que yödzö zi'tu'bila'dxinë'ca' ni' para ila'dilë' nisa,
 ate' gula'nábinë' lë', ta'nnë':

—Bönni' usëdi, ¿nacxi gúntsatu' netu'?

13 Juan gudxë' légaquië':
—Biti' uquízxjaröli' tsca le chigunnë' bönni' yú'uli' lu në'ë.

14 Bal-lë' bönni' röjáquië' gudil-la gula'nábinë' ca' lë, ta'nnë':

—¿Nazxi netu', nacxi guntu'?

Juan gudxë' légaquië':

—Bíti'rö gun gádxili' böñachi para cúali' le dë quéguequi. Bíti'rö innëli' quégaca böñachi le cabí nácatë para gunli' ga ila'guizzaj libí'ili', pero guli'tsaza ládxí'lí' tsca rázxjali'.

15 Ta'zá' ládxí'gaca böñachi na' ta'böza Bönni' na' ral-la' isöl-lë'ë Dios, channö náquië' Juan na' Bönni' lë' Cristo. **16** Bubi'ë didza' Juan, gudxë' yúgu'të', rnnë':

—Le nácatë neda' ruquila' libí'ili' nisa, pero zë'ë Bönni' gunë' le rulu'i'sö yöl-la' ridila nisa ni, ichízië' libí'ili' Dios Bö' Lá'ayi, en le naca guí' queë'. Bönni' ni náparë' yöl-la' unná bë' ca neda', ate' neda' biti' naca' lesaca' ilecja' le nudë'ë ni'e. **17** Zönë' lu në'ë böcö' queë', ate' ulubë' ga rilubi zxoa' xtila queë', lë ni rulu'i le gaca quégaca böñachi. Utubë' zxoa' xtila, en cu'ë le xilataj, pero bëbu que uzégui'ë lu guí' le catu caz ulu.

18 Ca nácagaca didza' ni, en ia'zíca'rö zián didza' le guchízië' icja nágagaca böñachi, benë' libán Juan lógaquië' que didza' dxi'a. **19** Juan na' buzégui'ë didza' Herodes, bönni' rinná bë'ë, tu' zóalenë'-nu Herodías, nigula queë' Felipe, bönni' böchë'ë, enca' tu' runë' zián le ruá' dö'. **20** Ní'irö benë' Herodes tu le nácarö huiá' dö', gulu'ë Juan na' lidxi guíë.

*Ridile' Jesús nisa
(Mt. 3:13-17; Mr. 1:9-11)*

²¹ Dza na' cate' cabí nadzunë' Juan lidxi guíë, cate' ni' ruquilë' bönachi nisa, bidilë' ca' Jesús nisa. Cate' ni' rulidzë' Dios, guyalaj lúzxiba, ²² ate' bötzë' Dios Bö' Lá'ayi, bidxinë' ga na' zoë' Jesús. Bului'i lahuë', riné'ë ca riná' tuba' gu'dödo', ate' biyón chi'i Nu rui'i didza' yehua' yubá, rnna:

—Li' nacu' Zxi'ina'. Nadxí'ida' Li', en raza ládxa'a Li'.

*Yugu' xuz xinë'e gudödi queë' Jesús
(Mt. 1:1-17)*

²³ Cate' gusí lahuë' runë' xichinë' Jesús, yu'ë ca chi uruá' iz. Téquiguequi bönachi náquië' zxí'inë' José. Jesús náquië' zxí'ini xi'soë' Elí, nu na' náquië' xúzinu María, nigula queë' José na'.

²⁴ Elí na' gúquië' zxí'inë' Matat,
nu ni guca zxí'inë' Leví,
nu ni guca zxí'inë' Melqui,
nu ni guca zxí'inë' Jana,

nu ni guca zxí'inë' ia'tué' José.

²⁵ José ni gúquië' zxí'inë' Matatías,
nu ni guca zxí'inë' Amós,
nu ni guca zxí'inë' Nahum,
nu ni guca zxí'inë' Esli,
nu ni guca zxí'inë' Nagai.

²⁶ Nagai na' gúquië' zxí'inë' Mat,
nu ni guca zxí'inë' ia'tué' Matatías,
nu ni guca zxí'inë' Semei,
nu ni guca zxí'inë' ia'tué' José,
nu ni guca zxí'inë' Judá.

²⁷ Judá na' gúquië' zxí'inë' Joana,

nu ni guca zxí'inë' Resa,
nu ni guca zxí'inë' Zorobabel,
nu ni guca zxí'inë' Salatiel,
nu ni guca zxí'inë' Neri.

²⁸ Neri na' gúquië' zxí'inë' ia'tué' Melqui,
nu ni guca zxí'inë' Adi,
nu ni guca zxí'inë' Cosam,
nu ni guca zxí'inë' Elmodam,
nu ni guca zxí'inë' Er.

²⁹ Er na' gúquië' zxí'inë' Josué,
nu ni guca zxí'inë' Eliezer,
nu ni guca zxí'inë' Jorim,
nu ni guca zxí'inë' ia'tué' Matat.
³⁰ Matat na' gúquië' zxí'inë' Leví,
nu ni guca zxí'inë' Simeón,
nu ni guca zxí'inë' Judá,
nu ni guca zxí'inë' ia'tué' José,
nu ni guca zxí'inë' Jonán,
nu ni guca zxí'inë' Eliaquim.

³¹ Eliaquim na' gúquië' zxí'inë' Melea,
nu ni guca zxí'inë' Mainán,
nu ni guca zxí'inë' Matata,
nu ni guca zxí'inë' Natán.

³² Natán na' gúquië' zxí'inë' David,
nu ni guca zxí'inë' Isaí,
nu ni guca zxí'inë' Obed,
nu ni guca zxí'inë' Booz,
nu ni guca zxí'inë' Salmón,
nu ni guca zxí'inë' Naasón.

³³ Naasón na' gúquië' zxí'inë' Aminadab,
nu ni guca zxí'inë' Aram,
nu ni guca zxí'inë' Esrom,

nu ni guca zxí'inë' Fares,
 nu ni guca zxí'inë' ia'túë' Judá.
34 Judá na' gúquië' zxí'inë' Jacob,
 nu ni guca zxí'inë' Isaac,
 nu ni guca zxí'inë' Abraham,
 nu ni guca zxí'inë' Taré,
 nu ni guca zxí'inë' Nacor.

35 Nacor na' gúquië' zxí'inë' Serug,
 nu ni guca zxí'inë' Ragau,
 nu ni guca zxí'inë' Peleg,
 nu ni guca zxí'inë' Heber,
 nu ni guca zxí'inë' Sala.

36 Sala na' gúquië' zxí'inë' Cainán,
 nu ni guca zxí'inë' Arfaxad,
 nu ni guca zxí'inë' Sem,
 nu ni guca zxí'inë' Noé,
 nu ni guca zxí'inë' Lamec.

37 Lamec na' gúquië' zxí'inë' Matusalén,
 nu ni guca zxí'inë' Enoc,
 nu ni guca zxí'inë' Jared,
 nu ni guca zxí'inë' Mahalalel,
 nu ni guca zxí'inë' ia'túë' Cainán.

38 Cainán na' gúquië' zxí'inë' Enós,
 nu ni guca zxí'inë' Set,
 nu ni guca zxí'inë' Adán,
 nu ni guca ca zxí'ini cazë' Dios.

4

*Satanás tu' xihui' rë'ëni usubaga' Jesús dul-la'
 (Mt. 4:1-11; Mr. 1:12-13)*

1 Buzë'ë Jesús ra' yegu Jordán, zóalenë' Dios Bö'
 Lá'ayi Lë', ate' Dios Bö' Lá'ayi na' guché'ë Jesús lu

lataj cá'asö. ² Guzóë' Jesús ni' idú ca choá' dza, ate' gú'uni tu' xihui' usubaga' Jesús dul-la'. Biti' bi gudahuë' Jesús yugu' dza na', ate' gudödi ni' ridunë'. ³ Ní'irö tu' xihui' na' gudxi Jesús, rnna:

—Channö naca cazu' Li' Zxí'inë' Dios, gunnátsöca' ulu'huöáca guiøj ni yöta xtila.

⁴ Bubi'ë didza' Jesús, rë' le:

—Nazúaj lu guichi, rnna: "Calégasö yöta xtila nabánigaca böñachi, pero nabánigaca ca' yúgu'të xtídzë'ë Dios."

⁵ Ní'irö guchë' tu' xihui' na' Jesús ga naca tu lu guí'a sibi ate' tu chí'ido'osö bulu'i Lë' yúgu'të xilátjagaca nupa ta'nná bë' yödzölió. ⁶ Tu' xihui' na' rë' Jesús, rnna:

—Gunna' quiu' yúgu'të xilátjagaca nupa ta'nná bë' ni, en yöl-la' tsahui' quéguequi, tu' nadödi lu na'a yúgu'të lë ni, ate' nu rë'ënisiда' ruá'a que. ⁷ Channö Li' uzóá zxibu' lahua', en gunu' neda' zxön, yúgu'të lë ni guequi quiu'.

⁸ Bubi'ë didza' Jesús, rë' le:

—Gucuita ga zoa', Satanás, tu' nazúaj lu guichi lá'ayi le rë netu', rnna: "Xanu' Dios tseaj ládxu'u-në', en tuzë' Lë' gunu' xichinë'."

⁹ Ní'irö tu' xihui' na' guchë' Jesús Jerusalén, ate' budxía Lë' lu zö'ö ícjo'olö yudo', en rë Lë':

—Channö nacu' Zxí'inë' Dios, busuládzutsöca' cuinu' ni ¹⁰ tu' nazúaj lu guichi lá'ayi, rnna:

Dios isöl-lë'ë gubáz lá'ayi queë', ilácalenë' Li'.

¹¹ Lu ná'agaquïë' ulu'chisë' Li' para cabí tsöjchégu'u guiøj,
en biti' gunu' zi' ni'u.

¹² Bubi'ë didza' Jesús, rë' le:

—Nazúaj lu guichi lá’ayi le rë netu’: “Biti’ si’ bë’u Xanu’ Dios.”

¹³ Cate’ biti’ budzöli tu’ xihui’ na’ ia’tú le si’ bë’ Jesús, buzá’ ga zoë’ tu chí’ido’.

Risí lahuë’ Jesús runë’ xichinë’ luyú Galilea

(Mt. 4:12-17; Mr. 1:14-15)

¹⁴ Böajë’ Jesús luyú Galilea, dë lu në’ë yöl-la’ huáca queë’ Dios Bö’ Lá’ayi. Guzé didza’ ca naca queë’, ate’ bila’yöni bönachi nacuá’ yúgu’të yödzö idú gásibi’ilö. ¹⁵ Busédinë’ Jesús bönachi gapa naca lu yu’u ga tu’dubë’ tu’sëdë’ bönni’ judío queë’ Dios, ate’ yúgu’të bönachi gulún Lë’ zxön.

Le benë’ Jesús yödzö Nazaret, ga naca ladzë’

(Mt. 13:53-58; Mr. 6:1-6)

¹⁶ Ní’irö budxinë’ Jesús yödzö Nazaret ga ni’ guzxönë’. Cate’ bidxín dza lá’ayi quégaquië’ bönni’ judío, ca run cazë’ Jesús, guyázië’ lu yu’u ga tu’dubë’ tu’sëdë’ bönni’ judío queë’ Dios, ate’ guzuínë’ para ulabë’ tu le nazúaj lu guichi lá’ayi. ¹⁷ Bulu’dödë’ lu në’ë Jesús guichi ga na’ nazúaj didza’ bë’ë Isaías, bönni’ bë’ë didza’ uláz queë’ Dios. Cate’ gusaljë’ guichi na’, budzölinë’ ga nazúaj lu guichi le rnna:

¹⁸ Zóalenë’ Bö’ Lá’ayi queë’ Xanru’ neda’

tu’ nubéajë’ neda’ quez queë’

para usiyönda’ bönachi yechi’ didza’ dxi’a.

Gusöl-lë’ë neda’ para una’ nupa raca zi’
ládxido’guequi,

en usiyönda’ nupa nadzúngaca, ca gaca ulu’lágaca,

en úna’ bönachi nachul-la lóguequi,

en usölá’ bönachi zoa nu run léguequi zi’,

19 en guna' libán que dza ruzá' ládxë'ë Xanru' Dios
quégaca bönachi.

20 Ní'irö butubë' Jesús guichi na', en bugu'ë le
lu në'ë bönni' rapa chi'ë yugu' guichi lá'ayi, ate'
gurö'ë. Ní'irö yúgu'të nupa nudúbigaca lu yu'u na'
gula'ná' Jesús. **21** Gusí lahuë' Jesús rë' légaquië':

—Na'a dza ni zóali' libí'ili', rudxín caz le nazúaj
lu guichi ni.

22 Yúgu'të' gula'nné' dxi'a queë', en bulu'báninë'
ca naca didza' dxi'a ru'ë, ate' ta'nné':

—¿Naru' calëga bönni' ni zxí'inë' José?

23 Jesús rë' légaquië', rnnë':

—Nadxi huëli' neda' lë ni ta'nná bönachi, le rnna:
“Li', bönni' ruún bönachi, bun cuinu’.” Lësca' caní
huëli' neda': “Yugu' le biyónitu' benu' Capernaum,
ben ca' ga ni naca ladzu'.”

24 Gunné' ca' Jesús:

—Le nácatë rea' libí'ili', channö zoë' nu bönni'
ru'ë didza' uláz queë' Dios, biti' tun bönachi uládz
queë' lë' bal. **25** Le nácatë rea' libí'ili', gula'cuá'anu
zián nigula uzëbi luyú Israel yugu' dza ni' zoë'
Elías, bönni' bë'ë didza' uláz queë' Dios, cate' ni'
biti' gulaj guiój idú ca tsonna iz yu' xopa beo', ate'
guca gubín luyú na', **26** pero Dios biti' gusöl-lë'ë
Elías na' ga nacuá'anu nigula uzëbi nabábagacanu
Israel, pero gusöl-lë'ë lë' ga na' zóanu tu nigula
uzëbi lu yödzö Sarepta, le nababa yödzö Sidón.
27 Lësca' caní, gula'cuá' zián nupa te'e huë' nudzu'
ruzödi luyú Israel dza ni' zoë' Eliseo, bönni' bë'ë
didza' uláz queë' Dios, pero biti' böáquië' nu bönni'
nútsë'ë ladaj bönachi Israel na', pero böáquië' tuzë'
Naamán, bönni' nababë' luyú Siria.

28 Cate' bila'yönnë' didza' ni, gula'lenë' yúgu'të bönni' nacu'ë lu yu'u ga na' tu'dubë' tu'sëdë' queë' Dios. **29** Ní'irö gula'yasë', en bulu'béajë' Jesús ní'ilö ra' yödzö. Gula'chë'ë Lë' ga naca lë'e gui'a guiöj ga na' dë ládzagaquië' para ulu'suládzuë' Lë' ga naca lë'e gui'a guiöj na'. **30** Ní'irö gudödë' Jesús gatsaj láhui'lö ga na' nacu'ë, söhuõajtë'.

Tu bönni' yu'u lë' bö' xihui'
(Mr. 1:21-28)

31 Ní'irö guyijë' Jesús yödzö Capernaum luyú Galilea, ate' busédinë' böñachi yugu' dza lá'ayi quégaquië' bönni' judío. **32** Bulu'báninë' ca naca le rusédinë' Jesús légaquië', tu' bë'ë didza' ca tu bönni' dë lu në'ë yöl-la' unná bë'.

33 Zóatë' ca' tu bönni' yu'u lë' bö' xihui' lu yu'u ga na' tu'dubë' tu'sëdë' queë' Dios, ate' bë'ë zidzaj didza', **34** rnnë':

—¡Busán netu'! ¿Bizxi ráala'tu' quiu', Jesús, bönni' Nazaret? ¿Naru' zo'o para usunítiu' netu'? Núnbë'a Li' Nu nacu'. Bönni' Lá'ayi queë' Dios nacu'.

35 Jesús buzenë' le bach bö' xihui' na', en rë' le:

—Busayaj ru'u, en burúaj lu bönni' ni.

Ní'irö bö' xihui' na' gurú'una bönni' na' lu yu lógaca böñachi nacuá' ni'. Burúajtë lu bönni' na', en bíti'rö bi ben queë'. **36** Bulu'báninë' yúgu'të', en gulu'ë didza' tuë'len ia'túë', ta'nnë':

—¿Bizxi didza' ni ru'ë? Len yöl-la' unná bë', en yöl-la' huáca zxön rinná bë'enë' yugu' bö' xihui', ate' tu'rúajtë bö' xihui' na'.

37 Guzë didza' ca naca queë' Jesús, ate' bila'yöni böñachi yúgu'të yödzö idú gásibi'ilö.

*Ruúnë' Jesús xiná'anu nigula queë' Pedro
(Mt. 8:14-15; Mr. 1:29-31)*

³⁸ Ní'irö guyasë' Jesús, en burúajë' lu yu'u ga na' tu'dubë' tu'sëdë' queë' Dios, ate' guyázië' lidxë' Simón. Xiná'anu nigula queë' Simón na' zóanu ni', en yú'unu xilá, ate' guláta'yuë' lahuë' Jesús únë'-nu. ³⁹ Gubígui'ë Jesús ga na' dënu, ate' bulidzë' huë' xilá na' yú'unu. La' birúajtë xilá na' yú'unu, ate' la' guyástënu, en bë'ënu le gulahuë'.

*Ruúnë' Jesús zián nupa te'e
(Mt. 8:16-17; Mr. 1:32-34)*

⁴⁰ Cate' chiribía gubidza, yúgu'të nupa nacuá'len léguequi nupa na' te'e que queéguequi yödzhuë' bila'dxín ni', ate' dujuá'gaca léguequi ga na' zoë' Jesús. Lë' guxóa né'ë nupa na' te'e, en bunë' léguequi. ⁴¹ Bulu'rúaj ca' zián bö' xihui' yú'ugaca böñachi te'e na'. Ta'bödxia' bö' xihui' na', ta'nná:
—Li' nacu' zxí'inë' Dios.

Ní'irö Jesús buzenë' le bach yugu' bö' xihui' na', en biti' bë'ë lataj ila'nná, tu' nöziguequi náquië' Cristo.

*Runë' Jesús libán luyú Galilea
(Mr. 1:35-39)*

⁴² Cate' za' rení' ia'tú dza, burúajë' Jesús Caper-naum na', ate' guyijë' tu lataj cá'asö. Bila'dxín böñachi zián ni', tu'guílaj Jesús. Cate' bila'dxinë' ga na' zoë', gulë'ëniguequinë' ulu'tsenë' Lë', para cabí uzë'ë ga na' nacu'ë. ⁴³ Ní'irö Jesús gudxë' légaquië', rnnë':

—Run bayudxi tseja' gapa nacuá' ia'zíca'rö yödzö, tsöjena' ca' libán ni' que didza' dxi'a ca rinná bë'ë Dios. Que lë ni na' gusöl-lë'ë neda' ni.

44 Caní guca, benë' libán yugu' yödzö luyú Galilea gapa naca lu yu'u ga tu'dubë' bönni' judío, en tu'sëdë' queë' Dios.

5

*Ta'dzunba' böla zián
(Mt. 4:18-22; Mr. 1:16-20)*

1 Cate' ni' zoë' Jesús ra' nísado' nazí'i le Genesaret, lu xiyú Galilea, bulu'quídá' bönnachi zián Lë' para ila'yöni xtídzë'ë Dios. **2** Ní'irö bilé'enë' Jesús chopá bárcodo', zxóagaca lu nísado' ga na' naca ra' yu bidxi, ate' narúajgaquië' bönni' uzzxón böla lë'egaca bárcodo' na', en ta'guibë' yöxa jböla quégaquië'. **3** Gurenë' Jesús tu lë'e bárcodo' na', le nequi queë' Simón Pedro, ate' gunábinë' lë' udxíguië' le ia'láti'do' zi'tu' ga naca ra' yu bidxi na'. Ní'irö gurö'ë Jesús lë'e bárcodo' na', en rö'ösë' ca' ni' rusédinë' bönnachi zián nacuá'lu yu bidxi na'. **4** Cate' budxi bë'ë didza' Jesús, ní'irö gudxë' Simón, rnnë':

—Busá' bárcodo' ni lu nísado' ga na' rö'ö zila, ate' ni' gulí'zalaj yöxa jböla queëli' para sönli'-ba' böla.

5 Bubi'ë didza' Simón, rë' Jesús:

—Bönni' Usëdi, idú yëla chibentu' dxin, en biti' bi böla nazönitu'-ba', pero didza' quiu' izáljagara' yöxa j.

6 Cate' chigula'zaljë' le, gula'zönë' ziántëröba' böla, ate' réquitiqui' iröza' yöxa jböla na'. **7** Ní'irö bulu'lá'a bulu'lui'isinë', bulu'lidzë' luzá'agaquië' nacu'ë ia'tú lë'e bárcodo' na' para zá'gaquië' ilácalenë' légaquië'. Cate' bila'dxinë' ni' bulu'dzë'ë-ba' böla irópatë bárcodo' na', ate' chirequi ulu'huörtaj bárcodo' na' lu nisa. **8** Cate' bilé'enë'

Simón Pedro lë ni, ní'irö buzóa zxibë' lahuë' Jesús, rnnë':

—Gucuita ga zoa', Xan, tu' naca' bönni' dul-la'.

⁹ Caní gunné' tu' radxi ridzöbinë' Pedro ni'a quégacaba' böla zián na' gula'zöngaquië'-ba', en lësca' caní guca quégaca nupa nacuá'len lë'.
¹⁰ Guladxi gula'dzöbinë' ca' Jacobo, en Juan, yugu' zxí'inë' Zebedeo, nupa ni nácagaca luzë'ë Simón Pedro na'. Ní'irö Jesús rë' Simón na', rnnë':

—Biti' gádxinu'. Na'a isílo' ichë'u quia' bönachi ca runu' rizönü'-ba' böla.

¹¹ Cate' chibulu'sudxinë' yugu' bárcodo' na' ga naca ra' yu bidxi, ní'irö bulu'cá'anë' yúgu'të ni', ate' söjácalenë' Jesús.

*Ruúnë' Jesús tu bönni' ré'enë' huë' nudzu' ruzödi
(Mt. 8:1-4; Mr. 1:40-45)*

¹² Cate' zoë' Jesús tu lu yödzö ni', bidxinë' tu bönni' ré'ede'enë' huë' nudzu' ruzödi ga na' zoë'. Cate' bilé'enë' Jesús, busudxín lahuë' lu yu, en güita'yuë' lahuë', rnnë':

—Xan, channö rë'ënu', huáca unu' neda'.

¹³ Ní'irö bulí næ'ë Jesús, en gudanë' lë'. Rë' lë':

—Rë'ënda'. Gacu' dxi'a.

La' gubídxitë huë' nudzu' queë' bönni' na'.

¹⁴ Ní'irö Jesús gunná bë'enë' lë' cuntu nu guíë' ca'. Gudxë' lë':

—Guyéaj, yöjlui'i cuinu' lahuë' bixúz, ate' yöjnödzaj que yudo' le rului'i nuhuöácu' dxi'a ca gunná bë'ë Moisés, lë na' ului'i légaquië' chiböácu'.

¹⁵ Guzétérö didza' que yöl-la' huáca queë' Jesús, ate' bulu'dubi bönachi zián ga na' zoë' para ila'yöni xtídzë'ë, en para únë' léguequi, ugüë' yödzöhuë'

té'eguequi. **16** Ní'irö buzé'ë Jesús ni', en guyijë' tu lataj cá'asö, ate' ni' bulidzë' Dios.

*Ruúnë' Jesús tu bönni' huë' nacú'unië' bin
(Mt. 9:1-8; Mr. 2:1-12)*

17 Ia'tú dza, cate' ni' rusédinë' Jesús bönachi, rö'ögaquië' yugu' bönni' yudo' fariseo len bönni' yudo' tu'sédinë' xibá queë' Moisés ni', narúajgaquië' yúgu'të yödzö luyú Galilea, en luyú Judea, en lu yödzö Jerusalén. Naca bë' dë lu në'ë Jesús yölla' huáca queë' Xanru' Dios tu' ruúnë' bönachi te'e nacuá' ni'. **18** Ní'irö bönni' nuá'agaquië' le denë' tu bönni' huë' nacú'unië' bin bila'dxinë' ga ni', ate' bulu'guiljë' nacxi ilunë' para ila'gu'ë lë' lu yu'u para ila'guixjë' lë' lahuë' Jesús. **19** Cate' biti' gula'dzöline' nacxi ilunë', tu' nacuá' bönachi zián ni', gula'benë' ícjo'olö yu'u na', en gula'saljë' ícjo'o na'. Ní'irö bulu'zötjë' le denë' bönni' huë' na', ate' gula'guíxjë' lë' gatsaj láhui'lö bönachi ni' lahuë' Jesús. **20** Cate' gúquibe'enë' Jesús ca na' ta'yéajlë'ë Lë', gudxe' bönni' huë' na':

—Bönni', yugu' dul-la' nabágu'u chibuníti lahuá'.

21 Ní'irö gula'sí lógaquië' ta'zá' ládxi'gaquië' bönni' yudo' tu'sédinë' na', en yugu' bönni' yudo' fariseo, ta'nnë': “¿Nuzxi caz bönni' ni rnnë' le rucá'ana Dios cá'asö? ¿Nuzxi caz gaca uniti lo dul-la'? Tuzé' Dios runiti lahuë' dul-la'.”

22 Réquibe'enë' Jesús le ta'zá' ládxi'gaquië', ate' rë' légaquië':

—¿Bizz que rizá' ládxi'li' caní? **23** Biti' naca böniga nu guiësö bönni' ni: “Yugu' dul-la' nabágu'u chibuníti lahuá'”, pero naca böniga nu gun ga chasë', en së'e ni'ë. **24** Guna' ga inözili' dë lu na'a neda',

Bönni' Guljë' Bönachi, yöl-la' unná bë' uniti lahu'a' dul-la' luyú ni.

Ní'irö gudxë' bönni' na' nacú'unië' bin, rnnë':

—Li' rea', guyasa. Buá' le denu', en böaj lidxu'.

²⁵ La' guyásatë' bönni' huë' na' lógaquië', ate' bu'ë lë na' gúti'në', en söhuöjë' lidxë', rigu'ë Dios yöl-la' ba. ²⁶ Gula'nítitiqu'sinë' yúgu'të', ate' gula'gu'ë Dios yöl-la' ba, en tádxisinë' ca', ta'nnë':

—Na'a bilé'eru' le run ga rubániru'.

*Jesús rulidzë' Leví
(Mt. 9:9-13; Mr. 2:13-17)*

²⁷ Gudödi gulaca yugu' lë ni burúajë' Jesús ni', ate' bilé'enë' tu bönni' uquízxaj lázagaca bönachi, lë' Leví, rö'ë ga na' ruquízxjë', ate' Jesús rë' lë':

—Gudá' neda'.

²⁸ La' guyásatë' Leví, ate' bucá'anë' yúgu'të, en sa'yéajlenë' Jesús.

²⁹ Gudödi ni' benë' Leví na' tu gü'i huagu queë' Jesús ga naca lu yu'u lidxë', ate' gula'cu'ë zián bönni' uquízxaj ni' len ia'bal-lë' bönni' ta'bö'lenë' légaquië' tahuë'. ³⁰ Ní'irö bönni' yudo' tu'sédinë' len yugu' bönni' yudo' fariseo gula'nnë' quégaquië' bönni' usëda queë' Jesús, ta'nnë':

—¿Bizz que rë'aj rágulenli' yugu' bönni' uquízxaj, en ia'zíca'rë' bönni' dul-la'?

³¹ Bubi'ë didza' Jesús, rë' légaquië':

—Yugu' bönni' nacu'ë dxí'a biti' naquíniguequinë' nu un bönachi, pero bönni' té'enë' naquíniguequinë' nu un bönachi. ³² Za'a, calëga ulídzagaca'-në' bönni' tsahui', pero za'a ulídzagaca'-në' bönni' dul-la' para ulu'bí'i ládxí'gaquië'.

*Ta'nábinë' Jesús ca naca que yöl-la' run gubasa
(Mt. 9:14-17; Mr. 2:18-22)*

33 Ní'irö bönni' yudo' na' gula'nábinë' Jesús, ta'nnë':

—¿Bizx que tunë' gubasa zián luzuí bönni' dá'gaquië' Juan, en tu'lidzë' Dios, ate' tunë' ca' caní bönni' dá'gaquië' yugu' bönni' yudo' fariseo, pero bönni' dá'gaquië' Li' të'aj tahuë'?

34 Jesús rë' légaquië':

—¿Naru' huácatsö gunli' ga ilunë' gubasa bönni' nacu'ë laní que yöl-la' rutsaga na' tsanni ni' bönni' rutsaga në'ë zóalenë' légaquië'? **35** Huadxín dza cate' udúë' bönni' rutsaga në'ë ga nacu'ë. Dza ní'irö ilunë' gubasa.

36 Ní'irö bucúdzu'ë didza' Jesús ca naca lë ni, ate' rë' légaquië':

—Cuntu nu bönni' ichúguië' tu lari' cubi chinadía, en cuejë' tsötaca' le udë'ë lë'e lari' tëbi. Channö gunë' caní, calégasö gaca ditaj lari' cubi na', pero lári'do' na' birúaj lë'e lari' cubi na' biti' tsöjlöza lari' tëbi na'. **37** Lësca' caní, cuntu nu bönni' riguë'ë xisi uva cubi lu buzudi guídi gula. Channö nu gun caní, xisi uva cubi na' uchöza' buzudi guídi gula, ate' ilalaj xisi uva na', ate' gaca ditaj buzudi guídi gula na'. **38** Que lë ni na' ral-la' cá'aru' xisi uva cubi lu buzudi guídi cubi, ate' irópatë ilaca chi'i. **39** Channö zoa nu rë'aj xisi uva gula, biti' gué'ënité guí'aj xisi uva cubi, tu' rnna: "Nácarö sizxi' xisi uva gula na'."

6

Bönni' usëda queë' Jesús ta'lecjë' do zxoa' xtila dza lá'ayi

(Mt. 12:1-8; Mr. 2:23-28)

¹ Cate' naca tu dza lá'ayi quégaquië' bönni' judío, ridödë' Jesús gapa dë yöla zxoa' xtila, ate' bönni' usëda queë' ta'lecjë' do ga dxía zxoa' xtila. Ta'zxúbi'ni ná'agaquië' le, en tahuë'. ² Ní'irö gula'nábinë' bönni' yudo' fariseo légaquië', ta'nné':

—¿Bizz que runli' le cabí ral-la' gunru' dza lá'ayi?

³ Bubi'ë didza' Jesús, rë' légaquië':

—¿Naru' cabí nulábanili' ca benë' David cate' gudunë', ate' gula'dún ca' nupa nacuá'len lë'?

⁴ Guyázië' lu yu'u queë' Dios, en guzxi'ë yöta xtila tu'cu'ë lahuë' Dios, lë na' biti' ral-la' gáguru', pero tuz bixúz dë lataj ilahuë', ate' gudahuë' David le, en bë'ë ca' quéguequi nupa nacuá'len lë'.

⁵ Ní'irö Jesús gudxë' légaquië', rnnë':

—Neda', Bönni' Guljë' Bönachi, naca' xani dza lá'ayi.

Tu bönni' narequi' né'ë

(Mt. 12:9-14; Mr. 3:1-6)

⁶ Cate' naca ia'tú dza lá'ayi quégaquië' bönni' judío, guyázië' Jesús lu yu'u ga tu'dubë' tu'sëdë' queë' Dios, en busédinë' nupa nacuá' ni'. Zoë' ca' tu bönni' ni' narequi' né'ë ibëla. ⁷ Yugu' bönni' yudo' tu'sédinë', en yugu' bönni' yudo' fariseo tu'yúë' Jesús para ila'lé'enë' channö únë' bönni' na' cate' naca dza lá'ayi quégaquië' para ulu'dzölinë' nacxi ulu'zéguië' Lë' didza'. ⁸ Réquibe'enë' Jesús le ta'zá' ládx'i'gaquië', ate' gudxë' bönni' na' narequi' né'ë, rnnë':

—Guyasa. Guzuí gatsaj láhui'lö ni.

La' guyásatë' bönni' na', guzuínë'. ⁹ Ní'irö Jesúś gudxë' yugu' bönni' yudo' na', rnnë':

—Unábitsöqui'da' libí'ili' tu didza'. ¿Naru' dë lataj cate' naca dza lá'ayi gunru' le naca dxi'a o gunru' le ruá' dö'? ¿Naru' dë lataj uguéla'ru' yöl-la' na'bán quégaca bönachi, o ugúaru' le?

¹⁰ Ní'irö buyúë' Jesúś yúgu'të bönni' na' nacu'ë gásibi'ilë', ate' gudxë' bönni' huë' na':

—Bulí no'o.

Bulí në'ë bönni' na', ate' la' böácatë në'ë na'. ¹¹ Ní'irö gula'lenë' bönni' yudo' na', ate' gulún xtídza'gaquië' la' légacasë' nacxi bi ilunë' queë' Jesúś.

Riböë' Jesúś chínnuë' bönni' ilácagaquië' gubáz queë'

(Mt. 10:1-4; Mr. 3:13-19)

¹² Dza ni' guyijë' Jesúś ga naca tu lu guí'ado'. Bulidzë' Dios ni', ate' idú yëla bë'lenë' Dios didza'.

¹³ Cate' za' rení', bulidzë' yugu' bönni' dá'gaquië' Lë', ate' guröë' chínnuë' para iláquië' gubáz queë'.

¹⁴ Bulidzë':

Simón, (lë' ca' Pedro),

Andrés, (böchë'ë Pedro),

Jacobo, en Juan, en Felipe, en Bartolomé,

¹⁵ Mateo, en Tomás,

Jacobo, (zxí'inë' Alfeo),

Simón, (bönni' ruí'i ládxë'ë yödzö queë'),

¹⁶ Judas, (böchë'ë Jacobo),

en Judas Iscariote, (bönni' udödë' Jesúś lu ná'agaquië' bönni' ilútië' Lë').

*Ruúnë' Jesús bönachi zián
(Mt. 4:23-25)*

¹⁷ Jesú斯 bötjalenë' yugu' bönni' gubáz queë' na' lu guí'ado' na', ate' bila'dxinë' tu ga naca lachi', ga ni' nacu'ë ziánrö ca' bönni' usëda queë', ate' nacuá'len légaquië' bönachi zián narúajgaca yúgu'të yödzö luyú Judea, en yödzö Jerusalén, en yugu' yödzödo' dëgaca ra' nísado' ga na' nacuá' yödzö Tiro, en yödzö Sidón. Bila'dxín bönachi ni ga ni' para ulu'zé nágagaca xtídze'ë Jesú斯, en ulu'huoáca lu yödzöhuë' té'eguequi. ¹⁸ Bulu'huoáquië' ca' bönni' ni' ta'guí'i ta'záquië' lu ná'agaca bö' xihui'. ¹⁹ Yúgu'të bönachi zián na' tuí'i ládxí'gaca ila'gán Jesú斯 tu' ruúnë' léguequi len yöl-la' huáca queë'.

*Nupa nácagaca bica' ba, en nupa nácagaca bica'
bayechi'*

(Mt. 5:1-12)

²⁰ Ní'irö buyúë' Jesú斯 yugu' bönni' usëda queë' nacu'ë ni', en gudxé' légaquië':

—Bica' ba libí'ili', réquibe'eli' riyadzjali' le naca queë' Dios, tu' gata' queëli' lataj ga rinná bë'ë Dios.

²¹ 'Bica' ba libí'ili' ridunli' le gunnë' Dios queëli', tu' huöljali'.

'Bica' ba libí'ili' ribödxili' tu' bi nadéli'li' le naca tsahui', tu' huadxín dza uzxídxili'.

²² 'Bica' ba libí'ili', tu' za' dza cate' biti' ila'lé'e bönachi libí'ili' dxí'a, en ulu'béaj libí'ili' ga nacuá', en ila'nnë zi' queëli', en ulu'cá'ana cá'assö le nazí'i lali' ca tu le naca xihui' tu' dá'ali' neda', Bönni' Guljë' Bönachi. ²³ Buli'sí' xibé dza na', en buli'dzeja, tu' naca zxön le guequi queëli' yehua' yubá. Lëscá' caní gulunë' xuz xtó'ogaca bönachi ni quégäquië' bönni' gulu'ë didza' uláz queë' Dios.

24 'Bica' bayechi' libí'ili', dë yöl-la' tsahui' queéli', tu' chidé le ruzí'ili' xibé.

25 'Bica' bayechi' libí'ili' nuhuöläj nudzé'eli' na'a, tu' huadunli'.

'Bica' bayechi' libí'ili' ruzzídxili na'a, tu' huí'inili', en cödxi yéchi'li'.

26 'Bica' bayechi' libí'ili' ta'nné yúgu'té böñachi dxí'a queéli'. Lësca' caní gulunë' xuz xtó'oli', gula'nné' dxí'a quégacuïë' bönni' gula'zí' yë'ë, gula'nné' nácagaquïë' bönni' tu'ë didza' uláz queë' Dios.

*Ral-la' idxí'iru' nupa biti' ta'lé'e rë'u dxí'a
(Mt. 5:38-48; 7:12)*

27 Gunné' ca' Jesúś:

—Libi'ili' zóali' ni, en riyónili' xtídz'a'a, rea' libí'ili': Guli'dxí'i nupa biti' ta'lé'e libí'ili' dxí'a. Guli'gún le naca dxí'a quégaca nupa tu'dí'i libí'ili'.

28 Guli'nabi Dios gaca dxí'a quégaca nupa tua' dö' queéli', en buli'llidzé' Dios inábili'-në' gácalenë' nupa ta'nné zi' queéli'. **29** Channö nu capa' tsölá'a xagu', buzé ia'tsölá'a ca' xagu'. Channö nu cúa lari' naxóa cúdz'u, bë' lataj cúa ca' zxo'. **30** Núti'tës nu bi inaba le dë quiu', bunödzaj que, ate' nu cúa le nequi quiu', biti' unabu' le. **31** Ca rë'ënili' ilún böñachi queéli', lësca' caní guli'gún quéguequi.

32 'Channö nadxí'isili' nupa nadxí'igaca libí'ili', ¿bizxi yöl-la' ba idéli'li'? Lësca' caní tunë' bönni' dul-la', ta'dxí'inë' nupa nadxí'iguequi légaquïë'.

33 Channö runli' le naca dxí'a quégacasö nupa tun dxí'a queéli', ¿bizxi yöl-la' ba idéli'li'? Lësca' caní tunë' bönni' dul-la'. **34** Channö runödzjali' quégaca nupa runli' löza ulu'bí'i queéli', ¿bizxi yöl-la' ba idéli'li'? Lësca' caní tunë' bönni' dul-la', tu'nödzjë'

quégaca nupa tun dul-la', tu' tunë' löza ulu'bí'i quégaquië' lë na' bulu'nödzjë'. ³⁵ Neda' rea' libí'ilí: Guli'dxí'i nupa bití' ta'lé'e libí'ilí' dxi'a, en guli'gún le naca dxi'a. Buli'nödzaj quégaca böñachi sal-la' bití' runli' löza nu ubí'i queéli'. Channö caní gunli', zxön naca le gata' queéli', ate' gácalí' zxí'ini cazë' Dios, Nu nácatërö lo, tu' runë' Lë' le naca dxi'a quégaca böñachi bití' ta'yaza ládxí'gaca, en quégaca böñachi tuá' dö'. ³⁶ Buli'huéchi' ládxí'ilí' böñachi ca na' runë' Xúzili' Dios, ruhuéchi' ládxë'ë yúgu'të böñachi.

*Biti' ral-la' ichugu bë'ëru' que luzá'aru'
(Mt. 7:1-5)*

³⁷ Gunné' ca' Jesús:

—Biti' ichugu bë'ëli' que luzá'ali', ate' cuntu nu ichugu bë' queéli'. Biti' cuéaj bë'ëli' que luzá'ali', ate' cuntu nu cuéaj bë' queéli'. Buli'niti lo luzá'ali', ate' Dios uniti lahuë' ca' libí'ilí'. ³⁸ Buli'nödzaj que luzá'ali', ate' Dios gunnë' queéli'. Ulu'nödzjë' queéli' le ulu'rixë' len tu guí'ina ribixi le naca idú, le naguirö, en naguí gate ga rë', en zóatica' gubá. Ca naca le ruríxili', la' cá'asö urixë' Dios ca' queéli'.

³⁹ Bucúdzu'ë didza' Jesús, rë' légaquië':

—¿Naru' huácatsö nu bönni' lo chul-la iché'ë ia'túë' bönni' lo chul-la? Biti' ca' gaca, tu' ila'bixë' iropë'tulu yeru. ⁴⁰ Biti' ca' gácarë' lo tu bönni' usëda ca nu rusëdi lë', pero cate' údxi izëdë' bönni' na', gáquië' ca naca nu na' rusëdi lë'.

⁴¹ '¿Bizz que ruyú' bëbudo' yu'u guiój lahuë' böchi' luzó'o, en biti' rilé'enu' le zxön yu'u guiój lo cazu'? ⁴² ¿Naru' huácatsö guío'-në' böchi' luzó'o: "Böcha'a, benna lataj cueja' bëbudo' yu'u guiój

lo”, en biti’ rilé’enu’ le zxön yu’u guiöj lo cazu’? Li’, bönni’ rulu’isö tsahui’ cuinu’, guléaj zí’alö le zxön yu’u guiöj lo cazu’, ate’ ní’irö ilé’enu’ dxi’a para cueju’ bëbudo’ yu’u guiöj lahuë’ böchi’ luzó’o.

*Le runru’ naca bë’ le nácaru’
(Mt. 7:17-20; 12:34-35)*

⁴³ Gunné’ ca’ Jesús:

—Tu yaga dxi’a biti’ cuía le naca cá’asö. Lësca’ caní, tu yaga guí’a biti’ gaca cuía le naca dxi’a. ⁴⁴ Caní naca, le ribía tu yaga naca bë’ ca naca yaga na’. Biti’ ruchíbiru’ le ribía yaga higo lu yaga yötsi’, en calëga lu bisequi’ yötsi’ biti’ ruchíbiru’ le ribía lubá uva. ⁴⁵ Tu bönni’ dxi’a ru’ë didza’ dxi’a tu’ yu’u le naca dxi’a icja ládxi’dá’ahuë’, ate’ didza’ xihui’ ru’ë bönni’ xihui’ tu’ yu’u icja ládxi’dá’ahuë’ le xihui’. Rinné ruá’aru’ ca naca le yu’u icja ládxi’dó’oru’.

*Chopa ca gaca cuéquiru’ xilibi yu’u
(Mt. 7:24-27)*

⁴⁶ Gunné’ ca’ Jesús:

—¿Bizz que rulídzali’ neda’, rninali’: “Xantu’, Xantu”, pero biti’ runli’ ca rinná bë’eda’ libí’ili”? ⁴⁷ Uluí’ida’ libí’ili’ ca naca nu na’za’quia’, en riyöni xtídz'a, en run ca rnna xtídz'a. ⁴⁸ Nu ni naca ca tu bönni’, cate’ benë’ lidxë’, guchö’önë’ ga rë’, en guléquië’ xilibi yu’u ga naca lu guiöj. Cate’ bötaj yegu gubó’o, guchö’öna cuita yu’u na’, pero biti’ guca uquínnaj le, tu’ nulibi ga naca lu guiöj. ⁴⁹ Na’a, nu riyöni xtídz'a, en biti’ run ca rnna, nu ni naca ca tu bönni’ benë’ lidxë’ ga naca lu yu cá’asö. Biti’ benë’ xilibi. Cate’ guchö’öna yegu gubó’o cuita yu’u na’, la’ biguínnajtë, ate’ gubixi dërö zö’ö que.

7

Jesús ruúnë'-bi' bi'i huen dxin queë' tu bönni' unná bë'
(Mt. 8:5-13)

¹ Cate' Jesús budxi bë'lenë' légaquië' didza' ni, guyázië' yödzö Capernaum. ² Lu yödzö ni' zoë' tu bönni' Roma rinná bé'enë' bönni' röjáquië' gudil-la. Zóabi' bi'i huen dxin queë' nadxí'ide'enë'-bi', ate' bi'i ni ré'ebi', en chirequi gátibi'. ³ Cate' biyönnë' bönni' ni didza' tu'ë bönachi ca naca queë' Jesús, la'gusöl-la'të'bal-lë'bönni'gula tu'zéajni'inë'bönni' judío ga na' zoë' Jesús, tsöjöta'yugaquië' lahuë' Lë' guídë' uduhuénë'-bi' bi'i huen dxin queë' na' ré'ebi'. ⁴ Bönni' gula tu'zéajni'inë' na' bila'dxinë' ga zoë' Jesús, ate' guláta'yuë' lahuë' idú ládxí'gaquië', ta'nnë':

—Náquië' lesaca' bönni' na' gunu' queë' lë ni, ⁵ tu' runë' bal bönachi uládz queëru', en benë' tu yu'u queëru' ga rudúbiru' rusëdaru' queë' Dios.

⁶ Ní'irö Jesús guyéajlenë' légaquië'. Cate' chizóa ila'dxinë' lidxë' bönni' na', lë' gusöl-lë'ë bal-lë' böchi' luzë'ë ga zë'ë Jesús, ate' të' Lë':

—Xan, rnnë' bönni' na': “Biti' ugu'inu', tu' cabí naca' lesaca' tsáziu' lidxa', ⁷ en biti' naca' lesaca' guída' ga zu'. Que lë ni na' biti' burúguida' guída' ga zu'. Bé'ësö didza', ate' huöácatëbi' bi'i huen dxin quia'. ⁸ Neda' ca', zoa nu rinná be'e neda', ate' nacu'ë ca' bönni' röjáquië' gudil-la rinná bé'eda' légaquië'. Rea'-në' tuë': Guyéaj ni', ate' rejë'. Rea'-në' ia'túë': Gudá ni, ate' ridë'. Rea'-në' ca' huen dxin quia': Ben dxin ni, ate' runë' dxin na'.”

9 Cate' biyönnë' Jesús didza' ni, bubáninë' queë' bönni' na', ate' buécjë', en gudxë' bönachi na' zá'gaca cúdzu'lë', rnnë':

—Le nácatë rea' libí'ili', cuntu nu bönni' Israel biti' röjxáqui'da'-në' réajlë'ë quia' ca réajlë'ë quia' bönni' ni.

10 Cate' bulu'dxinë' bönni' na' gusöl-lë'ë bönni' rinná bé'enë' bönni' rójáquië' gudil-la, gula'yázië' ga naca lu yu'u lidxë', en bila'lé'enë' chiböácabi' bi'i huen dxin na'.

Jesús rusubanë'-bi' bi'i bönni' queënu tu nigula uzëbi

11 Gudödi guca lë ni, sa'yéajë' Jesús yödzö Naín, ate' dzágagaquië' bönni' usëda queë' Lë', len bönachi zián. **12** Cate' bidxinë' gala' ra' yödzö na', bilé'enë' yugu' bönni' nuá'agaquië'-bi' tubi' bi'i bönni' nati. Söjcáchi'gaquië'-bi'. Bi'i nati na' nácabi' la's dui bi'i queënu tu nigula uzëbido'. Zián bönachi uladza queënu nigula uzëbi na' söjácalen-nu. **13** Cate' Xanru' bilé'enë'-nu, buéchi' ládxë'ë-nu, ate' gudxë'-nu:

—Bíti'rö cödxu'.

14 Ní'irö gubígui'ë Jesús, en gudanë' da'a yaga ga na' dëbi' bi'i nati na'. Gula'bözë' bönni' na' nuá'agaquië'-bi', ate' Jesús gunnë':

—Bi'ido', li' rea', guyasa.

15 Ní'irö bubanbi'. Guró'öbi' bi'i na' zí'alö nátibi', ate' gusí lobi' ruí'ibi' didza'. Jesús budödë'-bi' lu ná'anu xiná'abi'. **16** Cate' bönni' ni' bila'lé'enë' lë ni, guládxinë' yúgu'të', ate' gula'gu'ë Dios yöl-la' ba, ta'nnë':

—Bidxín queëru' tu bönni' lo, ru'ë didza' uláz queë' Dios. Dios caz rácalenë' bönachi queë'.

¹⁷ Guzé didza' ca naca yöl-la' huáca queë' Jesús, ate' bila'yöni bönnachi yúgu'të yödzö luyú Judea, en yúgu'të yödzö idú gásibi'ilö.

*Le rinabë' Juan, bönni' buquilë' bönnachi nisa
(Mt. 11:2-19)*

¹⁸ Bönni' dá'gaquië' Juan gula'guíxjöi'inë' lë' yúgu'të lë ni runë' Jesús. Ni' yu'ë Juan lidxi guíë, bulidzë' chopë' bönni' na' dá'gaquië' lë, ¹⁹ ate' gusöl-lë'ë légaquië' ga na' zoë' Jesús para ila'nábinë' Lë', ila'nnë': "¿Nacu' Li' Cristo, bönni' ral-la' guídë, o naru' ral-la' ciòtu'-në' bönni' yúbölö?" ²⁰ Cate' bila'dxinë' bönni' na' nasöl-lë'ë Juan ga na' zoë' Jesús, të' Lë':

—Juan, bönni' buquilë' bönnachi nisa, nasöl-lë'ë netu' para inábitu' Li', innatu': "¿Nacu' Li' Cristo, bönni' na' ral-la' guídë, o naru' ral-la' ciòtu'-në' bönni' yúbölö?"

²¹ La' ná'asö ruúnë' Jesús zián nupa te'e, yugu' bönni' huë', en bönni' yú'ugaca légaquië' bö' xihui', ate' zián bönni' lo chul-la busaljë' guiój lógaquië'. ²² Bubi'ë didza' Jesús, re' chopë' bönni' na' nasöl-lë'ë Juan, rnnë':

—Guli'tséaj, guli'tsöjtíxjöi'i-në' Juan ca naca le bilé'eli', en le biyönili'. Tu'lé'enë' bönni' guchul-la lógaquië'. Tu'zé'ë bönni' gulatsjë'. Nuhuöácagaquië' bönni' güř'iguequinë' huë' nudzu' ruzödi. Tu'yönnë' bönni' gula'cödzuë'. Nubángagaquië' bönni' gulátië'. Ta'yönnë' bönni' yechi' didza' dxi'a. ²³ Bica' ba nu biti' gaca chopaladxi', ate' za'len neda' sal-la' biti' runa' ca réqui nu na' ral-la' guna'.

24 Cate' bönni' na' gusöl-lë'ë Juan bulu'zë'ë ni', gusí lahuë' Jesús rului'inë' bönachi ni' ca naca queë' Juan na', rnne':

—¿Bizxi birúajli' yöjyuli' lu lataj cá'asö? ¿Naru' birúajli' yöjyuli' tu gui rutá bö' recja le? **25** ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' nácué' lari' nazáca'de'e? Nöz quézili' nupa nácugaca lari' nazáca'de'e, en tu'zí' xibé yöl-la' tsahui', nacuá' lídxigaquië' bönni' ta'nná bë'ë. **26** ¿Bizxi caz birúajli' yöjyuli'? ¿Naru' birúajli' yöjyuli'-në' tu bönni' ru'ë didza' uláz queë' Dios? Ön, rea' libíili', ate' nayépisétérë' ca nu ru'i didza' uláz queë' Dios. **27** Náquië' Juan bönni' na' nazúaj lu guichi lá'ayi ca naca queë', rnna:

Buyútsöca', risöl-la'a-në' gubáz quia', inóruë' ca Li'. Bönni' ni uchi'ë nöza ga tödu'.

28 'Neda' rea' libíili': Gapa nacuá' bönachi, channö zoë' nu bönni' ru'ë didza' uláz queë' Dios, biti' nácarë' lo ca Juan, bönni' na' buquilë' bönachi nisa, pero nu nácatérö cuídi'sö ga rinná bë'ë Dios nayépisétérö ca Juan na'.

29 Cate' bönachi ni', en bönni' tu'quizxjë' lázagaca bönachi bila'yönnë' didza' ni bë'ë Juan, guléquibe'enë' le naca tsahui' lahuë' Dios, en bila'dilë' nisa lu në'ë Juan, **30** pero yugu' bönni' yudo' fariseo, en bönni' yudo' tu'sédinë' xibá queë' Moisés biti' bila'dilë' nisa lu në'ë Juan, ate' caní guca, bulu'cá'anë' cá'asö le gó'unñë' Dios gunë' quégaquië'.

31 Gunnë' ca' Xanru':

—¿Nacxi uséqui'tseda' bönachi nacuá' dza ni zóaru' na'a? ¿Nacxi caz nácagaquië'? **32** Nácagaquië'

ca bí'ido' ta'guítjabi'. Ta'bó'öbi' lu yé'ëyi, en ta'bödxí'abi'. Ta'nnabi' tubi' ia'tubi': "Rucödxitu' queëli' gui, pero biti' ruyá'ali'. Rul-la yéchi'tu', pero biti' ribödxili'." ³³ Caní nácali' tu' bidë' Juan, bönni' buquile' bönnachi nisa, en biti' gudahuë' yöta xtila, en biti' gu'ë xisi uva, ate' rnnali' queë': "Tu' xihui' dzaga lë'." ³⁴ Cate' bida' neda', Bönni' Guljë' Bönnachi, en rë'aj rahua', rnnali' quia': "Bönni' ni náquië' bönni' huágulë'ë, en bönni' re'jë'. Náquië' luzá'agaquië' bönni' tu'quizxjë', en ia'zíca'rë' bönni' dul-la'." ³⁵ Rea' libí'ili': Naca bë' nupa nápagaca yöl-la' réajni'i queë' Dios ni'a que le túngaca.

Le benë' Jesús lidxë' tu bönni' yudo' fariseo

³⁶ Tu bönni' yudo' fariseo bulidzë' Jesús gágulenë' lë' tsözxön, ate' guyázië' Jesús lidxë' bönni' na', en gurö'ë rahuë'. ³⁷ Zóanu lu yödzö na' tu nigula udá dzaga, en cate' nözinu rö'ë rahuë' Jesús lidxë' bönni' yudo' fariseo na', ní'irö bidxinnu ni' nuá'anu tu böga'do' néquini guiój nazaca' le yudzu tu le rilá' zxixi. ³⁸ Cate' bidxinnu zaca' cúdzu'lë' Jesús, gurö'önü xini'ë ribödxinu. Ní'irö gusí lonu rigú'unu nisa ribödxinu ni'ë Jesús, en ruzzinu ni'ë len guitsa' ícjanu. Butsaga lonu ni'ë, en gulú'unu ni'ë lë na' rilá' zxixi. ³⁹ Cate' bönni' yudo' fariseo na' nulidzë' Jesús bilé'enë' lë ni, guzá' ládxë'ë, rnnë': "La'tu' náquië' bönni' ni bönni' ru'ë didza' uláz queë' Dios, huéquibe'enë' nuzxi na', en nacxi nácanu nigula ni rigannu Lë', tu' nácanu nigula udá dzaga." ⁴⁰ Ní'irö Jesús gudxë' bönni' fariseo na', rnnë':

—Simón, dë tu le ral-la' guía' li'.

Bubi'ë didza' bönni' na', rnnë':

—Gunná, Bönni' Usedi.

41 Jesú斯 rë' lë':

—Zoë' tu bönni' dë dumí queë', ate' nacu'ë chopë' bönni' tál-lë'ë dumí queë'. Tuë' bönni' na' ral-lë'ë queë' lazxjë' que chopa iz, ate' ia'túie' na' ral-lë'ë queë' lazxjë' que chopa beo'. **42** Tu' cabí dë quégaquië' dumí ulu'guízzjë' lë na' tál-lë'ë queë', que lë ni na' buniti lahuë' iropë' lë na' tál-lë'ë queë'. Gunnátsöca' na'a. ¿Núzxilë' bönni' chopë' ni idxí'irönë' bönni' na' buniti lahuë' légaquië'?

43 Bubi'ë didza' Simón na', rnnë':

—Réquida' neda', bönni' na' rála'rë' queë' dumí, lë na' buniti lahuë'.

Jesú斯 gudxë' lë':

—Le nácasö rnno'.

44 Ní'irö buécjë' Jesú斯, ate' ni' ruyúë'-nu nigula na', rë' Simón:

—¿Naru' rile'enu' nigula ni? Guyázia' lidxu', ate' biti' bennu' quia' nisa quíbida' ni'a, pero nigula ni gulú'unu ni'a nisa ribödxinu, en buzxinu ni'a len guitsa' ícjanu. **45** Biti' butsaga lo' neda', pero cate' bidxíntea' lidxu', biti' ruzóá dxinu nigula ni, butsaga lonu ni'a. **46** Biti' gulú'u icja' le za, pero nigula ni gulú'unu ni'a lë na' rilá' zzixi. **47** Que lë ni na' rea' li', dul-la' zián gubága'nu nigula ni, chiguyú'u yöl-la' runiti lo quéguequi, ate' nadxi'ide'enu neda'. Nu na' Dios runiti lahuë' le láti'do'os, láti'do'os nadxi'i Dios nu na'.

48 Ní'irö Jesú斯 gudxë'-nu nigula na', rnnë':

—Dul-la' gubágu'u chiguyú'u yöl-la' runiti lo que.

49 Yugu' bönni' na' ta'bö'lenë' Jesú斯 tahuë' gula'sí lógaquië' té' luzá'agaquië', ta'nnë':

—¿Nuzxi caz bönni' ni, runiti lotsë' ca' dul-la'?

50 Ní'irö Jesú斯 gudxë'-nu nigula na', rnnë':

—Tu' réajlë'u neda', chibuló' li'. Böaj lidxu', zoa dxí ládxu'u.

8

Yugu' nigula tácalennu Jesús, ta'gú'unu le tahuë'

¹ Gudödi gulaca lë ni, gudé' Jesús gapa nacuá' zián yödzö zxön, en yugu' yödzödo', ate' bené' libán ni', en bë'ë didza' que didza' dxí'a carinná bë'ë Dios, ate' idxínnutë' bönni' usëda queë' dzágagaquië' Lë'. ² Bál-lanu nigula buné' Jesús légacanu dzágagacanu ca' Lë'. Bubéajë' bö' xihui' yú'ugaca légacanu, en bugüé' yugu' yödzöhuë' güí'igüequinu. Nútsa'nu ládjagacanu María, lënu ca' Magdalena, nigula na' bubéajë' gadxi bö' xihui' yú'ugaca lënu. ³ Juana, nigula queë' Chuza, bönni' yu'u lu në'ë le dë lidxe' Herodes, nútsa'nu ca' ládjagacanu, ate' cá'anqueze Susana nútsa'nu ca' légacanu. Ta'gú'unu nigula ni, en ziánrönü ca', le tahuë' Jesús, en yugu' bönni' usëda queë'. Tu'nödzjanu le dë quégacanu.

Rucúdzu'ë didza' Jesús ca naca queë' bönni' guz (Mt. 13:1-9; Mr. 4:1-9)

⁴ Bila'rúaj bönnachi zián yugu' yödzö ni', en bilá'gaca ga na' zoë' Jesús. Cate' bulu'dubë' ga na' zoë', Lë' bucúdzu'ë didza', rë' légaquië':

⁵ —Birúajë' bönni' guz, söjësië' xisedo'. Cate' ni' söjësië', bulu'huöxaj bal-la xisedo' na' ga naca la' nöza, ate' bulu'libi bönnachi léguéqui. Bila'dxinba' ca' biguínnido', en gulé'ajba' xisedo' na' dzö'ö la' nöza. ⁶ Bulu'huöxaj ia'bal-la xisedo' na' lu yu ga rö'ö guiøj. Cate' gula'lén xisedo' na', la' gula'bídxitë

tu' cabí nalupa' yu na'. ⁷ Bulu'huöxaj ia'bal-la xisedo' na' ga bulu'lén lubá yötsi'. Tsözxön gula'zxón lubá yötsi' na', en xisedo' na', ate' lubá yötsi' na'bila'röli xisedo' na'gula'lén, en gulún ditaj léguequi. ⁸ Bulu'huöxaj ia'bal-la xisedo' na' ga naca luyú bëbu. Cate' chigula'zxón, bulu'nödzaj. Tu dxigu' na' bunödzaj ia'tú gayuá'térö xisedo' ca'.

Cate' budxi gunnë' caní Jesús, bë'ë zidzaj didza', rnnë':

—¡Nu zoa nagui, en riyöni ral-la' uzë nagui!

Bizz que rucúdzu'ë Jesús didza'

(Mt. 13:10-17; Mr. 4:10-12)

⁹ Ní'irö yugu' bönni' usëda queë' Jesús gula'nábinë' Lë', ta'nnë':

—¿Bizxi sa'yéaj lë na' bucúdzu'u didza'?

¹⁰ Jesús gudxë' légaquië:

—Dios ruzéajni'inë' libí'ili' le nagachi' ca rinná bë'ë Lë', pero ia'zíca'rö bönachi ni, ruí'lena' léguequi didza' le rucúdzu'a didza' para cate' ulu'yüë', biti' ila'lé'enë', en cate' ila'yönnë', biti' ila'yéajni'inë'.

Riguíxjö'ë Jesús le rulu'i le bucúdzu'ë didza'

(Mt. 13:18-23; Mr. 4:13-20)

¹¹ Gunnë' ca' Jesús:

—Caní naca le rulu'i lë na' bucúdzu'a didza', Xisedo' na' naca xtídzë'ë Dios. ¹² Xisedo' na' bulu'huöxaj la' nöza tu'lui'i ca raca quégaca bönni' ta'yönnë' didza' na', pero la' za'të tu' xihui', en rigúa didza' na' bidxín lu icja ládx'i do'gaquië', para cabí ila'yéajlë'ë, en cabí ulu'lë'. ¹³ Xisedo' na' bulu'huöxaj lu yu ga rö'ö guiøj tu'lui'i ca raca quégaquië' bönni' ta'yönnë' didza' na', en tu'dzéjanë'

ta'zi'ë le, pero nácagaquië' ca xisedo' na' biti' ben lui. Tu chí'isö ta'yéajlé'ë, tu' ridxín le rizi' bë' légaquië', ate' la' tu'huöté ládzi'gaquië'. ¹⁴ Xisedo' na' bulu'huoxaj ga bulu'lén lubá yötsi' tu'lu'i ca raca quégäquië' bönni' ta'yönnë' didza' na', en cate' chibila'yönnë', yugu' le tu'i ládzi'gaquië' yödzölió ni, en yugu' yöl-la' tsahui' que, en yugu' le ta'yaza ládzi'gaquië' le taca ni, tun nigui légaquië', ate' biti' run dxin didza' na' lu icja ládzi'do'gaquië'. ¹⁵ Xisedo' na' bulu'huoxaj ga naca luyú bëbu tu'lu'i ca raca quégäquië' bönni', idú ládzi'gaquië' ta'yönnë' didza' na', en ta'gu'ë tsutsu le lu icja ládzi'do'gaquië', ate' lu yöl-la' riböza zxön ladxi' tunë' ca rnna didza' na'.

*Rucúdzu'ë didza' Jesús que le rigú'u bení' lídxiru'
(Mt. 4:21-25)*

¹⁶ Gunnë' ca' Jesús:

—Cuntu nu bönni' ruquélë'ë guí', ate' la' rudúsi'té' le guí'ina, en biti' rigu'ë le zxani le ráti'në', pero ruzóë' le xilataj ga naca liná' lu yu'u, ate' nupa ila'yaza ni' ulu'zí' xibé guí' na'. ¹⁷ Ilá' lahui yúgu'té le nagachi', ate' gaca bë', ate' irúaj ga liná' yúgu'té le raca balándo'os.

¹⁸ 'Que lë ni na', buli'zë nágali', tu' huadéli'në' ia'lati' bönni' ruzóë' tsutsu icja ládzi'da'ahuë' didza' riyönnë', en huazi'rë' xtídzë'ë Dios, pero bönni' biti' ruzóë' tsutsu icja ládzi'da'ahuë' didza' riyönnë', huadúa didza' na' biyönnë'.

*Xinë'ë Jesús, en yugu' bönni' böchë'ë
(Mt. 12:46-50; Mr. 3:31-35)*

¹⁹ Ní'irö bila'dxinë' xinë'ë Jesús, en yugu' bönni' böchë'ë ga na' zoë', pero biti' guca ila'bíguë'ë gala'

ga zoë' tu' nacuá' böñachi zián ni'. ²⁰ Zoa ni' nu bulidza Jesús, rnna:

—Nacu'ë xinó'o, en yugu' bönni' böchu'u lö'a. Të'ënnë' iluí'ilenë' Li' didza'.

²¹ *Bubi'ë didza' Jesús, rë' légaquië':*

—Nupa ni ta'yöni xtídzë'ë Dios, en tun ca rnna, bönni' ni nácagaquië' ca xiná' caza', en yugu' bönni' böchi' caza'.

Jesús ribequi dxíe' bö' budunu'

(Mt. 8:23-27; Mr. 4:35-41)

²² Tu dza gurenë' Jesús tu lë'e bárcodo', dzágagaquië' bönni' usëda queë' Lë', ate' Jesús rë' légaquië':

—Udöditsöca'ru' ia'tsölá'a nísado' ni.

Ní'irö söjácatë'. ²³ Tsanni ni' ta'dödë' lu nísado' na', rásië' Jesús. Ní'irö gusí lo recja bö' budunu' lu nísado' na', ate' chirequi huötaj bárcodo' na' zxan nisa, en zoa bönadxi quégäquië'. ²⁴ Ní'irö gula'biguë'ë ga dë' Jesús, en bulu'subanë' Lë', ta'nnë':

—¡Bönni' Usedi! ¡Bönni' Usedi! ¡Chirequi huötjaru' lu nisa!

Cate' bubanë' Jesús, bulidzë' bö' na' recja, en nisa na' riyasa ridxíada', ate' guzóa dxi bö' na' recja, en gurö'ö dxi lu nísado' na'. ²⁵ Ní'irö Jesús gudxe' yugu' bönni' usëda queë', rnnë':

—¿Naru' cabí réajlë'ëli' Dios?

Guládxinë' légaquië', en tu'báninë'. Gulë luzá'agaquië' tué' ia'tué':

—¿Nuzxi caz bönni' ni? Rinná bé'enë' bö' recja, en nísado', ate' tun ca rnna xtídzë'ë.

Tu bönni' yödzö Gadara yu'u lë' bö' xihui'

(Mt. 8:28-34; Mr. 5:1-20)

26 Ní'irö bila'dxinë' lu xiyúgaquië' bönni' Gadara, le dë ia'tsölá'a nísado' ca dödilö ga dë luyú Galilea.

27 Cate' birúajë' Jesús lë'e bárcodo' na' ga naca lu yu na', dutsguië' tu bönni' yödzö na' Lë'. Chigudzé yu'u bö' xihui' lë', ate' bíti'rö rácuë' lari', en bíti'rö rizóë' lu yu'u, pero nun xilatjë' lu zxan bulóaj ga nádjagaca yeru ba. **28** Cate' bönni' na' yu'u bö' xihui' lë' bilé'enë' Jesús, gurödxi'ë zidzaj, ate' buzóa zxibë' lahuë' Jesús, en bë'ë zidzaj didza', rnnë':

—¿Bizxi ral-la'a quiu', Jesús, Zxi'inë' Dios nayépisétërë? Ráta'yua' lo' cabí usaca' zi'u neda'.

29 Caní gunnë' tu' chigunná bé'enë' Jesús bö' xihui' na' urúaj lu bönni' na'. Zián luzuí zí'atëlö burixi butúluda' bö' xihui' na' bönni' na', ate' yugu' bönni' yödzö ni' gulúgui'ë lë' du guíë, en bulu'xéjanë' bregui' guíë ni'a né'ë, pero blë'ë yugu' du guíë na', ate' bö' xihui' na' yu'u lë' guchë' lë' lu lataj cá'asö. **30** Ní'irö Jesús gunábinë' bö' xihui' na', rnnë':

—¿Bi leu'?

Bö' xihui' na' gudxi Lë':

—Le Zián lea'.

Caní gunná tu' yú'ugaca bö' xihui' zián bönni' na'. **31** Ní'irö yugu' bö' xihui' na' guláta'yugaca lahuë' Jesús cabí isöl-lë'ë léguequi lataj chul-la quégaca nupa nátigaca. **32** Nacuá'aba' ca' tu cõ'öba' cuchi zián ta'daba' táguba' lu guí'ado' ni', ate' bö' xihui' na' gula'naba yechi' Jesús gu'ë léguequi lataj tsöjtsú'ugaca cuchi zián na'. Jesús bë'ë léguequi lataj. **33** Bulu'rúaj yugu' bö' xihui' lu bönni' na', en yöjtsú'ugaca cuchi zián na', ate' yöjácaba' cuchi zián na' ga naca tu lë'e guiøj. Yöjbíxigacaba' lu nísado', ate' ni' gula'yépiba' nisa, gulátiba'.

34 Cate' bila'lé'enë' bönni' tu'yúgaquië'-ba' cuchi zián na' ca na' guca quégacaba', guladxi gula'dzöbinë'. Bulu'zxúnnajé' ni', ate' yöjhuöjgaquië' yöjtíxjö'iiguequinë' nupa nacuá' yödzö na', en nupa nacuá' la' guixi' ni'. **35** Níirö bila'rúajë'bönni'yödzö na', yöjyúgaquië'lë na' guca. Cate' bila'dxinë' ga na' zoë' Jesús, bila'lé'enë' bönni' na' gula'yú'u bö' xihui' lë', rö'ë xini'ë Jesús. Nácuë' lari', en dxí'ado' chizóë', ate' guládxinë'. **36** Nupa na' bila'lé'e lë na' guca gula'guíxjö'i légaquië' ca guca, böáquië' bönni' na' gula'yú'u bö' xihui' lë'. **37** Níirö yúgu'të bönachi zián na' quégaca yödzö nabábagaca Gadara na' guláta'yu lahuë' Jesús urúajë' lu xiyúguequi, tu' tádxinë'. Bubenë' Jesús lë'e bárcodo' na', en söhuöjë'. **38** Bönni' na' bulu'rúaj bö' xihui' na' lë' gúta'yuë' lahuë' Jesús gu'ë lë' lataj tséajlenë' Lë' tsözxön. Gunná bé'enë' Jesús lë' ugá'anë' ni', rnneë':

39 —Böaj lidxu'. Yöjtíxjö'i bönachi uládz quiu' yugu' le zxön benë' Dios quiu'.

Böajë' bönni' na' lidxë', ate' buzë' didza' idú lu yödzö ni' ca naca le zxön benë' Jesús queë'.

Jesús ruúnë'-bi' bi'i nigula queë' Jairo enca' nigula na' gudannu lari' nácuë'

(Mt. 9:18-26; Mr. 5:21-43)

40 Cate' budxinë' Jesús ia'tsölá'a nísado' na', bulu'dzeja bönachi zián nacuá' ni' ni'a queë' Lë', tu' ta'böza Lë'. **41** Níirö bidxinë' Jairo ga zoë' Jesús. Náquië' bönni' lo que yu'u ga tu'dubë' bönni' judío, en tu'sëdë' queë' Dios. Biyéchuë' xini'ë Jesús, en gúta'yuë' lahuë' tsejë' lidxë'. **42** Caní benë' tu' zóabi' tubi' bi'i nigula queë', chirequi gátibi'. Nácabi' bi'i

la's dui queë', en yú'ubi' ca chinnu iz. Tsanni ni' sa'yéajë' Jesús, sönögaca tu'quirö bönachi zián Lë'.

43 Nútsa'nu tu nigula ladaj bönachi zián na', chiguca chinnu iz rigui'i rizáca'nu. Biti' ruhui'i rön queënu que huë' quégaca cázanu nigula, ate' chibutönu dëra le dë queënu, riguízxjanu nupa tu'ún bönachi, pero biti' guca nu bönni' únë'-nu.
44 Gubíga'nu zaca' cídzulë' Jesús, en gudannu rui'i lari' nácuë', ate' la' buí'itë huë' rön queënu.

45 Ní'irö Jesús gunábinë' nupa nacuá' ni', rnnë':
 —¿Nuzxi na' gudán neda?

Gula'dá'bagui'ë yúgu'të'. Ní'irö Pedro, en nupa nacuá'len lë' gulë' Lë', ta'nnë':

—Bönni' Usedi, nacuá' bönachi zián ni, tu'quirö Li', en tu'dxiga' Li', ate' ¿rnnatso': “¿Nuzxi na' gudán neda?”

46 Ní'irö Jesús gunnë':
 —Zoa nu gudán neda', tu' gúquibe'eda' birúaj yölla' huáca neda' le ruún bönachi.

47 Cate' réquibe'enu nigula na' nözinë' Jesús le bennu, ní'irö guzxízinu. Biyéchunu xini'ë Jesús, en gudíxjöi'nu Lë' lógaca bönachi zián na' bizx que na' gudannu lari' nácuë', en ca na' guca, la' böácatënu.

48 Ní'irö Jesús gudxë'-nu:

—Nigúlado', tu' réajlé'u neda' chiböácu'. Böaj lidxu', zoa dxí ládxu'u.

49 Cate' ni' ru'ë Jesús didza' ni, bidxinë' tu bönni' ni', zë'ë lidxë' bönni' lo na' que yu'u ga tu'dubë' tu'sëdë' queë' Dios, ate' gudxë' bönni' lo na':

—Chigútibi' bi'i nigúlado' quiu'. Bíti'rö upízxjanu'-në' Bönni' Usedi.

50 Cate' biyönnë' Jesús lë ni, bubi'ë didza', rë' bönni' lo na':

—Biti' gádxinu'. Guyéajlë'ësö Dios. Huöácabi' bi'i nigúlado' quiu'.

⁵¹ Cate' guyázië' Jesùs yu'u na', biti' bë'ë lataj nu tsázalen Lë', pero légacasë' Pedro, en Jacobo, en Juan, enca' xuz xiná'abi' nigúlado' na'. ⁵² Ta'bödxi nupa nacuá' ni'. Ta'bödxi yeché'ë ni'a queëbi' bi'i nigúlado' na', ate' Jesùs rë' légaquië', rnnë':

—Biti'rö cödxili'. Biti' nátibi' nigúlado' ni. Rásisibi'.

⁵³ Bulu'titjë' Lë' tu' nözguequinë' chinátibi'. ⁵⁴ Ní'irö gudélë'ë Jesùs ná'abi', en bë'ë zidzaj didza', rnnë':

—Bi'i nigúlado', guyaschi.

⁵⁵ Ní'irö bu'u bö' naca cázabi', bubanbi', ate' la' guyásatëbi'. Jesùs gunná bé'enë' légaquië' ilu'ë le gágubi'. ⁵⁶ Bulu'báninë' xuz xiná'abi', pero Jesùs gunná bé'enë' légaquië' cuntu nu ilë' ca na' guca.

9

Risöl-lë'ë Jesùs bönni' usëda queë' tsöjéngaquië' libán

(Mt. 10:5-15; Mr. 6:7-13)

¹ Ní'irö butubë' Jesùs idxinnutë' bönni' usëda queë', ate' budödë' lu ná'agaquië' yöl-la' huáca, en yöl-la' unná bë' para ulu'béajë' bö' xihui' yú'ugaca bönachi, en ulu'únë' nupa te'e. ² Gusöl-lë'ë légaquië' tsöjéngaquië' libán ca rinná bë'ë Dios, en tsöjhuéngaquië' nupa te'e. ³ Jesùs gudxë' légaquië':

—Biti' bi guá'ali' para la' nöza, calëga xiyágado', en calëga yöoxaj, en calëga yöta, en calëga dumí, en biti' ixóa yenli' chopalari'. ⁴ Bítitës yu'u ga tsú'uli', guli'sóa ni' cate' uzá'aröli' yödzö na'. ⁵ Gátitës ga

biti' ilún böñachi libí'ili' bal, buli'rúaj yödzö na', en guli'cuíbi bëchtö da' lë'e lábali', le ului'i légaquië' nagá'ana xíguia' nabága'gaquië'.

⁶ Ní'irö bila'rúajë' bönni' usëda queë' na'. Gula'dödë' yúgu'të yödzödo', tunë' libán que didza' dxí'a, en tu'únë' nupa te'e yúgu'të lu yödzö na'.

*Ca gútië' Juan, bönni' buquilë' böñachi nisa
(Mt. 14:1-12; Mr. 6:14-29)*

⁷ Biyönnë' Herodes, bönni' rinná bë'ë, ca naca yúgu'të le runë' Jesús, ate' gurö'ë böñiga, tu' ta'nná böñachi:

—Juan na' chibubanë' lu yöl-la' guti.

⁸ Ia'bal-lë' ta'nnë':

—Chibulë'ë Elías, bönni' na' bë'ë didza' uláz queë' Dios.

Ia'bal-lë' ta'nnë':

—Chibubanë' tu bönni' bítsë'ë yugu' bönni' gulu'ë didza' uláz queë' Dios dza ni'te.

⁹ Herodes na' gunnë':

—Juan na' burixa' yenë'. ¿Nuzxi caz bönni' ni, riyyonda' queë' runë' yugu' lë ni?

Rizóa ribö'ë Herodes ilé'enë' Jesús.

*Rugahuë' Jesús chi-un gayuá' böñachi
(Mt. 14:13-21; Mr. 6:30-44; Jn. 6:1-14)*

¹⁰ Cate' bulu'dxinë' bönni' gubáz nasö'l-lë'ë Jesús ga zoë' Lë', bulu'siyönnë' Lë' yúgu'të le gulunë'. Ní'irö guché'ë Jesús légaquië' quez. Yójáquië' tu lataj cá'asö lu xiyú yödzö Betsaida. ¹¹ Cate' chinöziguequi böñachi lë ni, yöjnóguequi Lë', ate' Jesús benë' léguequi bal, en bë'lenë' léguequi didza' ca rinná bë'ë Dios, ate' bunë' nupa te'e.

12 Cate' chizá' ral-la dza na', idxínnutë' bönni' gubáz queë' Jesús gula'bíguë'ë ga zoë', en të' Lë':

—Busöl-la' bönachi ni tsöjaca gapa dë yödzödo', en gapa dë yú'udo' idú gásibi'ilö para tsöjtíljagaquië' gapa ulu'gá'anë', en bi ilahuë', tu' naca lataj cá'asö ga ni zóaru'.

13 Ní'irö Jesús rë' légaquië':

—Guli'gu'ë libí'ili' le ilahuë'.

Të' Lë':

—Gáyu'sö yöta xtílado' dë, en chópasöba' böla dëba' queëtu', o ¿naru' huayéajtsatu' tsöjö'öutu' le ilágugaca bönachi zián ni?

14 Nacu'ë ca chi-un gáyu'ë bönni' ga na'. Ní'irö Jesús gudxë' yugu' bönni' usëda queë', rnnë':

—Guli'gún ga ila'bö'ë tu cö' huéajgaquië', ilaca ca chi-un huéajgaquië'.

15 Caní gulunë', ate' gula'bö'ë yúgu'të'. **16** Ní'irö gudélë'ë Jesús gayu' yöta xtila na', en chópaba' böla na', ate' guchisa lahuë' ruyúë' lúzxiba, en rë' Dios: "Xclenu'." Ní'irö buzxuzxjë' léguequi, en bë'ë quégaquië' bönni' usëda queë' para ulu'cu'ë lögaca bönachi na'. **17** Gulahuë' yúgu'të', en bulu'huöljanë'. Gudödi na' bulu'tubë' yugu' bizzaj bugá'ana, ate' bulu'líë' idú chinnu ga'böra.

Rnnë' Pedro Jesús náquië' Cristo

(Mt. 16:13-19; Mr. 8:27-29)

18 Tu dza tsanni ni' zoë' quez Jesús, rulidzë' Dios, bila'dxinë' bönni' usëda queë' ga zoë', ate' gunábinë' légaquië', rnnë':

—¿Nuzxi ta'nná bönachi naca' neda'?

19 Bulu'bi'ë didza', ta'nnë':

—Ta'nná bal-la böñachi nacu' Juan, bönni' buquilë' böñachi nisa. Ta'nná ia'bal-lë' nacu' Elías, ate' ta'nná ia'bal-lë' nacu' tu bönni' bítsë'ë yugu' bönni' gulu'ë didza' uláz queë' Dios dza ni'te, en nubanë' lu yöl-la' guti.

20 Ní'irö Jesúś gunábinë' légaquië', rnnë':

—Názxi libí'ili', ¿nuzxi rnnali' naca'?

Bubi'ë didza' Pedro, rnnë':

—Nacu' Cristo nasö'l-lë'ë Dios.

Riguíxjö'ë Jesúś ca si' ilútië' Lë'

(Mt. 16:20-28; Mr. 8:30-9:1)

21 Ní'irö Jesúś gúxdidë'ë légaquië', en gunná bé'enë' légaquië' cuntu nu ilé' Nu náquië' Lë'.

22 Ní'irö rë' légaquië':

—Run bayudxi qui'i saca'a neda', Bönni' Guljë' Bönachi, zián le gaca quia'. Ulu'cá'anë' neda' cá'asö yugu' bönni' gula tu'zéajni'inë', en yugu' bixúz unná bë', en yugu' bönni' yudo' usedi. Ilútië' neda', pero dza tsonna dza Dios usubanë' neda' lu yöl-la' guti.

23 Gudxë' ca' yúgu'të':

—Channö rë'ënë' nu bönni' të'ë neda', ral-la' uzóë' tsólá'alö le dë queë', en gáquië' ca tu bönni' sa'yéajë' söjtë'ë le'e yaga cruz, ate' ní'irö gaca të'ë neda'. **24** Núti'tës bönni' ruí'i ládxë'ë gun chi'ë yöl-la' na'bán queë', unítië' le, pero channö unítië' yöl-la' na'bán queë' tu' dë'ë neda', bönni' ni gata' yöl-la' na'bán idú queë'. **25** Biti' bi uzi'ë xibé tu bönni' channö utubë' queë' yúgu'të le dë yödzölió ni, pero unítië' tsaz yöl-la' na'bán queë'. **26** Nu bönni' rutuí'inë' neda', en rutuí'inë' ca' xtídza'a, lësca' neda', Bönni' Guljë' Bönachi, utuí'ida' bönni' na' cate' huöda' idinná bë'a, dzágagaca neda' yöl-la'

zxön queë' Xuza', en yöl-la' zxön quégaquië' gubáz lá'ayi queë' Dios. ²⁷ Le nácatë rea' libí'ili', nacuá' bal-lé' bönni' ni biti' ilátië' cate' ila'lé'erönë' dza idinná bë'ë Dios.

*Ridzá' ca riná' lahuë' Jesús
(Mt. 17:1-8; Mr. 9:2-8)*

²⁸ Cate' bizá'a xunu' gubidza gudödi bë'ë Jesús yugu' didza' ni, ní'irö guchë'ë Pedro, en Juan, en Jacobo, ate' gurenë' tu lu guí'ado', ga na' bulidzë' Dios. ²⁹ Tsanni ni' ruí'ilenë' Dios didza', bidzá' ca riná' lahuë', ate' böáca chiguíchido'os lari' nácuë', en guyëpi yösa bení'. ³⁰ Ní'irö bulu'lui'i lógaquië' chopë' bönni' ga zoë' Lë' tuí'ilenë' Lë' didza'. Nácaquaüië' Moisés, en Elías. ³¹ Chopë' ni gula'yepë' yösa bení', ate' tuí'ilenë' Jesús didza' ca si' uzé'ë yödzölió ni, gátië'lu yödzö Jerusalén. ³² Sal-la' chirácada' ilásie' Pedro, en nupa nacuá'len lë', bayudxi gula'ná'asë', ate' bila'lé'enë' yöl-la' bení' queë' Jesús, en chopë' na' nacuá'lenë' Lë'. ³³ Cate' bulu'zé'ë chopë' na' ga na' zoë' Jesús, ní'irö Pedro gudxë' Lë':

—Bönni' Usedi, dxi'a naca zóaru' ni. Gúntsöca'tu' tsonna yu'u lága'do', tu quiu', ia'tú queë' Moisés, en ia'tú queë' Elías.

Biti' réquibe'enë' Pedro bi na' rnñë'. ³⁴ Tsanni ni' ru'ë didza' ni, la' gurö'ötë böaj le bugacu légaquië', ate' guládxinë' tu' nacu'ë lu böaj na'. ³⁵ Ní'irö biyön chi'i Nu rui'i didza' lu böaj na', rnna:

—Bönni' ni náquië' Zxí'ina'. Nadxí'ida' Lë'. Buli'zé' nágali' didza' gu'ë'.

³⁶ Cate' budxi bë' didza' chi'i na', tuzë' Jesús nagá'analenë' légaquië'. Ta'cuá' dxië' bönni' usëda

queë', ate' dza na' cuntu nu gulë' ca naca le bila'lé'enë'.

Ruúnë' Jesús bi'i bönni' yu'u bö' xihui' lëbi'
(Mt. 17:14-21; Mr. 9:14-29)

³⁷ Cate' za' rení' ia'tú dza bulu'huötjë' Jesús, en bönni' na' dzágagaquië' Lë' lu guí'ado' na', ate' bila'rúaj bönachi zián dutsgagaca Jesús. ³⁸ Ní'irö bë'ë zidzaj didza' tu bönni' nútsë'ë ladaj bönachi zián na'. Bulidzé' Jesús, rnnë':

—Bönni' Usedi, ráta'yua' lo' duyú'-bi' bi'i bönni' quia' tu' nácabi' bi'i la's dui quia'. ³⁹ Yu'u bö' xihui' lëbi' le run ga ribödxi'abi', en ruxízida' lëbi'. Run ga ribía bidxina' zxöna' ruá'abi', en rurixi rutúluda' lëbi', ate' catu caz rusán lëbi'. ⁴⁰ Gúta'yua' lógaquië' bönni' usëda quiu' ulu'béajë' le, pero biti' gula'zéqui'në'.

⁴¹ Bubi'ë didza' Jesús, rnnë':

—Libi'ili', biti' réajlë'ëli', en nachixi ícjali'. ¿Gáca'zte ral-la' sóalena' libí'ili', en guá' ilena' queëli'? Dijuá'a-bi' bi'i bönni' quiu' ni.

⁴² Cate' ni' zá'abi' ribígabí' ga na' zoë' Jesús, burixi butúluda' bö' xihui' na' lëbi'. Jesús gudil-lë' bö' xihui' na', en bunë'-bi' bi'i bönni' na'. Ní'irö bugu'ë-bi' lu në'ë xúzibi'. ⁴³ Bulu'bani yúgu'të bönachi ni' ca naca yöl-la' huáca zxön queë' Dios.

Jesús ru'ë didza' leyúbölö ca si' ila'zönë' Lë'
(Mt. 17:22-23; Mr. 9:30-32)

Tsanni ni' tu'bani yúgu'të bönachi ca naca le zxön runë' Jesús, Lë' gudxe'ë yugu' bönni' usëda queë', ⁴⁴ rnnë':

—Guli'cú'u icja nágali' didza' ni, tu' si' ulu'dödë' neda', Bönni' Guljë' Bönachi, lu ná'agaca bönachi.

45 Biti' gula'yéajni'inë' bönni' usëda queë' didza' ni, tu' cabí ruí'inë' Dios légaquië' lataj ila'yéajni'inë', pero biti' bulu'rúguinë' ila'nábinë' Jesús ca naca didza' ni.

*Nu naca lo
(Mt. 18:1-5; Mr. 9:33-37)*

46 Ní'irö gula'sí lógaquië' bönni' usëda queë' Jesús tu'ë didza'. Ta'nábini luzá'agaquië' tuë' ia'túë' núzxilë' gáquië' lo. **47** Réquibe'enë' Jesús le ta'zá' ládxí'gaquië', ate' gudélë'ë-bí' tubi' bí'ido', en buzóë'-bi' cuitë'. **48** Ní'irö rë' légaquië':

—Núti'tës bönni' gunë' bal tu bí'ido' caní tu' néquibi' quia' neda', neda' caz gunë' bal, ate' nu bönni' gunë' neda' bal, gunë' ca' bal Xuza' nasöllë'ë neda'. Que lë ni na' bönni' nútsë'ë ládjali' nácarë' nöxaj ladxi', bönni' ni náquië' lo.

*Nu biti' ridá'baga' rë'u, rácalen rë'u
(Mr. 9:38-40)*

49 Ní'irö Juan bulidzë' Jesús, rnnë':

—Bönni' Usedi, bilé'etu'-në' tu bönni' rugunë' dxin Lo' rubéajë' bö' xihui', ate' gunná bé'etu'-në' tu' cabí dë'ë rë'u.

50 Jesús rë' lë':

—Biti' inná bé'eli'-në', tu' rácalen rë'u nu biti' ridá'baga' rë'u.

Jesús ridil-lë' Jacobo, en Juan

51 Cate' chizá' gal-la' dza ral-la' gátië' Jesús, en huëpë'yehua' yubá, benë' bayudxi tsejë' Jerusalén.

52 Gusöl-lë'ë yugu' bönni' gubáz queë' ila'nöruë' ca Lë', ate' yójáquië' tu yödzödo' quégaca bönachi Samaria para tsöjpá'agaquië' ga ugá'anë' Jesús tu yëla. **53** Yugu' bönni' yödzö na' biti' gulunë' Jesús

bal tu' chinaca queë' sa'yéajë' Jerusalén. **54** Cate' Jacobo, en Juan, bönni' usëda queë' Jesús, bila'lé'enë' lä ni, té' Lë':

—Xan, ¿naru' inábatsöca'tu' huötaj gui' le za' yehua' yubá, en usuniti légaquië', guntu' ca na' benë' Elías?

55 Buécjë' Jesús, en gudil-lë' légaquië', rnnë':

—Biti' nözili' bizxi bö' dzágui libí'ili'. **56** Bida' ni neda', Bönni' Guljë' Bönachi, calëga para usunítia' yöl-la' na'bán quégaca bönachi, pero bida' dusölá' bönachi.

Ní'irö yójáquië' yödzö yúbölö.

Nupa të'ëni tsöjácalen Jesús

(Mt. 8:19-22)

57 Tsanni ni' yú'ugaquië' nöza Jesús, en yugu' bönni' dá'gaquië' Lë', bidxinë' tu bönni' yödzö Jerusalén, en rë' Jesús:

—Xan, ré'ënda' sá'lena' Li' gáti'tës ga tseju'.

58 Jesús rë' lë':

—Yúgu' böza', nacuá' zxan bulóaj quégacaba', ate' biguínnido', dxíagaca xcá'agacaba', pero neda', Bönni' Guljë' Bönachi, biti' dë quia' ga gáta'a uzi' ládxa'a.

59 Ní'irö Jesús gudxë' tu bönni' yúbölö, rnnë':

—Gudá' neda'.

Bönni' ni gudxë' Lë':

—Xan, benna neda' lataj huöja' lidxa' ga idxinrö dza chibucách'a-në' xuza'.

60 Jesús gudxë' lë':

—Bë' lataj bönni' chizóa ilátië' ulu'cáchë'ë nupa chinati quégäquië', pero li', guyéaj, yójén libán ca inná bë'ë Dios.

61 Ní'irö bidxinë' ia'túë' ca', en rë' Jesús:

—Xan, rë'ënda' sá'lena' Li', pero benna neda' lataj tseja' tsöjzégacada'-në' didza' di'a dza quia'.

62 Jesú斯 gudxé' lë':

—Núti'tës bönni' ruí'i ládxë'ë le raca yödzölio náquië' ca tu bönni' rugá'anë'-ba' bëdxi, en ruyúë' zaca' cùdzu'lë'. Nu run caní biti' naca lesaca' tsaza ga rinná bë'ë Dios.

10

Risöl-lë'ë Jesú斯 tsónnalalaj yu' chië' bönni' tsöjéngäquië' libán

1 Gudödi gulaca yugu' lë ni, guröë' Xanru' ia'tsónnalalaj yu' chië' bönni' usëda queë', ate' gusöllë' légaquië' chopá huéajgaquië' para ila'nöruë' ca Lë', en tsöjáquië' yúgu'të yödzö, en yödzödo' gapa chizóa töde' Lë'. **2** Gudxé' légaquië':

—Le nácatë, dëda' dxin quia', le naca ca tu la' yëla zxön ga nu tsöjlapa', pero nabábasö huen dxin quia' nacuá'. Que lë ni na', guli'gáta'yu lahuë' Dios, náquië' Xan la' yëla na', isöl-lë'ë yugu' huen dxin ga naca la' yëla queë'. **3** Guli'tséaj na'a. Buli'yútsöca', neda' risöl-la'a libí'ili', nácali' ca yugu' bö'cu' zxila' söjácaba' lágdagacaba' bö'cu' guí'a sínia'. **4** Biti' guá'ali' yöxa j dumí, en calëga buzudi yöta, en biti' guá'ali' ia'tú cö' xiráchuli', en biti' tseli' para gü'ilenli' böñachi didza' gapa naca la' nöza. **5** Gáti'tës yu'u ga tsú'uli', innali': “Le ribequi dxi ladxi' gaca quégaca böñachi nacuá' yu'u ni.” **6** Channö zoa ni' nu bönni' si'ë yöl-la' ribequi dxi ladxi', ugá'analen lë' le ribequi dxi ladxi' na' inábali', pero channö cabí zoa ni' nu bönni' caní, ugá'analen libí'ili' le ribequi dxi ladxi'

na' inábali'. ⁷ Guli'gá'ana yu'u ga na' tsú'uli', en guli'gui'aj guli'gagu bi ilunné' queëli', tu' udzöli quéziné' bönni' huen dxin le gahuë'. Biti' tódili' yu'u yu'u. ⁸ Gáti'tës yödzö ga tsú'uli', ate' ilún libí'ili' bal, guli'gagu le ulu'cu'ë loli'. ⁹ Buli'ún nupa te'e nacuá' yödzö na', en guli'guië léguequi: "Chibidxín le rinná bë'ë Dios ga zóali'." ¹⁰ Gáti'tës yödzö ga tsú'uli', channö cabí ilún libí'ili' bal, guli'rúaj, tsöjsóali' la' nöza que yödzö na', en innali': ¹¹ "Bëchtö que ládzali' le da' lë'e lábatu' ruquínnajtu', le rulu'i nabága'li' xíguia', pero ral-la' inözili' lë ni, chibidxín le rinná bë'ë Dios ga zóali'." ¹² Neda' rea' libí'ili', cate' idxín dza ichúguië' Dios quégaca böñachi, ila'gui'i ila'zaca'rö böñachi yödzö ni' ca ila'gui'i ila'zaca' böñachi yödzö Sodoma, nupa ni' busunítië' Dios.

*Le gaca quégaca nupa biti' ulu'bí'i ládxí'gaca
(Mt. 11:20-24)*

¹³ Gunnë' ca' Jesús:

—Bica' bayechi' libí'ili', böñachi yödzö Corazín. Bica' bayechi' libí'ili', böñachi yödzö Betsaida. La'tu' gulaca lu yödzö Tiro, en lu yödzö Sidón yugu' yöl-la' huáca rubani ca yugu' le bena' ga zóali', dza ni'te ulu'bí'i ládxí'gaquië' bönni' ni', ate' ilácuë' lari' cá'assö, en ila'gu'ë dö ícjagaquië', le ulu'igaca chibulu'bí'i ládxí'gaquië'. ¹⁴ Que lë ni na', cate' idxín dza ichúguië' Dios quégaca böñachi, qui'i sáca'röli' ca ila'gui'i ila'záquië' bönni' yödz Tiro, en yödz Sidón. ¹⁵ Libí'ili', böñachi Capernaum. Réquili' tsázali' yehua' yubá. Huötjali' tsöjtsázali' lataj chul-la quégaca nupa nátigaca.

16 Ní'irö Jesúś gudxë' yugu' bönni' usëda queë', rnnë':

—Nu ruzë nagui libíili', ruzë nagui ca' neda', ate' nu rucá'ana libíili' cá'asö, rucá'ana ca' neda' cá'asö, en nu rucá'ana neda' cá'asö, rucá'ana ca' cá'asö Xuza', nasö'l-lë'ë neda'.

Bönni' yöjéngaquië' libán tu'dxinë' ga zoë' Jesúś

17 Cate' tsónnalalaj yu' chië' bönni' na' gusöl-lë'ë Jesúś bulu'dxinë' ga zoë' Lë', bönni' na' yöjéngaquië' libán, ta'nnë':

—Xan, tun bö' xihui' ca rnнату' cate' ruguntu' dxin Lo'.

18 Jesúś gudxë' légaquië':

—Neda' bilé'eda' Satanás tu' xihui', gubixi zxan lúzxiba ca run yösa, le riyaza luyú. **19** Buli'yútsöca', neda' nudöda' lu ná'ali' yöl-la' unná bë' para gaca sóngacali'-ba' bëla sínia', en xöjnö', en biti' bi gaca queëli', ate' ucúl-lali' yöl-la' unná bë' que tu' xihui', nu biti' rilé'e rë'u dxi'a. **20** Na'a, buli'dzeja, calégasö tu' tun bö' xihui' ca rnнali', pero tu' nuzúajgaca lali' lu guichi ni' yehua' yubá.

Rudzéjanë' Jesúś

(Mt. 11:25-27; 13:16-17)

21 La' ní'isö rudzéjanë' Jesúś, dzáguië' Dios Bö' Lá'ayi Lë', rnnë':

—Rigu'a Li' yöl-la' ba, Xuza', nacu' Xani yehua' yubá, en Xani luyú ni, tu' bucáchu'u yugu' lë ni lógaquië' bönni' táquië' yenni', en bönni' ta'yéajni'inë', pero bului'iguequinu'-bi' bíido' ca naca. ¡Ca' gaca, Xuza', tu' caní guyaza ládxu'u!

22 Ní'irö gunnë':

—Yúgu'té budödë' Xuza' lu na'a. Cuntu nu bönni' nözinë' Nu náquië' Zxí'inë' Dios, pero tuzë' Dios Xuz nözinë', ate' cuntu nu nözi Nu náquië' Dios Xuz, pero tuzë' Zxí'inë' nözinë', ate' inözigaca ca' nupa na' Zxí'inë' rë'ënë' ulu'iñë' léguequi Xuzë'.

²³ Ní'irö Jesúś buyúë' yugu' bönni' usëda queë', en rë' légaquïë':

—Bica' bágaca nupa ta'lé'e le rilé'eli' libí'ili', ²⁴ tu' rea' libí'ili': Zián bönni' gulu'ë didza' uláz queë' Dios, enca' bönni' gula'nná bë'ë, gulé'ënnë' ila'lé'enë' le rilé'eli', pero biti' bila'lé'enë' le. Gulé'ënnë' ila'yönnë' le riyónili', pero biti' bila'yönnë' le.

Tu bönni' Samaria, bönni' tsahui'

²⁵ Ní'irö guyasë' tu bönni' yudo' usedi, en para si' bë'ë Jesúś, gunábinë' Lë', rnnë':

—Bönni' Usedi, ¿bizxi ral-la' guna' para idéli'da' yöl-la' na'bán idú?

²⁶ Jesúś rë' lë':

—¿Bizxi caz nazúaj lu guichi lu xibá queë' Moisés? ¿Nacxi rusaca' quiu' lë na' rulabu'?

²⁷ Bubi'ë didza' bönni' na', rnnë':

—Caní rnna: “Idxí'etu' Xanu' Dios idú ládxu'u, en len idú icja ládxido'o, en len idú yöl-la' run quiu', en len idú yöl-la' réajni'i quiu', ate' idxí'etu' bönni' luzó'o ca nadxi'i cuinu'.”

²⁸ Jesúś rë' lë':

—Dxi'ado' bubiu' didza'. Ben caní, ate' gata' quiu' yöl-la' na'bán na'.

²⁹ Tu' gú'unne' bönni' na' ubéaj dxi'a cuinë', rë' Jesúś:

—¿Nuzxi na' bönni' luzá'a?

30 Bubi'ë didza' Jesús, rë' lë':

—Buzé'ë tu bönni' Jerusalén, rudínnië', sa'yéajë' yödzö Jericó. La' nöza ni' gula'zönë' gubán lë'. Gula'gúe' lari' nácuë', en gulunë' lë' huë'. Ní'irö bulu'zé'ë ni', en nucá'anagaquië' lë', chirati cazë'.

31 Ní'irö gudödë' tu bixúz la' nöza ni'. Cate' bilé'enë' bönni' huë' na', tsölá'alö gudödë'. **32** Gudödë' ca' ni' tu bönni' nababë' zxi'ini xi'soë' Leví, yugu' bönni' na' tunë' dxin que yudo'. Cate' bilé'enë' lë', tsöla'alö ca' gudödë'. **33** Lësca' yu'ë tu bönni' Samaria nöza na', ate' bidxinë' gala' ga dë' bönni' huë' na'. Cate' bilé'enë' lë', buéchi' ládxë'ë lë'.

34 Gubígui'ë ga na' dë', ate' gulu'ë le za, en xisi uva nál-la lu huë' queë', ate' buchölinë' le lari'. Ní'irö budxíë' lë' cùdzu'ba' böa' queë', en bu'ë lë' yu'u ga ta'dxinë' bönni' yú'ugaquië' nöza, ate' ni' gudapa chi'ë lë'. **35** Cate' za' rení' ia'tú dza, en chizóa uzé'ë bönni' Samaria na', guléajë' lázxjaru' que chopa dza, le bucá'anë' lu në'ë bönni' xan yu'u na', en rë' lë': "Gudapa chi'ë bönni' ni, en channö utöu' ia'lati' dumí, ubi'a neda' quiu' cate' huöda'."

36 Na'a, ¿nacxi runi li'? ¿Núzzilë' bönni' yonna ni gúquië' bönni' luzé'ë bönni' na' gulu'ë dö' bönni' gubán queë'?

37 Bubi'ë didza' bönni' yudo' usedi na', rë' Jesús:

—Bönni' na' buéchi' ládxë'ë lë'.

Ní'irö Jesús gudxë' lë':

—Guyéaj na'a, yöjén ca' li'.

Le benë' Jesús lídxigacanu Marta, en María

38 Ní'irö bu'ë nöza Jesús, ate' bidxinë' tu yödzödo' ga ni' tu nigula lënu Marta guché'ënu Lë' lídxinu.

39 Marta ni zóanu nigula zxílanu lënu María, ate'

María na' gurö'ötënu ga naca xini'ë Jesús, en ruzë náganu xtídzë'ë. ⁴⁰ Marta na' bubi buguí'nu, zián dxin runnu, ate' gubíga'nu ga na' zoë' Jesús, en rënu Lë':

—Xan, ¿naru' cabí ruí'i ládxí'tso' neda' tu' nucá'anabi' bi'i zxila' ni neda', ate' tuza' runa' dxin? Gudxi-bi' gácalenbi' neda'.

⁴¹ Bubi'ë didza' Jesús, rë'ë-nu:

—Marta, Marta, ruúbi ruguí'ide'enu', en zián le ruí'i ládxu'u runu'. ⁴² Tuz le run bayudxi nu gun, ate' María ni guröbi' lë na' nácatërö dxi'a, ate' lë na' guröbi' biti' udúa queëbi'.

11

*Ca ral-la' ulídzaru'-në' Dios
(Mt. 6:9-15; 7:7-11)*

¹ Tu dza ni' Jesús rulidzë' Dios. Cate' budxi bë'lenë' Dios didza', tuë' bönni' usëda queë' rë' Lë', rnñë'.

—Xan, busedi netu' ulídzatu'-në' Dios güí'ilentu'-në' didza', ca benë' Juan, busédinë' bönni' dá'gaquië' lë'.

² Ni'irö Jesús rë' légaquië':

—Cate' ulídzali'-në' Dios güí'ilenli'-në' didza', guli'ná:

Xuztu', zu' yehua' yubá, gá'ana zxön Lo'.

Gudá inná bë'u.

Gaca ca raza ládxu'u Li' luyú ni, ca na' raca yehua' yubá.

³ Benna le gágutu' na'a dza.

⁴ Buniti lo netu' dul-la' nabága'tu'
ca netu' ca' runiti lotu' nupa tua' dö' queëtu'.
Biti' gu'u lataj si' bë' tu' xihui' netu',

pero busölá netu' lu na' nu ruá' dö'.

⁵ Jesúś rë' ca' légaquië':

—Channö zoë' nu bönni' ládjali', en zoë' böchi' luzë'ë, en channö huidë' ga na' zoë' guluhuëla, ate' ulidzë' lë', innë': "Böcha'a, benna quia' tsonna yöta xtila ⁶ tu' si' bidxinë' quia' böchi' luzá'a, zë'ë zi'tu', pero biti' bi dë le gu'a-në' gahuë'."

⁷ ¿Naru' ubi'ë didza' caní bönni' na' zoë' yu'u, guïë' lë': "Biti' utsó'o neda' tu' chinayayaj yu'u, en chidé lengacabi' bi'i quia' neda', ate' biti' gaca chasa' bi gunna' quiu"? ⁸ Neda' rea' libí'ili': Sal-la' biti' chasë' bi unödzjë' queë' tu' náquië' böchi' luzë'ë, pero chasë', en unödzjë' queë' idutë le riquinnë' para cabirö upízxjanë' lë'. ⁹ Que lë ni na' rea' libí'ili': Guli'naba, ate' Dios gunnë' queëli'. Guli'quilaj, ate' idzöli queëli'. Buli'lidza ra' yu'u, ate' tsalaj queëli'. ¹⁰ Nu rinaba, rizi' que, ate' nu riguilaj, ridzöli que, ate' nu rulidza ra' yu'u, ralaj que.

¹¹ 'Channö zoë' nu bönni' ládjali', en náquië' xuz, ate' channö zxí'inë' inábibi' lë' yöta xtila, ¿naru' unödzjatsë' queëbi' guiój? Channö inábibi' lë' tuba' böla, ¿naru' unödzjatsë' queëbi' bëla? ¹² Channö inábibi' lë' dxita que böra, ¿naru' unödzjatsë' queëbi' xöjnö'? ¹³ Caní naca, nácali' libí'ili' huiá' dö', pero nözili' unödzjali' quégacabi' zxí'inili' le naca dxí'a. Nácatérö löza Xúzili' zoë' yehua' yubá gunnë' queëli' Dios Bö' Lá'ayi, nülöli' inábili' Lë'.

Ta'nnë' runë' dxin Jesúś len yöl-la' huáca que tu' xihui'
 (Mt. 12:22-30; Mr. 3:19-27)

14 Tu dza bubéajë' Jesús bö' xihui' yu'u tu bönni', le run ga biti' raca innë'. Cate' burúaj bö' xihui' na', bë'ë didza' bönni' na' biti' guca innë', ate' bulu'bani bönnachi nacuá' ni'. **15** Bal-la bönnachi nacuá' ni' ta'nná:

—Len yöl-la' huáca que tu' xihui' Beelzebú, xángaca bö' xihui', rubéajë' yugu' bö' xihui' na'.

16 Ia'bal-la bönnachi na' gulë'ëni ila'zí' bë' Jesú, ate' gula'nabi Lë' gunë' tu le gaca bë' le za' yehua' yubá. **17** Réquibe'enë' Jesú le ta'zá' ládx'i'gaquië', ate' rë' légaquië':

—Gáti'tës ga ta'nná be'e bönnachi luzë'eguequi, channö ila'rúaj choplö la' léguequisö bönnachi na', ila'niti. Channö ila'rúaj choplö bönnachi nacuá' tu yu'u, údxí quéguequi. **18** Lësca' caní raca que Satanás, tu' xihui', nazí'i le ca' Beelzebú. Channö ila'rúaj choplö nupa dá'gaca le, ¿nacxi gaca idía' yöl-la' unná bë' que? ¿Rnnátsali' na'a: Len yöl-la' huáca que Beelzebú rubéaja' yugu' bö' xihui'? **19** Channö neda', len yöl-la' huáca que Beelzebú rubéaja' yugu' bö' xihui', ¿nuzxi runna quégaca nupa dá'gaca libíili' yöl-la' huáca tu'béaj yugu' bö' xihui'? Que lë ni na', le tun nupa ni naca bë' nachíxili'. **20** Channö neda', len yöl-la' huáca queeë' Dios rubéajgaca' bö' xihui', le nácatë chibidxín le rinná bë'ë Dios ga zóali'.

21 'Cate' tu bönni' nál-la dë lu në'ë le rudi'inë', en rapa chi'ë lidxë', naca chi'i dërö le dë queë'. **22** Na'a, channö zë'ë ia'tué' bönni' nál-latérë' ca lë', en ucul-lë' lë', ní'irö cuë' yúgu'të le rudi'inë', lë na' ruzxöni ládxë'ë, ate' quísië' le dë queë' bönni' na'.

23 'Nu biti' rácalen neda', ridá'baga' neda'. Nu biti' rutúbilen neda', rusilasi nu na'.

Ca naca que bö' xihui' ruxdín xilataj

(Mt. 12:43-45)

²⁴ Gunné' ca' Jesús:

—Cate' rirúaj bö' xihui' lu bönni', ridá gapa nabídx, riguilaj ga uzí' ladxi'. Channö cabí idzöli que, inná: "Huöja' xilatja' ga ni' birúaja'." ²⁵ Cate' ruxdín ni', röjxaca' bönni' na', náquië' ca tu yu'u chinulúa, en chinabá'a para nu tsöjsóa ni'. ²⁶ Níirö reaj, en röjxí' ia'gadxi bö' xihui', nácagacatérö xi-hui' ca le, ate' ta'yú'u bönni' na'. Na'a, le raca queë' bönni' na' nayáli'térö ca le guca queë' zí'alö.

Le naca bica' ba le naca idú

²⁷ Tsanni ni' ru'ë Jesús didza' ni, tu nigula nútsa'nu ladaj böñachi zián na' bë'ënu zidzaj didza', rnnanu:

—Bica' ba nigula na' biá'anu Li' lë'ënu, en bica' ba ca' luchú'unu ga na' gúdxu'u.

²⁸ Bubi'ë didza' Jesús, gunné':

—Nácagacatérö bica' ba nupa ta'yöni xtídzë'ë Dios, en tun ca rnna.

Ta'nábiné' Jesús guné' le gaca bë' nuzxi náquië'

(Mt. 12:38-42; Mr. 8:12)

²⁹ Tsanni ni' ta'biga' böñachi zián ga zoë' Jesús, gusí lahuë' ru'ë didza', rnne':

—Ta'nába böñachi tuá' dö' ni guna' le gaca bë' ga za' yöl-la' huáca quia', pero biti' bi le gaca bë' ila'lé'enë'. Tuz le gaca bë' ca na' guca queë' Jonás ila'lé'enë'. ³⁰ Ca na' guca queë' Jonás, gúquië' tu le naca bë' lögaca böñachi yödzö Nínive, lësca' caní gaca quia' neda', Bönni' Guljë' Bönachi, gaca' tu le gaca bë' lögaca böñachi dza ni zóaru' na'a. ³¹ Cate' idxín dza ichúguië' Dios quégaca böñachi ila'gu'i

ila'zaca', en uchi'a usöröë' böñachi dza ni zóaru' na'a, Dios uchisë'-nu nigula gunná bé'enu böñachi dza ni'te luyú ni' dë tsölá'a ga ridödi gubidza beo' ziaga, ate' le bennu ulu'i nabága'gaca böñachi ni xíguia', tu' bídanu lënu, birúajnu ga naca zi'tu' para uduzé náganu didza' réajni'i bë'ë Salomón, bönni' gunná bé'enë' böñachi Israel, pero na'a, zoa' neda' ni, en nayépisétéra' ca Salomón na'. ³² Lësca' caní, Dios uchisë' bönni' gula'cu'ë yödzö Nínive cate' idxín dza ichugu bë'ë quégaca böñachi, en uchi'a usöröë' böñachi dza ni zóaru' na'a, ate' le gulunë' ulu'i nabága'gaca böñachi ni xíguia', tu' bulu'bí'i láxi'gaquië' bönni' Nínive cate' bilä'yönnë' libán benë' Jonás, ate' na'a zoa' neda' ni, en nayépisétéra' ca Jonás na'.

*Le rigú'u bení' lu icja láxi'do'oru'
(Mt. 5:15; 6:22-23)*

³³ Gunné' ca' Jesús:

—Cate' nu ruquela' guí', biti' rigú'u le ga nagaichi', en biti' rudusi' le guí'ina, pero ruzóa le xitsá' ga liná', para uzení' quégaca nupa ta'yú'u yu'u na'. ³⁴ Guiój loru' naca ca tu le rigú'u bení' lu icja láxi'do'oru'. Channö guiój lo' naca dxí'a, idúteo' yudzu le naca bení', pero channö naca xihui' guiój lo', idúteo' yudzu le naca chul-la. ³⁵ Ben chi'i cuinu' na'a, para cabí huöáca chul-la lë na' rigú'u bení' lu icja láxi'do'o. ³⁶ Caní naca, channö idúteo' nalísinu' le naca bení', en biti' bi zóalen li' le chul-la, yúgu'të ilé'enu' dxí'a ca raca cate' ruzení' quiu' guí'.

*Jesús ruzégui'ë yugu' bönni' yudo' didza'
(Mt. 23:1-36; Mr. 12:38-40; Lc. 20:45-47)*

³⁷ Cate' budxi bë'ë didza' ni Jesús, tu bönni' yudo' fariseo bulidzë' Lë' para tsöjtágulenë' lë'. Cate' guyázië' Jesús lidxë' bönni' yudo' na', gurö'ë rahuë'. ³⁸ Cate' bönni' yudo' fariseo na' bile'enë' Lë', bubáninë' tu' cabí gudibi në'ë Jesús cate' si' gahuë'. ³⁹ Xanru' rë' lë':

—Libi'ili', bönni' yudo' fariseo, riguibi cuinli' ca riguíbili' láhuilögaca le rë'aji ráhuili', pero lu icja ládxido'oli' ruhuídi'li', en rizá' ládxili' le ruá' dö'. ⁴⁰ Libí'ili', bönni' biti' réajni'ili'. ¿Naru' cabí nözili', Nu ben le zoa láhuisö ben ca' le yu'u lë'elö? ⁴¹ Na'a, guli'gún gun le dë queëli', ate' ní'irö huöáca dxia' yúgu'të le dë queëli'.

⁴² 'Bica' bayechi' libí'ili', bönni' yudo' fariseo. Riguízxjali' que yudo' tu cö' huéaj tu' chi cö' le rizi'ili' que xöhuéaj, en que guixi' ruda, en quégaca guixi' cuando', pero rudödisili' le naca tsahui', en yöl-la' nadxi'i queëli' Dios. Yugu' lë ni run bayudxi gunli', en biti' ucá'analí' ia'zica' lë na' runli'.

⁴³ 'Bica' bayechi' libí'ili', bönni' yudo' fariseo. Rë'ënili' cö'oli' gapa naca lo lu yu'u ga rudúbili' rusédali' queë' Dios, en rë'ënili' ulu'lidza böñachi libí'ili' ba zxön gapa naca láhuilöguequi böñachi.

⁴⁴ 'Bica' bayechi' libí'ili', bönni' yudo' usedi, enca' libí'ili', bönni' yudo' fariseo, bönni' rulu'isö tsahui' cuinli', tu' nácali' ca nácagaca yero ba quégaca nupa nátigaca le cabí nalá'gaca, ate' ta'dá böñachi láhuigaca yero ba na', en biti' téquibe'e.

⁴⁵ Ní'irö bubi'ë didza' tu bönni' yudo' usedi raquië' xibá queë' Moisés. Rë' Jesús:

—Bönni' Usedi, cate' rnno' caní, netu' ca' runu' zi'.

⁴⁶ Jesús rë' lë':

—Bica' bayechi' ca' libí'ili', bönni' yudo' usedi rácali' xibá queë' Moisés, tu' rusubága'gacali' böñachi tu yua' zi'i le cabí gaca nu guá', pero libí'ili' calëga láti'do'os biti' ruláhui'li' le len ná'ali'.

47 'Bica' bayechi' libí'ili', tu' richísali' biquitaj quégaca ba ga nagáchi'gaquië' bönni' gulu'ë didza' uláz queë' Dios, ate' gulútië' xuz xtó'oli' légaquië'. **48** Caní naca, runli' ba nalí runli' tuz le gulunë' xuz xtó'oli' tu' gulútië' xuz xtó'oli' na' légaquië', ate' libí'ili' richísali' biquitaj quégaca ba ga nagáchi'gaquië'.

49 'Que lë ni na', lu yöl-la' réajni'i queë', Dios gunnë' caní: "Isól-la'a queëli' bönni' ilu'ë didza' uláz quia', en yugu' bönni' gubáz quia', ate' yugu' bönni' ni, bal-lë' gútili', en ia'bal-lë' cuia na'li' légaquië'." **50** Caní gunë' Dios tu' uchi'a usöröë' quégaca böñachi dza ni zóaru' na'a, ni'a que rön quégaca yúgu'të bönni' gulu'ë didza' uláz queë', bönni' ni' bëtigaca böñachi légaquië' cate' gusí lo rata' yödzölió, **51** ga gusí lo nu bëti Abel, ga bidxitnë gulútië' Zacarías, bönni' na' gulútië' gatsaj láhui'lö ga dë bucugu lá'ayi ga na' tu'zégui'gaquië'-ba' böa' bëdxido' lahuë' Dios, en ga dë lataj lá'ayi. Que lë ni na', rea' libí'ili', Dios uchúguë' quégaca böñachi dza ni zóaru' na'a, ni'a que rön quégaca yúgu'të bönni' na' gulútië' xuz xtó'oli' légaquië'.

52 'Bica' bayechi' libí'ili', bönni' yudo' usedi, rácali' xibá queë' Moisés. La' libí'isili' dë lu ná'ali' zxí'ini guíë que lataj ga ta'dzöli böñachi yöl-la' réajni'i. Libí'ili' biti' riyázali', ate' ruzágali' xinözigaca nupa té'ëni ila'yaza.

53 Cate' Jesús budxi bë'lenë' légaquië' didza'

ni, bönni' yudo' tu'sédinë', en yugu' bönni' yudo' fariseo gula'léde'enë' Lë', ate' gula'sí lógaquië' ta'naba yúdxide'enë' Lë' ca naca zián le taca, ⁵⁴ en tu'béajë' Lë' didza' para gaca ulu'zéguië' Lë' didza' ni'a que didza' ubi'ë.

12

Rusédinë' Jesús ca naca yöl-la' rulu'i'sö tsahui' cuini

¹ La' dza na' bulu'dubi zián gayuá' bönnachi ga zoë' Jesús ga bidxitx te ta'rölisö luzé'eguequi bönnachi na'. Ní'irö gusí lahuë' Jesús rë' yugu' bönni' usëda queë'cazë', rnnë':

—Guli'gún chi'i cuinli' que le naca ca cúa zi que yöta xtila quégäquië' bönni' yudo' fariseo, le naca yöl-la' rulu'i'sö tsahui' cuini quégäquië'. ² Biti' bi dë le naca balándo'os le cabí ilá' lahuë, en biti' bi dë le nagachi' le cabí gaca bë'. ³ Que lë ni na', yúgu'të le chigunnáli' ga naca chul-la, ila'yöni bönnachi ga naca lu bení', ate' didza' bë'ëli' bagáchi'sö ga guzóa lu yu'u nayayaj, gaca libán que ga naca lögaca bönnachi.

Nu ral-la' gádxiru'

(Mt. 10:28-31)

⁴ Gunnë' ca' Jesús:

—Böcha'ado', rea' libí'ili': Biti' gádxili' bönni' tútigaquië' bönnachi, ate' tödi na' bíti'rö bi gaca ilunë' quéguequi. ⁵ Ulu'i'ida' libí'ili' nu ral-la' gádxili'. Guli'gadxi Nu na' gaca ugúa yöl-la' na'bán queëli', en tödi na' dë lu në'ë yöl-la' unná bë' chú'unë' libí'ili' lu guí' gabila. Ön, rea' libí'ili', guli'gadxi Nu na'.

6 'Túti'gaquië'-ba' gáyu'ba' biguínnido' len chopa dumí lárido'. Biti' ral-la ládxë'ë-ba' Dios tu biguínnido' na'. **7** Lësca' caní, yúgu'të guitsa' ícjali' nabábagaca lahuë' Dios. Que lë ni na', biti' gádxili'. Nazáca'téröli' libí'ili' ca zianba' biguínnido'.

*Nupa ta'nnasö néquiguequi queë' Jesús
(Mt. 10:32-33; 12:32; 10:19-20)*

8 Gunnë' ca' Jesús:

—Rea' libí'ili': Yúgu'të bönni' ta'nnë' néquiguequinë' quia' neda' lógaca bönachi, lësca' neda', Bönni' Guljë' Bönachi, innía' néquiguequinë' quia' lógaquië' gubáz lá'ayi queë' Dios, **9** ate' bönni' ta'dá'baguë'ë néquiguequinë' quia' lógaca bönachi, lësca' neda' tá'baga'a néquiguequinë' quia' lógaquië' gubáz lá'ayi queë' Dios.

10 'Yúgu'të nupa bi ila'nnë quia' neda', Bönni' Guljë' Bönachi, gaca uniti lahuë' Dios léguequi, pero nu innë zi' queë' Dios Bö' Lá'ayi, biti' uniti lahuë' Dios nu na'.

11 'Cate' ila'chë'ë libí'ili' gapa naca lu yu'u ga tu'dubë' bönni' judío, en tu'sëdë' queë' Dios, en lógaquië' bönni' ulu'chi'a ulu'söröë' libí'ili', en lógaquië' bönni' dë lu ná'agaquië', biti' ubi ugui'ili' nacxi gunli' o bizzi didza' ubí'ili', o bizzi innali'. **12** La' dza ná'asö usédinë' Dios Bö' Lá'ayi libí'ili' le ral-la' innali'.

*Huáca gun yöl-la' tsahui' queëru' ga gal-la
ládxì'ru'-në' Dios*

13 Tu bönni' nútsë'ë ladaj bönachi zián na' rë' Jesús, rnñë':

—Bönni' Usedi, gudxë' böcha'a gunnë' uláz quia' le guta' queë' xuztu'.

14 Jesús rë' lë':

—Bönni'. ¿Naru' zoa nu buzóa neda' ca nu uchi'a usörö libí'ili', o nu gun gatsaj le dë queéli'?

15 Ní'irö Jesús gudxë' bönachi nacuá' ni', rnnë':

—Buli'yútsöca'. Guli'gún chi'i cuinli' para cabí uhuídi'li'. Le uzi'ë xibé nu bönni' biti' nácasö le zián le dë queë'.

16 Ní'irö Jesús bë'lenë' légaquië' didza', bucúdzü'ë didza', rnnë':

—Zoë' tu bönni' rilé'enë' yöl-la' tsahui' queë', ate' runödžjada' gulapa lu xiyué'. **17** Ní'irö guzá' ládxë'ë bönni' na', rnnë': “¿Nacxi guntsa'? Biti' dë ga gapa chi'a le rulá' quia'.” **18** Ní'irö rnnë': “Caní guna'. Uquínnajgaca' yu'u ga rapa chi'a le rulá' quia', ate' guna' yugu' yu'u zxöntérö ca', ate' gapa chi'a le rulá' quia' ni', len yugu' le dë quia'. **19** Ní'irö gaca guíë cuina': Chidëda' quia' zián le chinutuba', le gáhuida' zián iz. Uzí' ládex'a. Guí'aj gahua', en udzéjada'.” **20** Ní'irö Dios rë' lë': “Li', bönni' biti' bi nözinë'. Na'a dzö' gátieu'. Na'a, ¿nuzxi caz guequi que, lë na' chinutubu?” **21** Caní raca queë' bönni' rutubë' la' queézë' yöl-la' tsahui', en biti' runë' le naca ca yöl-la' tsahui' lahuë' Dios.

Dios run chi'ë yugu' bönachi queë'

(Mt. 6:25-34)

22 Gudödi ni' Jesús gudxë' yugu' bönni' usëda queë', rnnë':

—Que lë ni na' rea' libí'ili': Biti' ubi uguí'ili' ni'a que le guí'aj gáguli', lë na' nabánili', o ni'a que lari' gáculi'. **23** Nácarö lesaca' yöl-la' na'bán queéli' ca le ráguli', ate' nácarö lesaca' idú le nácali' ca lari' ráculi'. **24** Buli'yutëz ca raca quégacaba' boíquiaj.

Biti' tázaba', en biti' ta'lápaba', en biti' nacuá' quégacaba' ga ilún chí'iba' le rulá' quégacaba', pero Dios rugahuë' légacaba'. ¿Naru' cabí nazáca'téröli' libí'ili' ca yugu' biguínido'? ²⁵ ¿Nuzxi caz bönni' lágjali' gaca gunë' ga soë' ibané' ia'tú chí'ido'os tu' ruúbi rugu'i ládxida'ahuë'? ²⁶ Que lë ni na', channö cabí gaca gunli' lë ni naca cuídi'sö, ¿bizz que ruúbi rugu'i'li' ni'a que le naca zxöntérö?

²⁷ 'Buli'yutëz ca ta'zxön yöjdo'. Biti' tun du lari', en biti' taba lari', pero rea' libí'ili', biti' gúcarö lachi le gúcuë' Salomón ca nácagaca yöjdo' ni, sal-la' gúta'da' yöl-la' tsahui' queë'. ²⁸ Channö Dios runë' lachi yöj guíxi'do' rö'gaca na'a la' guixi', ate' cuoxö huidzaj ila'gu'ë léguequi lu guí', ¿naru' cabí gunë' le nácarö dxia'queëli', libí'ili' na' biti' réajlé'eli' Dios idú ládxili'? ²⁹ Que lë ni na', biti' güí'i ládxili' le ral-la' gáguli', en le ral-la' guíjali', en biti' ubi ugui'i ládxido'oli'. ³⁰ Yúgu'të lë ni ta'guilaj bönnachi yödzölió ni, pero chinöz quézinë' Xúzili' Dios le riquínili'. ³¹ Guli'güí' ládxili' tsú'uli' ga rinná bë'ë Dios, ate' yúgu'të lë ni cu'ë xinöza queëli'.

*Yöl-la' tsahui' rigú'uru' yehua' yubá
(Mt. 6:19-21)*

³² Gunnë' ca' Jesús:

—Biti' gádxili', libí'ili' na' nácali' bö'cu' zxíla'do' quia'. Nabábasili' zóali', pero raza ládxë'ë Xúzili' Dios gunnë' queëli' lataj tsú'uli' ga ni' rinná bë'ë Lë'. ³³ Guli'guti' le dë queëli', en buli'nödzaj quégaca bönnachi yechi'. Caní gaca, gunli' queëli' yöoxaj dumí le cabí gaca ditaj, en cú'uli' yöl-la' tsahui' na' yehua' yubá le biti' ubidxi udú, ga ni' biti' idxinë' bönni' gubán, en biti' usunítiba' böa'do'

le. ³⁴ Ga ni' dë yöl-la' tsahui' queëli', ni' güí'i ládxí'li' idxinli'.

Ral-la' sóaru' ban ladxi'

³⁵ Gunné' ca' Jesús:

—Guli'sóá sina', en guli'quela' guí' le uzení' queëli'. ³⁶ Guli'gaca ca bönni' huen dxin ta'bözë' dza huödë' xángaquië', bönni' sa'yéajë' laní que yöl-la' rutsaga na', para cate' udxinë', en ulidzë', la' ila'sáljatë' queë' tsu'ë. ³⁷ Bica' bágaca huen dxin na' ila'cu'ë ban ladxi' cate' huödë' xángaquië'. Le nácatë rea' libí'ili', upá'a cuinë' xángaquië' na', ate' gunë' ga ila'bö'ë ga ilahuë', ate' cu'ë le ilahuë'. ³⁸ Sal-la' huödë' cate' chiral-la o idú guluhuëla, channö idixáquië' légaquië' nacu'ë ban ladxi', bica' bágaca huen dxin na'. ³⁹ Lë ni ral-la' inözili'. La'tu' nözinë' xan yu'u bizzi dza huadxinë' bönni' gubán, usubán ládxë'ë, en biti' gu'ë lataj bönni' na' udxië' yeru lidxë', para cabí cuanë' le dzö'ö lidxë'. ⁴⁰ Que lë ni na', guli'sóá ban ladxi' ca' libí'ili', tu' huöda' neda', Bönni' Guljë' Bönachi, tu dza biti' ribözali' neda'.

Bönni' huen dxin tsahui', en bönni' huen dxin biti' náquië' tsahui'

(Mt. 24:45-51)

⁴¹ Ní'irö Pedro gunábinë' Jesús, rnnë':

—Xan, ¿naru' reo' nétu'sö lë ni rucúdzu'u didza', o reo' ca' caní yúgu'të bönachi?

⁴² Rë' Xanru' lë':

—¿Nuzxi na' bönni' huen dxin tsahui', en réajni'inë', dë lu në'ë uláz queë' xanë'? Bönni' ni, xanë' udödë' lu në'ë lidxë' para cate' gála'rö ilahuë' bönni' nacu'ë lidxë', gu'ë que queëgaquië'

le ilahuë'. ⁴³ Bica' ba bönni' huen dxin na' cate' huödë' xanë', idixáquië' lë' runë' caní dxin na' nudödë' lu në'ë. ⁴⁴ Le nácatë rea' libíili', udödë' xanë' lu në'ë bönni' huen dxin tsahui' na' idutë le dë queë'. ⁴⁵ Channö guéquinë' bönni' huen dxin na' huadzenë' huödë' xanë', ate' isí lahuë' gu'ë dö' quégaquië' ia'zíca'rë' huen dxin, bönni' en nigula, en isí lahuë' guíaj gahuë', en súdxinë', ⁴⁶ níirö huödë' xanë' bönni' huen dxin na' cate' biti' ribözë' lë', en cate' biti' réquibe'enë', ate' usaca' zi'ë bönni' huen dxin biti' náquië' tsahui' na', en ichúguië' queë' qui'i sáquië' ca narugu quégaquië' bönni' biti' ta'yéajlë'ë.

⁴⁷ 'Bönni' huen dxin na' nözinë' le rë'ënë' xanë', en biti' zoë' sina', en biti' runë' ca rnnë' xanë', bönni' ni, quínitérë' xanë' lë'. ⁴⁸ Channö cabí nözinë' tu bönni' huen dxin le rë'ënë' xanë', en gunë' le gun ga ibáguë'ë le quinë' xanë' lë', bönni' ni quinë' lë' láti'do'os. Tu bönni' yu'u lu në'ë yenni', yenni' unabë' xanë' lu në'ë, ate' bönni' na' xanë' nuzxöni ládxë'ë lë' le zxön, le zxöntérö ca' unabë' xanë' lu në'ë bönni' huen dxin na'.

*Le náquië' Jesús gun ga ila'rúaj choplö bönnachi
(Mt. 10:34-36)*

⁴⁹ Gunnë' ca' Jesús:

—Bida' neda' dujéna' ga tsegui guí' yödzölió ni, en caba ládex'a chinaguéla' guí' na'. ⁵⁰ Na'a, dë tu le ral-la' qui'i saca'a le naca ca tu le idílida' nisa, ate' rö'a böninga ga idxintë gaca caní quia'. ⁵¹ ¿Naru' réquili' bida' dulequi dxía' le raca yödzölió ni? Rea' libíili': ¡Calëga! Bida' duléquia' le gun ga ila'rúaj choplö bönnachi. ⁵² Na'a isí lo ulu'lá'alen luzë'eguequi gayu' bönnachi nacuá' tu yu'u. Tsonné'

ila'dá'baguë'ë chopë' nazí'igaquië' xtídza'a, ate' chopë' na' ila'dá'baguë'ë tsonnë' na'. ⁵³ Nu bönni' zóabi' bi'i bönni' queë' tá'baguë'ë zxí'inë' na', ate' bi'i bönni' na' tá'baga'bi' xúzibi'. Nigula zóabi' bi'i nigula queënu tá'baga'nu zxí'ininu na', ate' bi'i nigula na' tá'baga'bi' xiná'abi'. Nigula zóanu nigula zxoa' lídxinu tá'baga'nu zxoa' lídxinu na', ate' nigula zxoa' lídxinu na' tá'baga'nu xto' zxí'ininu.

*Le nácagaca bë' le taca na'a dza
(Mt. 16:1-4; Mr. 8:11-13)*

⁵⁴ Jesúus gudxë' ca' böñachi zián nacuá' ni', rnnë': —Cate' rilé'eli' za' böaj saca' ga ribía gubidza, la' rnnáteli': "Hualaj guiöj", ate' caní raca. ⁵⁵ Cate' recja bö' za' saca' ga ridödi gubidza beo' ziaga, rnnali': "Udzá'a na'a", ate' caní raca. ⁵⁶ Libí'ili', bönni' ruluí'isö tsahui' cuinli'. Nözili' le ruluí' le raca lúzxiba, en le raca luyú ni, pero bití' réquibe'eli' le ruluí' le nácagaca bë' taca dza ni zóaru' na'a.

*Ral-la' ugá'analenu' tsahui' nu rilé rë'u
(Mt. 5:25-26)*

⁵⁷ Gunné' ca' Jesús:

—¿Bizz que bití' ruchi'a rusöröli' la' libí'isili' ca naca le naca tsahui'? ⁵⁸ Channö zoa nu bi unabi yudxi li', ate' zéajli' idxinli' yúlahui', bë' ladxi' ugá'analenu' tsahui' nu na' tsanni ni' yú'uli' nöza, para cabí uzegui li' lahuë' bönni' uchi'a usöröe' libí'ili', ate' bönni' uchi'a usöröe' na' udödë' li' lu né'ë bönni' rusayjë' lidxi guié, ate' bönni' na' rusayjë' lidxi guié cu'ë li' lidxi guié na'. ⁵⁹ Rea' li', bití' uruju' ni' cate' údxirö quizzju' yúgu'të dumí lárido' ral-lu'u que nu na'.

13

Run bayudxi ubí'i ládxi'ru'

¹ La' dza ní'isö bila'dxinë' bönni' ta'guíxjöi'inë' Jesús ca benë' Pilato, bëtië' bal-lë' bönni' Galilea, en guzxië rön quégaquië', le bugútsi'në' xichöngacaba' böa' bëdxi chigulútië' légacaba' para ila'gu'ë xichöngacaba' na' lahuë' Dios. ² Bubi'ë didza' Jesús, rë' légaquië':

—¿Naru' réquili' gulácarë' bönni' dul-la' bönni' Galilea na' ca ia'zíca'rë' bönni' Galilea, tu' gula'gui'i gula'zaquië' caní? ³ Rea' libí'ili': ¡Caléga! Channö cabí ubí'i ládxi'li', nítili' ca' yúgu'tëli'. ⁴ Lësca' caní guca quégaquië' chizzunë' bönni' ni', yöjbaga' yu'u sibi na' nazi'i le Siloé légaquië', ate' gulátië'. ¿Naru' réquili' gula'bága'tëre' légaquië' xíguia' ca ia'zíca'rö böñachi nacuá' Jerusalén? ⁵ Rea' libí'ili': ¡Caléga! Channö cabí ubí'i ládxi'li', nítili' ca' yúgu'tëli'.

Rucúdzü'ë didza' Jesús que yaga higo biti' bi ribía

⁶ Ní'irö bucúdzü'ë didza' Jesús, rë' légaquië':

—Zoë' tu bönni', zoa tu yaga higo nazë' ga naca lu xiyúë'. Röjtilje' le ribía yaga na', pero biti' bi ridzölinë'. ⁷ Ní'irö gudxë' bönni' runë' dxin lu xiyúë' na', rnne': “Chiguca tsonna iz rida' rududilja' le cuía yaga higo ni, en biti' bi ridzölidá'. Guchugu le. ¿Bizz que run nigui luyú ni?” ⁸ Ní'irö bubi'ë didza' bönni' huen dxin na', rë' lë': “Xan, bucá'anagarö le ia'tú ízatëz, ate' uzatsa' yu zxani, en cu'a bëbu zxani. ⁹ Channö cuía yaga ni, gaca dxí'a, pero channö cabí bi cuía, ní'irö ichugu' le.”

Ruúnë' Jesús tu nigula ré'enu cate' naca dza lá'ayi

10 Tu dza rusédinë' Jesús bönachi nacuá' lu yu'u ga tu'dubë' bönni' judío, en tu'sëdë' queë' Dios cate' naca dza lá'ayi quégaquie'. **11** Zóanu tu nigula ni' chiguca chizzunu' iz ré'enu, tu' yu'u lënu bö' xihui' run ga te'e bönachi, ate' nayéchutica'sinu ridanu, en bití' ca' raca ulí cuinnu. **12** Cate' bilé'enë'-nu Jesús, bulidzë'-nu, rnnë':

—Nigúlado', chiböácu' que yödzöhuë' quiu'.

13 Ní'irö Jesús guxóa në'ë lënu, ate' la' bulitë cuinnu, en gulú'unu-në' Dios yöl-la' ba. **14** Ní'irö gulénë' bönni' lo que yu'u ga na' tu'dubë' tu'sëdë' queë' Dios. Rilenë' tu' bunë' Jesús nigula na' cate' naca dza lá'ayi. Bönni' lo na' gudxë' nupa nacuá' ni', rnnë':

—Xopa dza nacuá' cate' runru' dxin. Dë lataj yugu' dza ni guídali' para nu un libí'ili', en calëga dza lá'ayi.

15 Ní'irö bubi'ë didza' Xanru', rnnë':

—Libi'ili', bönni' rulu'isö tsahui' cuinli', ¿naru' cabí rusédxigacali'-ba' bö'a' bëdxi que queëli' ga na' dá'gacaba' cate' naca dza lá'ayi, ate' tsöjuá'agacali'-ba' para ilë'ajba' nisa? **16** Nácanu nigula ni zxi'ini xi'sóë' Abraham, ate' idú chizzunu' iz chiyú'unu lu yalaj que Satanás tu' xihui'. ¿Naru' cabí ral-la' nu usedxi lënu sal-la' naca dza lá'ayi?

17 Cate' bë'ë didza' ni Jesús, bulu'tu'íinë' yúgu'të bönni' nacu'ë ni' ta'lenë' Lë', pero bulu'dzeja ia'zíca'rö bönachi, yúgu'të nupa nacuá' ni', tu' ta'lé'enë' yugu' le zxön runë' Jesús.

*Rucúdzu'ë didza' Jesús que xisedo' mostaza
(Mt. 13:31-32; Mr. 4:30-32)*

18 Ní'irö rnnë' Jesús:

—¿Nacxi caz raca rizxön le rinná bë'ë Dios, o bixxi uséqui'tseru' le? **19** Raca ca raca que xisedo' mostaza, le guzxi'ë tu bönni', ate' guzë' le ga naca lu xiyúë'. Guzxón yaga mostaza na', en guca ca tu yaga zxön, ate' bila'dxinba' biguínnido', gulunba' xcá'agacaba' lu ni'a në'e yaga mostaza na'.

*Rucúdzu'ë didza' Jesús que cúa zi que yöta xtila
(Mt. 13:33)*

20 Lësca' caní rnnë' Jesús:

—¿Bizxi caz uséqui'tseda' le rinná bë'ë Dios?

21 Naca ca cúa zi que yöta xtila, le guzxí'inu tu nigula, en bugútsi'nu tsonna cö' cúa yöta xtila, ate' guyazzaj idútë cúa na'.

*Tu ga tödiru' le naca guíðo'
(Mt. 7:13-14, 21-23)*

22 Tsanni ni' yu'ë nöza Jesús, sa'yéajë' Jerusalén, ridödë' yugu' yödzö zxön, en yugu' yödzödo', ate' rusédinë' böñachi nacuá' gapa na'. **23** Tu bönni' zoë' ni' gunábinë' Jesús, rnnë':

—Xan, ¿naru' nabábasö nupa ulu'lágaca?
Jesús rë' nupa nacuá' ni', rnnë':

24 —Guli'gü'i ládxí'li' tsú'uli' saca' ga nu ridödi le naca guíðo', tu' rea' libí'ili': Zián nupa ilë'ëni ila'yaza ni', pero biti' ila'zéqui'në'. **25** Tödi chasë' Xan yu'u, en usayjë' yu'u, isí loli' libí'ili' na' zóali' ni'ilö ulídzali'-në' ra' yu'u na', ate' guiéli'-në': “Xan, Xan, gusalaj queëtu’.” Ní'irö ubi'ë didza' Lë', en guíë' libí'ili': “Biti' nözda' nuzxi libí'ili'.” **26** Ní'irö isí loli' innali': “Gü'i'gudágulento' Li', ate' busédinu' gapa naca lu yë'ëyi queëtu’.” **27** Ní'irö guíë' libí'ili': “Rea' libí'ili', biti' nözda' gazxi böñachi

libí'ili'. Guli'cuítá ga zoa', yúgu'téli' ruá'ali' dö'." 28 Ní'irö cödxi yéchi'li', en gagu zxea láya'li' cate' ilé'egacali'-në' Abraham, en Isaac, en Jacob, en yúgu'té bönni' gulu'ë didza' uláz queë' Dios, nacu'ë ga ni' rinná bë'ë Dios, pero libí'ili' sóali' ní'ilö. 29 Ila'dxín bönnachi ila'rúaj saca' ga rilén gubidza, en saca' ga ribía gubidza, en saca' ga za' bö' ziaga, en saca' ga ridödi gubidza beo' ziaga, ate' ila'bö'ë ilahuë' ga ni' rinná bë'ë Dios. 30 Ní'irö ilaca lo bal-la bönnachi nácagaca cá'asö na'a, ate' ulu'gá'ana cá'asö bal-la nupa nácagaca lo na'a.

Ribödxi yechëë Jesús ni'a quégaca bönnachi Jerusalén

(Mt. 23:37-39)

31 La' dza ní'isö bila'dxinë' bal-la bönni' yudo' fariseo ga zoë' Jesús en të' Lë':

—¡Burúaj! ¡Buzxunnaj ni! ¡Rë'ënë' Herodes gútië' Li'!

32 Jesús rë' légaquië':

—Guli'tséaj, guli'tsöjödxë' bönni' na' náquië' ca tuba' böza', innali': "Buyútsöca', rubéajgaca' bö' xihui', en ruúna' bönnachi na'a, en cucxö, en cate' gaca lidzaj, údxí guna' dxin quia'." 33 Run bayudxi tséajlensa' ca' nöza na'a, en cucxö, en huidzaj, ate' idxina' Jerusalén, tu' tútigaquië' bönni' tu'ë didza' uláz queë' Dios ni'.

34 'Libí'ili', zóali' Jerusalén. Rútigacali'-në' bönni' tu'ë didza' uláz queë' Dios, en ruládxí'gacali'-në' guiöj bönni' gubáz risöl-lë'ë Dios ga zóali'. Cate' xö zián luzuí gú'unida' utuba' libí'ili' quia' ca runba' yøjede, rutúbiba' börado' queëba' zxan xíliba', pero biti' gú'unili'. 35 Buli'yútsöca', cá'asö ugá'ana

lídxili', ate' rea' libí'ili', bíti'rö ilé'eli' neda' cate' idxinxrö dza innali': "Bica' ba Nu na' za' uláz queë' Xanru'."

14

Ruúnë' Jesús tu bönni' ré'enë' huë' gui

¹ Cate' naca dza lá'ayi quégaquië' bönni' judío, guyu'ë Jesús lidxe' tu bönni' unná bë', bönni' yudo' fariseo. Rö'ë Jesús rahuë', ate' nacu'ë bönni' yudo' fariseo ni' ta'në'ë Lë'. ² Zoë' ca' tu bönni' ré'enë' huë' gui ga na' zoë' Jesús. ³ Ní'irö Jesús gunábinë' bönni' yudo' usedi táquie' xibá queë' Moisés, en yugu' bönni' yudo' fariseo, rnnë':

—¿Naru' dë lataj unru' nu re'e cate' naca dza lá'ayi?

⁴ Légaquië' bulu'sayaj ruá'agaquië'. Ní'irö Jesús gudélë'ë bönni' huë' na', en bunë' lë', ate' la' busölla'të' lë'. ⁵ Ní'irö Jesús rë' yugu' bönni' yudo' na', rnñë':

—Channö nu bönni' ládjali' nacuá'aba' queë' böa' bëdxi, ate' ibíxiba' tuba' lu yero, ¿naru' cabí tsöjléajtë'-ba', sal-la' naca dza lá'ayi?

⁶ Biti' bi didza' guca ulu'bi'ë ca naca lë ni.

Nu cö' lataj lo

⁷ Cate' bilé'enë' Jesús ca tunë' bönni' yudo' fariseo na', ta'bö'ë lataj lo ga na' ta'bö'ë tahuë', ní'irö bucúdzü'ë didza', ate' rë' légaquië':

⁸ —Cate' nu bönni' ulidzë' li' guídu' ga raca laní que yöl-la' rutsaga na', biti' cö'u lataj lo. Nadxi ca' nulidzë' ca' tu bönni' nácatérë' lo ca li'. ⁹ Ní'irö bönni' na' bulidzë' li' huidë' ga zu', en guíë' li': "Bë' lataj bönni' ni cö'ë ga zu", ate' ní'irö lu yöl-la' rutuí'i quiu' tsöjchö'u zxánitëlö. ¹⁰ Que lë ni na', cate' nu

bönni' ulidzë' li', guyéaj yöjchö' zxánitëlö, para cate' idxinë' bönni' na' bulidzë' li', huë' li': "Böcha'a, gudödi ia'lati' nilö." Ní'irö gácaru' li' lo lögaca nupa ta'bö'len li' tsözxön. ¹¹ Nu run ba zxön cuini, ilunë' ga huöta' huöxaj, pero nu zoa nöxaj ladxi', ilunë' ga gácarö lo nu na'.

¹² Jesús rë' ca' bönni' na' bulidzë' Lë', rnnë':

—Cati' gunu' tu gü'i huagu o tu lanido', biti' ulidzagacu'-në' yugu' böchi' luzó'o, en yugu' bönni' böchu'u, en yugu' di'a dza quiu', en dzaga yu'u quiu' ta'lé'enë' yöl-la' tsahui' quégäquië', tu' ulu'lidzë' ca' li', ate' caní gaca, ubí'i quiu'. ¹³ Cate' gunu' tu gü'i huagu, bulidza yugu' bönachi yechi', en nupa nabixi ni'a ná'agaca, en nupa biti' raca sá'gaca, en yugu' bönni' lo chul-la. ¹⁴ Ní'irö gacu' bica' ba, tu' cabí gaca bi ulu'bi'ë bönni' caní quiu', pero ubí'i quiu' cate' idxín dza ulu'bán nupa gulún le naca tsahui', en gulátigaca.

Rucúdzu'ë didza' Jesús que tu laní zxön

¹⁵ Cate' tu bönni' rö'ë rágulenë' Jesús biyönnë' didza' ni, rë' Lë':

—Bica' ba nu gagu ga ni' rinná bë'ë Dios.

¹⁶ Jesús rë' lë':

—Zoë' tu bönni' benë' laní zxön, ate' zián nupa bulidzë'. ¹⁷ Cate' chinabá'a la' huagu, gusöl-lë'ë bönni' huen dxin queë' tsöjödxë' nupa na' chinulidzë', gunné': "¡Guli'dá! ¡Yúgu'tëe chinabá'al!"

¹⁸ Gula'sí lógaquië' yúgu'tëe' ta'nabë' lataj cabí tsöjáquië'. Bönni' zí'alö na' rnnë': "Si' guzxi'a tu luyú, en runda' bayudxi tsöjyúa' le. Ráta'yua' lo' gunnu' neda' lataj." ¹⁹ Ia'tué' rnnë': "Si' guzxi'a gayu' nözaba' bëdxi, ate' tsöjzxí' bë'a légacaba'

ugúngaca'-ba' dxin. Ráta'yua' lo' gunnu' neda' lataj." ²⁰ Ia'tué' rnnë': "Si' butsaga na'a, en que lë ni na' biti' gaca guída'." ²¹ Cate' bőajë' bönni' huen dxin na', yöjtíxjöi'inë' xanë' yúgu'të lë ni. Ní'irö gulénë' bönni' xan yu'u na', ate' gudxë' bönni' huen dxin na', rnnë': "Guyéajtë na'a gapa naca lu yé'ëyi, en gapa naca la' nöza que yödzö ni, ate' ichë'u yugu' bönnachi yechi' ni, en nupa nabixi ni'a ná'agaca, en nupa biti' raca sá'gaca, en yugu' bönni' lo chulla." ²² Cate' chinunë' bönni' huen dxin na' caní, rnnë': "Xan, chibena' ca na' gunná bé'enu' neda', ate' ni dë lataj." ²³ Ní'irö xanë' gudxë' bönni' huen dxin na', rnnë': "Guyéaj gapa naca la' nöza, en gapa naca nöza lasi, ate' ben bayudxi guídigaca nupa nacuá' ni' para ilí lidxa', ²⁴ tu' rea' libí'ili': Biti' gahuë' que laní quia' nitúë' bönni' ni' bulidza' zí'alö."

Le sáca'ru' cate' zéjlenru'-në' Cristo

²⁵ Yugu' dza ni' röjácalen Jesú斯 bönnachi zián, ate' buécjë' Jesú斯, en reë' légaquië':

²⁶ —Channö guídalenë' neda' tu bönni', en biti' idxí'irönë' neda' ca nadxí'inë' xuz xiné'ë, en nigula queë', en yugu' zxí'inë', en yugu' bi'i bőchë'ë, en yugu' bi'i zanë', en yöl-la' na'bán queë', biti' gaca gáquië' bönni' usëda quia'. ²⁷ Nu bönni' biti' gáquië' ca tu bönni' sa'yéajë' söjtë'ë lë'e yaga cruz, ate' të'ë neda', biti' gaca gáquië' bönni' usëda quia'. ²⁸ Channö zoë' nu bönni' ladaj libí'ili' gué'ënnë' gunë' tu yu'u zián cuía, ¿naru' cabí cö'ë zí'alö ulabë' gáca'xi dumí ral-la' utöë' para inözinë' channö dë queë' tsca le riquinnë' para údxí gunë' yu'u na'? ²⁹ Channö cabí gunë' caní, en isí lahuë' cuéquië'

xilibi yu'u na', ate' biti' gaca údxi gunë' yu'u na', ní'irö ila'sí lógaca yúgu'të nupa ila'lé'e le ulu'titaj lë', ³⁰ila'nná: "Bönni' ni gusílahuë' runë' yu'u, pero biti' guca údxi gunë' le." ³¹Lësca' caní, channö zoë' nu bönni' rinná bë'ë, en ral-la' tsejë' gudil-la tsöjtíl-lalenë' ia'tué' bönni' rinná bë'ë, ¿naru' cabí cö'ë zí'alö, en cuéqui icjë' channö séqui'në' tsöjtíl-lalenë' bönni' ni' naché'ë galaj milë' bönni', ate' lë' chi milsë' bönni' naché'ë? ³²Channö cabí séqui'në', cate' ni' zoë' zi'tu' ia'tué' bönni' na' rinná bë'ë, isöllë'ë bönni' gubáz queë', ate' inábinë' lë' nacxi ral-la' gunë' para ulu'dzáguië' dxi'a. ³³Caní naca, channö zoë' nu bönni' ladaj libí'ili' biti' ucá'anë' yúgu'të le dë queë', biti' gaca gáquië' bönni' usëda quia'.

*Zödi' le naniti yöl-la' siná'a que
(Mt. 5:13; Mr. 9:50)*

³⁴Gunné' ca' Jesús:

—Dxi'a naca zödi', pero channö initi yöl-la' siná'a que, ¿nacxi gaca úniru' le siná'a? ³⁵Bíti'rö nazaca' zödi' na', calëga para luyú, en calëga para ga rirú'uniru' bëbu, pero chú'unaru' le ní'ilö. Nu zoa nagui, en riyöni, ral-la' uzé nagui nu na'.

15

*Rucúdzu'ë didza' Jesús ca naca queëba' bö'cu'
zxila' gunítiba'
(Mt. 18:10-14)*

¹Bulu'dubë' yúgu'të bönni' tu'quízxjë' lázagaca bönachi, en yugu' bönni' cá'asö ga zoë' Jesús para ulu'zé náguië' Lë'. ²Que lë ni na'yugu' bönni' yudo' fariseo, en yugu' bönni' yudo' usedi gula'nnë' queë' Jesús, ta'nnë':

—Bönni' ni runë' bal yugu' bönni' dul-la', en rágulenë' légaquië'.

³ Ní'irö bucúdzu'ë didza' Jesús, rë' légaquië':

⁴ —Channö zoë' tu bönni' ladaj libí'ili', nacuá'aba' queë' tu gayuá'aba' bö'cu' zxila', en channö nítiba' tuba', ¿naru' cabí ucá'anë' ia'zíca'röba' tápalalaj yu' chénnaba' na' ga naca lu lataj cá'asö, ate' tsejë' tsöjdiljë'-ba' bö'cu' zxila' na' nanítiba', cate' udzölirönë'-ba'? ⁵ Cate' udzölinë'-ba', lu yöl-la' rudzeja queë' ixóe'-ba' ya' zxicjë', ⁶ en cate' udxinë' lidxë' utubë' yugu' böchi' luzë'ë, en yugu' dzaga yu'u queë', ate' guië' légaquië': "Buli'dzéjalen neda', tu' chibudzölida'-ba' bö'cu' zxila' quia' gunítiba'." ⁷ Rea' libí'ili': Lësca' caní gácatérö yöl-la' rudzeja yehua' yubá ni'a queë' tuë' bönni' dul-la' ubí'i ládxë'ë ca gaca quégaquië' tápalalaj yu' chénnë' bönni' tsahui', bönni' téquinë' biti' naquíniguequinë' ulu'bí'i ládxí'gaquië'.

Rucúdzu'ë didza' Jesús que tu dumí guniti

⁸ Rnnë' ca' Jesús:

—Channö zóanu tu nigula, dë queënu chi dumí plata, en channö initi tu dumí plata na', ¿naru' cabí uquélä'nu guí', ate' ulúanu yu'u, uguilaj yúdxinu le cate' udzölirönu le? ⁹ Cate' udzölinu le, utúbinu yugu' nigula luzá'anu, en yugu' nigula dzaga yu'u queënu, ate' guiënu légacanu: "Buli'dzéjalen neda', tu' chibudzölida' dumí plata na' guniti." ¹⁰ Rea' libí'ili': Lësca' caní, ulu'dzéjade'erönë' gubáz lá'ayi queë' Dios ni'a queë' tuë' bönni' dul-la' ubí'i ládxë'ë.

Rucúdzu'ë didza' Jesús queëbi' tu bì'i gunítibi'

¹¹ Rnnë' ca' Jesús:

—Zoë' tu bönni' nacuá'abi' chópabi' bi'i bönni' queë'. ¹² Bi'i cuidi' na' rëbi'-në' xúzibi': "Dad, benna quia' le dë quiu' le ral-la' guequi quia'." Ní'irö xúzibi' na' gudísie' quégacabi' le dë queë'. ¹³ Nabábasö dza gudzé, bi'i cuidi' na' butúbibi' yúgu'të, ate' guyéajbi' tu yödzö zi'tu', ate' ni' butöbi' dérö le dë queëbi'. Le ruá' dö' benbi'. ¹⁴ Cate' chibutöbi' dérö le dë queëbi', guca gubín lu yödzö ga na' zóabi', ate' biyadzaj queëbi'. ¹⁵ Ní'irö guyéajbi' yöjsóabi' huen dxin queë' tu bönni' lu yödzö ni', ate' bönni' na' gusöl-lë'ë-bi' ga dë xiyúë' tsöjgágubi'-ba' yugu' cuchi queë'. ¹⁶ Guca ládxibí' gágubi' guixi' cá'asö na' táguba' cuchi, pero cuntu nu bi bë' le gágubi'. ¹⁷ Ní'irö bubí'iládxibí', rnnabi': "Cate' xö bönni' huen dxin nacuë' lidxë' xuza', en dëda' le tahuë', pero neda' ni huáti caza' yöl-la' ridún. ¹⁸ Uzá'a ni, huöja' ga zoë' xuza', en tsöjödxa'-në': Dad, bena' dul-la' lahuë' Dios, zoë' yehua' yubá, en lo' li'. ¹⁹ Bíti'rö naca' neda' lesaca' gaca' zxí'inu'. Ben neda' ca bönni' huen dxin quiu'." ²⁰ Ní'irö guyú'ubi' nöza, söhuöajbi' ga zoë' xúzibi'.

'Cate' ni' zóabi' zi'tu' suzá'abi', bilé'enë'-bi' xúzibi', en buéchi' ládxë'ë-bi'. Carelö yöjzxí'galë'-bi' xúzibi', en yöjnidë' yenbi', gudahuë'-bi' zxixi. ²¹ Ní'irö zxí'inë' na' rëbi'-në': "Dad, bena' dul-la' lahuë' Dios, zoë' yehua' yubá, en lo' li'. Bíti'rö naca' neda' lesaca' gaca' zxí'inu'." ²² Ní'irö xúzibi' rë' yugu' bönni' huen dxin queë', rnnë': "Guli'tsöjléajtë lari' nazáca'térö, en guli'gacu-bi'. Guli'cú'u le nazaca' xibön ná'abi', en buli'dá' huarache ní'abi'. ²³ Guli'tsöjzxí'i-ba' bëdxi renni', ate' guli'guti-ba'. Gáguru'-ba', en gunru' laní, ²⁴ tu' guca bi'i bönni' quia' ni ca tu bi'i chinátibi', ate'

bubanbi'. Gunítibi', ate' chibulá'abi' na'a." Ní'irö gula'sí lógaquië' tu'dzéjanë'.

25 "Tsanni ni' raca lë ni, zóabi' bi'i bönni' zí'alö queë' bönni' na' la' guixi'. Cate' suzá'abi' rudxinbi' gala' ra' yu'u, riyönibi' raca huila, en raca huö'a lu yu'u na'. **26** Ní'irö bulídzabi'-në' tuë' bönni' huen dxin zoë' ni', en gunábibi' lë' bizzina' raca. **27** Bönni' huen dxin na' rë'ë-bi': "Bi'i böchu'u na' budxinbi', ate' gunná bë'ë xuzu' gulútië'-ba' bëdxi renni', tu' budxinbi' lu në'ë dxia' tsáhui'do'." **28** Ní'irö gulébi' bi'i zí'alö na', en biti' gü'unibi' tsú'ubi' yu'u. Ní'irö birúajë' xúzibi', en gúta'yuë' lobí' tsú'ubi'. **29** Bubí'ibi' didza' bi'i zí'alö na', rëbi'-në' xúzibi': "Nöz quézinu' cate' xö iz bena' dxin lo', en catu caz gudá'baga'a li', pero catu caz bennu' quia' tuba' bö'cu' zxíla'do' para gü'ilena' xibé yugu' luzá'a. **30** Na'a, cate' budxinbi' bi'i quiu' ni busunítibi' yugu' le guta' quiu', gudálenbi'-nu yugu' nigula udá dzaga, benu' ga gulútië'-ba' bëdxi renni' ni'a queëbi'." **31** Ní'irö xúzibi' rë'ë-bi', rnnë': "Zxi'ina', li' zóalen cazu' neda' ate' yúgu'të le dë quia', quiu' nequi. **32** Ben bayudxi gunru' laní, en udzéjaru', tu' gúcabi' bi'i böchu'u ni ca tu bi'i chinati cázabi', ate' nubanbi'. Gunítibi' ate' chibulá'abi'."

16

Rucúdzu'ë didza' Jesús queë' bönni' huen dxin biti' náquië' tsahui'

1 Jesús rë' ca' yugu' bönni' dá'gaquië' Lë', rnnë': —Zoë' tu bönni' dë yöl-la' tsahui' queë', en zoë' ca' queë' tuë' bönni' huen dxin dë lu në'ë uláz queë'. Bila'dxinë' yugu' bönni' tu'zéguië' bönni' huen dxin na' lahuë' xanë', ta'nnë' queë' rutösë' le dë queë'

xanë' na'. ² Ní'irö xan yu'u na' bulidzë' bönni' huen dxin na', en rë' lë': "¿Bizxi didza' ni riyönda' quiu? Bulu'i neda' le naca bë' dxin nunu', tu' cabirö gata' lu no'o uláz quia'." ³ Ní'irö guzá' ládxë'ë bönni' huen dxin na', rnnë': ¿Nacxi guntsa'? Rubéajë' xana' neda' lataj lo ga runa' dxin. Biti' séqui'da' guna' dxin gú'una, en utu'ida' inaba' nu bi gúnnasö quia'. ⁴ Na'a nözda' naca guna' para cate' ubéajë' neda' lataj lo ni, ila'cuá' nupa ulu'zí' neda' lídxiguequi. ⁵ Ní'irö bönni' huen dxin na' bulidzë' yugu' bönni' bi tál-lë'ë queë' xanë', ate' rë' bönni' zí'alö: "¿Gáca'xi ral-lu'u queë' xana'?" ⁶ Lë' rnnë': "Tu gayuá' rö'ö chugu le za ral-la'a." Bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Gurö'ötë ni, en buzúaj ia'tú lu guichi le inná chi-un rö'ö chugu ral-lu'u." ⁷ Gudödi ni' gunábinë' ia'túë', rnnë': "Nazxi li', ¿gáca'xi ral-lu'u?" Lë' rnnë': "Tu gayuá' da'a zxoa' xtila." Ní'irö bönni' huen dxin lo na' rë' lë', rnnë': "Ni dë guichi ga nazúaj le ral-lu'u. Buzúaj ia'tú lu guichi le inná tápalalaj da'a ral-lu'u." ⁸ Réquibe'enë' xanë' na' sínatë benë' bönni' huen dxin biti' náquië' tsahui' na'. Caní naca, nácagacarë' sina' bönni' yödzölió ni lu le tunë' la' légacasë', ca nácagaca bönachi ta'dalen Dios lu bení' queë'.

⁹ 'Neda' rea' libíili': Guli'cözalen bönachi dxi'a, ugunli' dxin yöl-la' tsahui' dë queëli' yödzölió ni, para cate' idxín dza ucá'anali' yugu' lë ni, ilunë' libíili' bal lataj ni' zóatica'sö.

¹⁰ 'Nu rugún dxi'a dxin tu le cuídi'sö dë lu në'e, lësca' ugún dxi'a dxin tu le zxön gata' lu në'e. Nu biti' rugún dxi'a dxin tu le cuídi'sö dë lu në'e, biti'

ugún dxi'a dxin tu le zxön gata' lu nē'e. ¹¹ Que lē ni na', channö cabí rugunli' dxi'a dxin yöl-la' tsahui' dë queëli' yödzölió ni, ¿nuzxi caz udödi lu ná'ali' yöl-la' tsahui' le naca idú? ¹² Channö cabí rugunli' dxi'a dxin le dë lu ná'ali' le nequi que nu yübölö, ¿nuzxi caz udödi lu ná'ali' le ral-la' guequi que quézili'?

¹³ 'Biti' gaca nitúë' bönni' huen dxin gunë' xichíngaca chopá xanë', tu' udí'inë' tuë', en idxí'inë' ia'túë', o gunë' bal tuë', en uzóë' tsölá'alö ia'túë' na'. Biti' gaca gunli' xichinë' Dios, en gunli' ca'dxin para uzí'ilí' xibé yöl-la' tsahui' que yödzölió.

¹⁴ Bila'yönnë' bönni' yudo' fariseo didza' ni, ate' tu' nadxí'iguequinë' yöl-la' tsahui' quégäquië', que lë ni na' bulu'titjë' Jesús. ¹⁵ Ní'irö Jesús rë' légaquië':

—Libí'ilí' rubéaj dxi'a cuinli' lögaca böñachi, pero nözinë' Dios le yu'u icja ládxido'oli', tu' naca lë na' tun zxön böñachi tu le ruzóë' Dios tsölá'alö.

Xibá queë' Moisés, en le rinná bë'ë Dios

¹⁶ Gunné' ca' Jesús:

—Ga bidxitnë dza zoë' Juan, ben dxin le rinná bë' xibá queë' Moisés, en le bulu'zúajë' lu guichi yugu' bönni' gulu'ë didza' uláz queë' Dios. Ní'irö cate' bidxinë' Juan na', gusí lo raca libán ca gaca nu tsaza ga rinná bë'ë Dios, ate' tun bayudxi yúgu'të böñachi ila'yaza ni'.

¹⁷ 'Sal-la' raca caní, gácarö ila'dödi que lúzziba, en que luyú ni ca initi tu dídfa'sö nazúaj lu guichi lu xibá queë' Dios.

Le rulá'a yöl-la' nutsaga na'

(Mt. 19:1-12; Mr. 10:1-12)

¹⁸ Gunné' ca' Jesús:

—Channö tu bönni' ulá'alenë' nigula queë', ate' utsaga ná'alenë'-nu nigula yúbölö, gunë' dul-la' le riguitsaj xibá que yöl-la' nutsaga na', ate' nu utsaga ná'alen nigula na' nusanë'-nu bönni' queënu, gun ca' dul-la' le riguitsaj xibá que yöl-la' nutsaga na'.

Bönni' dë yöl-la' tsahui' queë', en Lázaro

¹⁹ Ní'irö bucúdzu'ë didza' Jesús, rnnë':

—Zoë' tu bönni' rilé'enë' yöl-la' tsahui' queë'. Rácuë' lari' xiná, en lari' nazáca'da', ate' yugu' dza rúntica'së' laní, ate' të'aj tahuë' le banéquini. ²⁰ Zoë' ca' ni' tu bönni' yéchi'do' lë' Lázaro, bönni' rinabë' nu bi unödzaj queë', ate' huë'tezë' rö'ë ra' yu'u queë' bönni' na' rilé'enë' yöl-la' tsahui'.

²¹ Raca ládxë'ë bönni' yéchi'do' na' gahuë' le bizzaj tu'huöxaj zxani ga rahuë' bönni' na' rilé'enë' yöl-la' tsahui'. Ta'dxinba' ca' bö'cu', en ta'lé'ëba' lu huë' queë' bönni' yéchi'do' na'. ²² Bidxín dza gútië' bönni' yéchi'do' na', ate' gubáz lá'ayi queë' Dios gula'chë'ë lë' tsöjsóalenë' Abraham ga naca lataj lachi queë' Dios. Gútië' ca' bönni' na' bilé'enë' yöl-la' tsahui', ate' bulu'cáchë'ë lë' yero ba. ²³ Cate' ni' rigu'i rizáquë'ë bönni' na' bilé'enë' yöl-la' tsahui', zoë' lataj quégaca nupa nátigaca, guchisa lahuë', en bilé'enë' Abraham zoë' zi'tu', en dzáguië' Lázaro na' lë'. ²⁴ Ní'irö bë'ë zidzaj didza', rnnë': "Xuza', Abraham, buéchi' ladxi' neda'. Gusöl-la' Lázaro quia' para usubisë' xibón né'ë, en udusuhuöálë' lúdx'a'a, tu' rigu'i rizáca'a lu gui' ni." ²⁵ Abraham rë' lë', rnnë': "Zxí'ina', busá' ládxu'u ca guca quiu', buzi'u xibé yöl-la' tsahui' tsanni ni' zu' nabantu', pero Lázaro ni, guca queë' yöl-la' yechi', ate' na'a, ruzí' zxönë' Lázaro ni, pero li' rigu'i rizácu'u. ²⁶ Ia'stú,

tu ra' guí'a sibi rö', le zoa gatsaj láhui'lö ga ni' zóali' libí'ili', en ga ni zóatu' netu'. Que lë ni na' nupa nacuá' ni, en ilé'ëni ila'dödi ga zóali' libí'ili', biti' ca' gaca ilunë' ca', en biti' gaca ilida ni nupa nacuá' ni." ²⁷ Ní'irö bönni' na' bilé'enë' yöl-la' tsahui' rë' lë', rnnë': "Xuza' Abraham, ráta'yua' lo' isöl-lu'u-në' Lázaro tsejë' lidxë' xuza', ²⁸ tu' nacu'ë gáyu'ë bönni' böcha'a ni'. Gusöl-lë'ë tsöjenë' liná' lo que le raca ni, para cabí guídigaquië' ca' lataj ga ni rigui'i rizáca'a." ²⁹ Ní'irö Abraham rë' lë', rnnë': "Dë quégaquië' le buzúajë' lu guichi Moisés, en le bulu'zúajë' lu guichi bönni' gulu'ë didza' uláz queë' Dios. Yugu' didza' quégaquië' na' ral-la' ulu'zé náguië'." ³⁰ Bubi'ë didza' bönni' na' bilé'enë' yöl-la' tsahui', rnnë': "Xuza' Abraham, biti' gaca caní, pero channö ubanë' tu bönni' lu yöl-la' guti, en tsejë' ga na' nacu'ë, ulu'bí'i ládxi'gaquië'." ³¹ Abraham rë' lë', rnnë': "Channö cabí tu'zé náguië' didza' bë'ë Moisés, en le gula'nnë' bönni' gulu'ë didza' uláz queë' Dios, biti' ila'yéajlë'ë sal-la' nu ubán lu yöl-la' guti."

17

*Run bönadxi queëru' gunru' ga nu gun dul-la'
(Mt. 18:6-7, 21-22; Mr. 9:42)*

¹ Jesús rë' yugu' bönni' dá'gaquië' Lë', rnnë': —Nacuá'tica'sö le tun ga ilún bönachi dul-la', pero bica' bayechi' bönni' na' runë' ga nu gun dul-la'. ² Dxí'arö gaca queë' bönni' na' runë' caní, nu ugal-la' tu guiój riyëtu yaga yenë', en tsöjchú'una lë' lu nísado', cáte'lö gunë' ga gun dul-la' nu bi'i néquibi' quia'. ³ Guli'gún chi'i cuinli'. Channö böchi'

luzó'o gu'ë dö' quiu', buzéajni'i-në', en channö ubí'i ládxë'ë, buniti lo lë'. ⁴ Sal-la' gadxi luzuí tu dza gu'ë dö' quiu', en gadxi luzuí ca' guídë' ga zu', en guíe' li': "Rubí'i ládex'a'a", ral-la' uniti lo lë'.

Yöl-la' huáca que le réajlë'ëru' Cristo

⁵ Ní'irö yugu' bönni' gubáz queë' Xanru' të' Lë', ta'nnë':

—Ben ga tséajlë'ërötü'-në' Dios.

⁶ Xanru' rë' légaquië', rnnë':

—La'tu' naca cuídi'sö yöl-la' réajlë' queëli' Dios, nácasö ca tu xisedo' mostaza, huáca guiëli' yaga zxön ni: "Gucuíta ni, en yöjsóa lu nísado", ate' gun yaga na' ca rnnali'.

Le ral-la' gun nu naca huen dxin

⁷ Gunnë' ca' Jesúš:

—Channö zoë' tuë' bönni' ladaj libí'ilí', en zoë' queë' tuë' bönni' nadó'o rugá'anë'-ba' bëdxi o rulapë', cate' údxí gunë' xichinë' xanë', ¿narú' huëtsë' xanë' lë', innë': "Gudá, gurö'ö gagu"”? ⁸ ¡Caléga! Caní guië' lë': "Bupá'a le gahua'. Guzóá sina' cu'ule guí'aj gahua', ate' tòdirö na' huáca guí'aj gagu' lí'." ⁹ ¿Naru' huëtsë' bönni' nadó'o queë' na': "Xclenu", tu' benë' ca gunná bé'enë' lë'? Runi neda', bití gunë' caní. ¹⁰ Lësca' caní gaca queëli'. Cate' chinunli' yúgu'të le gunná bé'enë' Dios libí'ilí', ral-la' innali': "Nácatu' huen dxin cabí nácatu' lesaca', tu' bénsötu' le run bayudxi guntu'."

Chië' bönni' té'enë' huë' nudzu' ruzödi

¹¹ Tsanni ni' yu'ë Jesúš nöza, sa'yéajë' Jerusalén, ridödë' gapa dë yödzödo' nabábagaca luyú Samaria, en luyú Galilea. ¹² Cate' guyázië' tu yödzödo', bila'rúajë' dutságagaquië' Lë' chië' bönni' té'enë'

huë' nudzu' ruzödi, ate' gula'cu'ë zí'tu'sö, ¹³ en tu'ë zidzaj didza', ta'nnë':

—¡Jesús, Bönni' Usedi! ¡Buéchi' ladxi' netu'!

¹⁴ Cate' bilé'enë' Jesús légaquië', rë' légaquië':

—Guli'tséaj, guli'tsöjlu'i cuinli' lógaca bixúz.

Tsanni ni' söjáquië', bulu'huöáquië' dxi'a.

¹⁵ Ní'irö tuë' bönni' nútsë'ë ládjagaquië', cate' réquibe'enë' chinuhuöáquië' dxi'a, böajë' ga na' zoë' Jesús, ruí'itica'së' zidzaj didza', rigu'ë Dios yöl-la' ba. ¹⁶ Biyéchuë', en busudxín lahuë' lu yu lahuë' Jesús, en rë' Lë': "¡Xclenu'!"

Bönni' ni nababë' Samaria. ¹⁷ Ní'irö Jesús rë' lë':

—¿Naru' cabí bulu'huöáquië' dxi'a chië' bönni'? ¿Gazxi nacuá'tsë' ia'zíca'rë' bönni' na'? ¹⁸ ¿Naru' cabí zoa nu huöda cu'u Dios yöl-la' ba, pero tuzë' bönni' zi'tu' ni?

¹⁹ Ní'irö Jesús gudxë' bönni' na', rnnë':

—¡Guyasa, en böaj lidxu'! ¡Chiböácu' dxi'a tu' réajlë'u neda'!

Ca idxín le rinná bë'ë Dios

(Mt. 24:23-28, 36-41)

²⁰ Cate' yugu' bönni' yudo' fariseo ta'nábinë' Jesús bátaxi ral-la' idxín le rinná bë'ë Dios, Lë' bubi'ë didza', rë' légaquië':

—Ca idxín le rinná bë'ë Dios, biti' naca le ilé'eli'.

²¹ Cuntu nu gaca inná: "¡Ni bidxín!", o inná: "¡Ni' bidxín!" ¡Buli'yútsöca'! ¡Rinná bë'ë Dios lu icja ládzi'do'gaca bönachi!

²² Ní'irö Jesús gudxë' yugu' bönni' usëda queë', rnnë':

—Huadxín dza cate' gué'ënili' ilé'eli' dza huöda' neda', Bönni' Guljë' Bönachi, pero biti' ilé'eli' le.

²³ Ila'cuá' nupa ilé libí'ilí: "¡Ni zoë'!", o ila'nná:

“¡Ni’ zoë!” Biti’ tséajli’ ni’, en biti’ tséajlenli’ légaquië’. ²⁴ Ca raca cate’ rëpi yösa, ruzení’ idá’alö lúzziba, lësca’ caní gaca cate’ idxín dza huöda’ neda’, Bönni’ Guljë’ Bönachi. ²⁵ Zí’alö ca gaca lë ni, run bayudxi quí’i sáca’da’, ate’ bönachi dza ni zóaru’ na’ ulu’cá’ana neda’ cá’asö. ²⁶ Ca na’ guca dza ni’ zoë’ Noé, lësca’ caní gaca cate’ idxín dza huöda’ neda’, Bönni’ Guljë’ Bönachi. ²⁷ Dza ni’té na’ gulë’aj gulahuë. Bulu’tsaga ná’agaquië’, en bulu’dödë’ zxí’inigaquië’ lu yöl-la’ rutsaga na’ ga bidxintë dza guyázië’ Noé lë’e barco zxön na’ nazí’i le arca, ate’ bidxintë nisa guiój usuniti yödzölió le busuniti yúgu’të’. ²⁸ Lësca’ caní guca dza ni’ zoë’ Lot. Gulë’aj gulahuë. Gulá’uë’, en gulúti’ë. Gulazë’ xiyúgaquië’, en gulunë’ yugu’ yu’u quégäquië’. ²⁹ Cate’ bidxín dza na’ burúajë’ Lot lu yödzö Sodoma, böxaj guí’ ca tu nisa guiój, enca’ le ruzéguida’ nazí’i le azufre, ate’ bulu’suniti yúgu’të’. ³⁰ Lësca’ caní gaca cate’ idxín dza ulu’i lahua’ neda’, Bönni’ Guljë’ Bönachi.

³¹ ’Cate’ idxín dza na’, channö zoë’ tu bönni’ ícjo’olö, en dzö’ö le dë queë’ lu yu’u na’, biti’ ral-la’ huötjë’ tsöjzxi’ë le dë queë’, ate’ nu zoa la’ guixi’, lësca’ caní, biti’ ral-la’ huötjë’ lidxe’. ³² Guli’sá’ ládxí’li’ ca guca queënu nigula queë’ Lot. ³³ Nu bönni’ rë’ënë’ gun chi’ë yöl-la’ na’bán queë’, unítië’ le, pero bönni’ udödë’ yöl-la’ na’bán queë’ ni’ a quia’, udélë’ë le.

³⁴ ’Rea’ libí’ili’: Cate’ idxín rëla na’, ila’cu’ë chopë’ bönni’ tsözxön ga tasië’, ate’ tuë’ uduzxi’ a-në’, en ia’tué’ ucá’ana’ lë’. ³⁵ Ila’cuá’anu huëtu tsözxön chópanu nigula, ate’ tunu uduzxi’ a-nu, en ia’tunu ucá’ana’-nu. ³⁶ Ila’cu’ë chopë’ bönni’ la’ guixi’, ate’ tuë’ uduzxi’ a-në’, en ia’tué’ ucá’ana’ lë’.

37 Cate' bila'yönnë' lë ni bönni' usëda queë' Jesús, gula'nábinë' Lë', ta'nnë':

—Xan, ¿gazxi gaca lë ni?

Jesús rë' légaquië':

—Ga dë tu le nati, ni' ulu'dubi quéziba' bíchulab.

18

Tu nigula uzëbi, en bönni' ruchi'a rusöröë'

1 Ní'irö bucúdzü'ë didza' Jesús, rë' légaquië' ca run bayudxi ulídzatica'siru'-në' Dios, en biti' gaca chopa ládxí'ru'. **2** Rnnë':

—Zoë' tu bönni' ruchi'a rusöröë' tu yödzö, bönni' biti' rádxinë' Dios, en biti' runë' nu bönni' bal. **3** La' yödzö ná'asö zóanu tu nigula uzëbi, ate' bidxinnu nigula ni ga zoë' bönni' ruchi'a rusöröë' na', rnanu: "Buchi'a busörö le run quia' nu ruá' dö' quia'." **4** Xidzé biti' gú'unnë' bi gunë' queënu, pero gudödi ni' guzá' ládxë'ë, rnnë': "Biti' rádxida'-në' Dios, en biti' runa' nu bönni' bal, **5** pero tu' rupízxjanu nigula uzëbi ni neda', que lë ni na' uchi'a usöröa'-nu, para cabí guídatica'sinu ni, en para cabí tödi bë' upízxjanu neda'."

6 Ní'irö Xanru' rë' légaquië', rnnë':

—Guli'zé nágali' ca na' gunnë' bönni' ruchi'a rusöröë' na', bönni' biti' náquië' tsahui'. **7** ¿Naru' cabí uchi'a usöröë' Dios böñachi gurö cazë' queë', nupa na' tu'lidza Lë' rëla te dza? ¿Naru' huadzétsenë' gácalenë' légaquië'? **8** Rea' libí'ili': La' uchi'a usörötenë' légaquië'. Cate' huöda' neda', Bönni' Guljë' Bönachi, ¿naru' idzölida' nupa ta'yéajlë' neda' luyú ni?

Tu bönni' yudo' fariseo, en tu bönni' uquízxaj

9 Bucúdzu'ë didza' Jesús ca naca quégaquië' bönni' tu'béaj tsahui' cuíngaquië', en tu'cá'anë' cá'asö ia'zíca'rö bönnachi. **10** Gunnë':

—Bila'dxinë' chopë' bönni' ga naca chila yudo' para ulu'lidzë' Dios. Tuë' bönni' na' náquië' bönni' yudo' fariseo, ate' ia'tué' na' náquië' bönni' ruquízxjë' lázagaca bönnachi. **11** Guzuínë' bönni' yudo' fariseo na', en caní bulidzë' Dios, rnñë': "Dios, rea' Li': Xclenu', tu' cabí naca' ca nácagaquië' ia'zíca'rë' bönni', nácagaquië' gubán, en biti' nácagaquië' tsahui'. Ta'guitsjë' xibá que yöl-la' nutsaga na'. Lësca' biti' naca' ca bönni' uquízxaj ni. **12** Neda' runa' gubasa chopa luzuí tu' xunu' dza huéaj, en runödzja' que yudo' tu cö' huéaj tu' chi cö' que yúgu'të le rata' quia'." **13** Guzóazë' zi'tu' bönni' uquízxaj na', en biti' böázxjanë' ichisa lahuë' uyúë' lúzxiba, pero gudapë' luchu'ë, rnnë': "Dios, buéchi' ladxi' neda', bönni' dul-la'." **14** Neda' rea' libí'ilí: Böajë' lidxë' bönni' uquízxaj na', nuhuöáquië' tsahui' lahuë' Dios, calëga ia'tué' bönni' ni'. Nútítës bönni' run ba zxön cuinë', gunë' Dios ga huöta' igulë', pero nu bönni' rizóë' nöxañladxi', gunë' Dios ga gácarë' lo.

Jesús rulidza tsáhuë'ë-bi' yugu' bï'ido'
(Mt. 19:13-15; Mr. 10:13-16)

15 Ní'irö bila'dxinë' yugu' bönni', en nigula ga zoë' Jesús, nachë'gaquië'-bi' yugu' bï'ido' quégaquië' para ixóa në'ë Jesús légacabi'. Cate' bila'lé'enë' yugu' bönni' usëda queë' Jesús lë ni, gula'dil-lë' légaquië'. **16** Ní'irö Jesús bulidzë' yugu' bönni' dá'gaquië' Lë', rnnë':

—Guli'güí'i-bi' lataj ila'dxinbi' bí'ido' ni ga zoa'. Bití' uzága'li' xinózagacabi', tu' gata' quégaca nupa nácagaca ca bi'i caní lataj ga rinná bë'ë Dios. ¹⁷ Le nácatë rea' libí'ili': Nu cabí si' lu në'e le rinná bë'ë Dios, ca runbi' tubi' bí'ido', bití' ca' tsaza ga ni' rinná bë'ë Lë'.

Tu bönni' rilé'enë' yöl-la' tsahui'
(Mt. 19:16-30; Mr. 10:17-31)

¹⁸ Tu bönni' unná bë' gunábinë' Jesús, rnnë':

—Bönni' Usedi idú dxi'a. ¿Bizzi ral-la' guna' para idéli'da' yöl-la' na'bán idú?

¹⁹ Jesús rë' lë':

—¿Bizx que rë'u neda': "Idú dxi'a"? Cuntu nu bönni' náquië' idú dxi'a. Tuzë' Dios náquië' idú dxi'a. ²⁰ Nöz quézinu' yugu' le gunná bë'ë Dios: Bití' gunu' dul-la' le riguitsaj xibá que yöl-la' nut-saga na'.

Bití' gútigacu' böñachi.

Bití' cuanu'.

Bití' innío' que luzó'o le cabí nácatë.

Ben bal xuz xinó'o.

²¹ Bönni' na' rë' Jesús, rnnë':

—Yúgu'të lë ni runa' ga gudela' naca' bí'ido'.

²² Cate' biyönnë' Jesús didza' ni, rë' lë':

—Ia'tú le riyadzaj quiu' gunu'. Bëti' yúgu'të le dë quiu', ate' lë na' si'u bunödzaj quégaca böñachi yechi', ate' gata' quiu' yöl-la' tsahui' yehua' yubá. Ní'irö gudá, gudá' neda'.

²³ Cate' bönni' na' biyönnë' didza' ni, ruhuí'innë', tu' dëda' yöl-la' tsahui' queë'. ²⁴ Cate' bilé'enë' Jesús ca na' ruhuí'innë' bönni' na', rnnë':

—¡Bica' böñiga gaca, ila'yaza nupa ta'lé'e yöl-la' tsahui' ga rinná bë'ë Dios! ²⁵ Gácarö tódiba'

böa' nagui yötsi', ca tsázië' tu bönni' rilé'enë' yöl-la'
tsahui' ga rinná bë'ë Dios.

26 Ní'irö nupa bila'yöni didza' ni gula'nná:

—¿Nuzxi caz gaca ulá, channö?

27 Jesús gudxë' légaquië':

—Le biti' gaca ilunë' bönni', huáca gunë' Dios.

28 Ní'irö Pedro rë' Jesús:

—Buyútsöca', netu' nucá'anatu' yúgu'të le dë
queëtu', en dá'atu' Li'.

29 Ní'irö Jesús rë' légaquië':

—Le nácatë rea' libí'ili', nu bönni' ucá'anë' lidxë',
o xuz xiné'ë, o yugu' böchi' zanë', o nigula queë',
o yugu' zxí'inë', tu' ruí'i ládxë'ë inná bë'ë Dios,
30 bönni' ni huazi'irë' dza ni zóaru' na'a, ate' dza si'
za' idéli'në' yöl-la' na'bán idú.

Jesús riguíxjö'ë leyúbölö ca si' ilútië' Lë'

(Mt. 20:17-19; Mr. 10:32-34)

31 Jesús guché'ë quez queë' idxínnutë' bönni'
usëda queë', en rë' légaquië':

—Buli'yútsöca', ribenru' zéajru' Jerusalén, ga ni'
ilaca yúgu'të le nazúajgaca lu guichi ca gula'nné'
bönni' gulu'ë didza' uláz queë' Dios ca ral-la' gaca
quia' neda', Bönni' Guljë' Bönachi. **32** Yugu' bönni'
Jerusalén ulu'dödë' neda' lu ná'agaquië' bönni'
zi'tu', ate' ulu'titjë' neda', en ulu'lidza zi'ë neda',
en ulu'chejë' neda' zxöna'. **33** Ila'guinë' neda', ate'
tödirö ni' ilútië' neda', pero cate' gaca tsonna dza
ubana'.

34 Biti' gula'yéajni'inë' bönni' usëda queë' didza'
ni, en biti' guléquibe'enë' ca sa'yéaj le ruí'ilenë'
légaquië' didza' que, tu' naca le cabí sequi'
ila'yéajni'inë'.

Jesús ruúnë' tu bönni' yödzö Jericó nachul-la lahuë'

(Mt. 20:29-34; Mr. 10:46-52)

35 Cate' chizóa idxiné' Jesús yödzö Jericó, zoë' tu bönni' ni' nachul-la lahuë'. Rö'ë ra' nöza rin-abë' nu bi gúnnasö queë'. **36** Bönni' ni' biyönnë' ta'dödi böñachi zián ni', ate' gunabë' bizxi na' raca.

37 Böñachi ni' të lë':

—Jesús, bönni' Nazaret, ridödë' ni.

38 Ní'irö bönni' na' nachul-la lahuë' bë'ë zidzaj didza', rnnë':

—¡Jesús, zxí'ini xi'sóë' David, buéchi' ladxi' neda'!

39 Yugu' bönni' nanörugaquië' lahuë' Jesús gula'dil-lë' bönni' na' nachul-la lahuë' para usayaj ru'ë, pero lë' zídzajrö bë'ë didza', rnnë':

—¡Zxí'ini xi'sóë' David, buéchi' ladxi' neda'!

40 Ní'irö guzé' dxiz Jesús ribözë', ate' gunná bë'enë' nu tsöjlidza lë' para idxiné' lahuë'. Cate' bönni' na' nachul-la lahuë' bidxiné' lahuë' Jesús, gunábinë' Jesús lë', rnnë':

41 —¿Bizxi rë'ënu' guna' quiu'?

Bönni' na' nachul-la lahuë' rnnë':

—Ré'ënida' huöálaj guiój lahua'.

42 Jesús rë' lë':

—Chiböálaj guiój lo'. Chiböácu' tu' réajlë'u neda'.

43 La' ní'isö bulé'etenë', ate' sa'yéajlenë' Jesús, rigu'ë Dios yöl-la' ba. Lëasca' yúgu'të böñachi nacuá' ni', en bila'lé'e lë na' guca gula'gú'u Dios yöl-la' ba.

¹ Ní'irö guyázië' Jesús yödzö Jericó, en ridödë' lu yödzö na'. ² Zoë' tu bönni' lë' Zaqueo ni', bönni' lo ládjagaquië' bönni' uquízxaj, ate' dë yöl-la' tsahui' queë'. ³ Rui'i ládxë'ë bönni' ni ilé'enë' Jesús, pero biti' guca queë' tu' nacuá' bönachi zián ni', en náquië' bönni' ga rë'ëdo'. ⁴ Ní'irö carelö yöjnöruë' lógaca bönachi zián na', ate' yöjchenë' tu lu yaga para gaca ilé'enë' Jesús, tu' ral-la' tödë' ni'. ⁵ Cate' bidxinë' Jesús ni', guchisa lahuë' ruyúë' ga na' dxíë' Zaqueo na', en rë' lë':

—Zaqueo, bötjatë lu yaga na', tu' run bayudxi tsöjgá'ana' lidxu' na'a.

⁶ Ní'irö la' bötjatë' Zaqueo lu yaga, ate' lu yöl-la' rudzeja queë' guché'ë Jesús lidxë'. ⁷ Cate' bila'lé'e bönachi nacuá' ni' lë ni, gula'sí lógaquië' yúgu'të' ta'nnë' queë', ta'nnë':

—Guyázië' Jesús ugá' analenë' bönni' dul-la'.

⁸ Ní'irö guzuínë' Zaqueo, en rë' Xanru':

—Xan, buyútsöca'. Gatsaj le dë quia' gu'a quégaca bönachi yechi', en channö bi gudödi bë' buquizxja' bönachi, ubi'a quégaca bönachi na' tapa cõ'telö ca'.

⁹ Jesús rë' lë':

—Na'a dza ni bidxín yöl-la' rusólá quégaca nupa nacuá' yu'u ni, tu' nababë' bönni' ni dí'a dza queë' Abraham. ¹⁰ Bida' neda', Bönni' Guljë' Bönachi, ududilja', en udusólá' nupa nanítigaca.

Rucúdzu'ë didza' Jesús que chi cõ' dumí

¹¹ Tsanni ni' ta'yönnë' didza' ni ru'ë Jesús, rë' légaquië' le rucúdzu'ë didza', tu' chizóa ila'dxinë' yödzö Jerusalén, ate' téquinë' chizóatë ilá' lahui le rinná bë'ë Dios. ¹² Caní rnnë' Jesús:

—Zoë' tu bönni' lo, sa'yéajë' tu yödzö zi'tu' para si' lu në'ë yöl-la' unná bë', ate' ní'irö huödë'. ¹³ Cate' chizóa tsejë' ni' bulidzë' chië' bönni' huen dxin queë', en bë'ë que queégaquië' tu cö' huéaj dumí, ate' rë' légaquië': "Guli'guílajlen dumí ni tsanni huöda'." ¹⁴ Yugu' bönni' uládz queë' biti' ta'lé'enë' lë' dxi'a, ate' gula'söl-lë'ë yugu' gubáz quégaquië' ga ni' tsejë', ila'nnë': "Biti' rë'ënitu' inná bë'enë' bönni' ni netu'." ¹⁵ Ní'irö guzxí' lu në'ë yöl-la' unná bë', ate' budxinë' ladzë'. Cate' bidxinë' ni' gunná bë'enë' nu tsöjlidza yugu' bönni' huen dxin na' budödë' lu ná'agaquië' dumí na', para inözinë' gáca'xi bulu'guílajlenë' le tu tuë'. ¹⁶ Cate' bönni' zi'alö na' bidxinë' lahuë', rnnë': "Xan, tu cö' dumí quiu' na' chibén icja ia'chí cö' ca'." ¹⁷ Xanë' na' rë' lë': "Tsahui' benu'. Nacu' huen dxin tsahui'. Tu' dxí'ado' bugunu' dxin láti'do'os na' guta' lu no'o, na'a, guna' ga inná bë'enu' chi yödzö." ¹⁸ Ní'irö bidxinë' ia'tüë' bönni' huen dxin na' lahuë' lë', rnnë': "Xan, tu cö' dumí quiu' na' chibén icja ia'gayu' cö' ca'." ¹⁹ Xanë' na' rë' ca' lë': "Inná bë'enu' gayu' yödzö." ²⁰ Ní'irö bidxinë' ia'tüë' lahuë' lë', rnnë': "Xan, ni dë tu cö' dumí quiu' na'. Ben chi'a le, butúlida' le lari'. ²¹ Caní bena' tu' rádxida' li', tu' nacu' bönni' bizzaj. Runu' ca na' ta'nná bönnachi: Ruzi'u le cabí buzú', en rulapu' ga biti' guzu'." ²² Ní'irö xanë' na' rë' lë': "Nacu' huen dxin biti' naca' tsahui'. Ni'a que didza' bë'u uchi'a usöröa' li'. ¿Réquibe'nu' naca' bönni' bizzaj: Ruzi'a le cabí buzúa', en rulapa' ga biti' guza'?" ²³ Na'a, ¿bizz que biti' yöjlú'u dumí quia' na' ga gun icja, para cate' huöda', uzi'a le idú len icja na??" ²⁴ Ní'irö rë' nupa nacuá' ni': "Guli'cúa lu në'ë

dumí na', ate' guli'güí'i queë' bönni' na' dë queë' chi cö' dumí." ²⁵ Légaquië' té' lë': "Xan, chidë queë' chi cö' dumí." ²⁶ Ní'irö bubí'ë didza' xángaqüië', rnnë': "Rea' libí'ili': Nu rugún dxi'a dxin le do' dë lu në'e, ulu'zxöni ládxi'gaca lë' ia'late', pero nu biti' rugún dxi'a dxin le do' dë lu në'e, ulu'béaj lu në'e lë na' guta' lu në'e. ²⁷ Ca naca quégäquië' bönni' ni' biti' ta'lé'enë' neda' dxi'a, en biti' gulé'ënnë' inná bé'eda' légaquië', guli'tsöjzxí' légaquië' para ídigaquië' ni, ate' guli'guti légaquië'."

*Len yöl-la' ba zxön razië' Jesús yödzö Jerusalén
(Mt. 21:1-11; Mr. 11:1-11; Jn. 12:12-19)*

²⁸ Cate' budxi gunnë' caní Jesús, buguélë'ë xinözë', sa'yéajë' zaca' yödzö Jerusalén. ²⁹ Cate' bilä'dxinë' gala' ga nacuá' yödzö Betfagé, en yödzö Betania, ga naca ra' gui'ado' nazí'i le Gui'a Yaga Olivo, gusöl-lë'ë Jesús chopë' bönni' usëda queë', ³⁰ ate' rë' légaquië':

—Guli'tséaj yödzödo' ni' ca dödilö ga zóaru', en cate' idixinli' ni', tsöjxáca'li'-ba' tuba' bùrrodo' nága'ba' ni', bùrrodo' na' cuntu nu ribíani lëba'. Guli'sedxi-ba', en guli'duchë'-ba' quia' ni. ³¹ Channö zoa nu rinábini libí'ili', inná: "¿Bizx que risédxili'-ba??", ubí'ili' didza' caní innali': "Xanru' riquinnë'-ba'."

³² Söjáquië' bönni' usëda queë' na' nasöl-lë'ë, ate' yöjxáca'gaquië'-ba' ca na' chigudxë' Jesús légaquië'. ³³ Cate' gula'sedxë'-ba' bùrrodo' na', yugu' bönni' xanba' té' légaquië':

—¿Bizx que risédxili'-ba' bùrrodo' na'?

³⁴ Bulu'bi'ë didza', ta'nnë':

—Xanru' riquinnë'-ba'.

35 Gula'ché'ë-ba' ga na' zoë' Jesús. Cate' chigula'xóë' yugu' lari' tsölá'a quégaquië' cúdzu'ba' búrrodo' na', bulu'dxië' Jesús cúdzu'ba' lahui lari' na'. **36** Gapa ral-la' tödë' Jesús, gula'chiljë' lari' quégaquië' la' nöza. **37** Cate' chibila'dxinë' gala' ga zoa lidinni que Guí'a Yaga Olivo, lu yöl-la' rudzeja quégaquië' gula'sí lógaquië' yúgu'të bönni' dá'gaquië' Jesús, tu'ë zidzaj didza', ta'gu'ë Dios yöl-la' ba, ni'a quégaca yugu' yöl-la' huáca zxön bila'lé'enë' benë' Jesús. **38** Ta'nnë':

—¡Yöl-la' ba bönni' unná bë' ni zë'ë uláz queë' Xanru' Dios! ¡Yehua' yubá za' le ribequi dxi ládxí'ru'! ¡Yöl-la' ba Dios!

39 Ní'irö yugu' bönni' yudo' fariseo nútsa'gaquië' ladaj böñachi zián ni' të' Jesús, ta'nnë':

—¡Bönni' Usedi, gudil-la yugu' bönni' usëda quiu'!

40 Bubi'ë didza' Jesús, re' légaquië':

—Rea' libíili': Channö ila'cuá' dxíë' bönni' ni, yugu' guiój hualu'i caz zidzaj didza'.

41 Cate' bidxinë' Jesús gala' ra' yödzö na', en rilé'enë' le, ní'irö ribödxë' que, **42** rnnë':

—Raca ládex'a huanözili' na'a dza le gaca gun ga cuéqui dxi ládxí'li' lahuë' Dios, pero na'a chinagachi' queëli', para cabí ilé'eli' le. **43** Huala'dxín queëli' dza cate' nupa biti' ta'lé'e libíili' dxí'a ila'bequi zö'ö idú gásibi'ilö ga zóali', en ila'gú'u libíili' lë'alö, ate' yúgu'të lataj idú gásibi'ilö ilúnlenë' libíili' gudil-la. **44** Ulu'quínnajé' zö'ö run chi'i yödzö queëli', en ilútië' nupa nacuá' lu yödzö ni. Biti' ugá'ana guiój lahui luzé'e. Yúgu'të lë ni gaca queëli' tu' cabí gúquibe'eli' dza bidë' Dios buduyúë' libíili'.

*Rulatjë' Jesús lō'a yudo'
(Mt. 21:12-17; Mr. 11:15-19; Jn. 2:13-22)*

45 Ní'irö guyázië' Jesús lō'a yudo', en gusí lahuë' rubéajë' ní'ilö yúgu'të nupa tuti', en nupa to'o ga naca lō'a yudo'. **46** Rë' légaquië':

—Nazúaj lu guichi lá'ayi, rnna: “Lidxa' naca yu'u ga ulu'lidza bönachi Dios”, pero libí'ili' chin-unli' le ca tu lídxigaca bönni' gubán.

47 Yugu' dza rusédinë' Jesús bönachi ga naca chila yudo', ate' gula'zóa gula'bö'ë bixúz unná bë', len bönni' yudo' tu'sédinë', en yugu' bönni' lo que lu yödzö ilútië' Lë'. **48** Biti' bulu'dzölinë' nacxi ilútië' Lë', tu' idú ládxi'gaca tu'zé nágagaca yúgu'të bönachi xtídzë'ë.

20

*Yöl-la' unná bë' dë lu në'ë Jesús
(Mt. 21:23-27; Mr. 11:27-33)*

1 Tu dza, cate' ni' rusédinë' Jesús bönachi ga naca chila yudo', en riguíxjö'ë didza' dxi'a, bila'dxinë' yugu' bixúz unná bë', en bönni' yudo' tu'sédinë', len bönni' gula tu'zéajni'inë', ga na' zoë', **2** ate' të' Jesús:

—Gudixjö'i netu'. ¿Bizxi yöl-la' unná bë' dë lu no'o runu' caní? ¿Nuzxi caz budödi lu no'o yöl-la' unná bë' ni?

3 Bubi'ë didza' Jesús, rë' légaquië':

—Inábida' ca' libí'ili' tu didza', ate' ubí'ili' innali'.

4 ¿Nuzxi gusöl-la' Juan ruquilë' bönachi nisa? ¿Naru' Dios, o bönachi?

5 Gulún xtídza'gaquië' la' légacasë' bönni' yudo' na', ta'nnë':

—Channö innaru': Gusöl-lë'ë Dios lë', guië' rë'u: “¿Bizx que biti' guyéajlë'ëli'-në?” ⁶ Channö guiëru'-në': Gula'söl-lë'ë yugu' bönni' lë', böñachi lu yödzö ni ulu'ladxi' rë'u guiøj, tu' nöziguequi bë'ë didza' Juan na' uláz quee' Dios.

⁷ Ní'irö bulu'bi'ë didza', ta'nnë':

—Biti' nöztu' nuzxi na' gusöl-la' Juan.

⁸ Ní'irö Jesús rë' légaquië':

—Neda' ca' biti' guía' libí'ili' bi yöl-la' unná bë' rúnida' caní.

Yugu' bönni' huen dxin biti' nácagaquië' tsahui'
(Mt. 21:33-44; Mr. 12:1-11)

⁹ Ní'irö la' gusí lotë' Jesús ruí'ilenë' böñachi nacuá' ni' didza'. Rucúdu'ë didza', rnne':

—Zoë' tu bönni' budë'ë yugu' lubá uva lu xiyúë', ate' budödë' luyú na' lu ná'agaquië' bönni' huen dxin para ilún gatsjë' len lë' le ulu'zi'ë, ate' guyijë' zi'tu' ga ni' bugá'anë' xidzé. ¹⁰ Cate' bidxín dza ulu'chibë' uva luyú na', gusöl-lë'ë tuë' bönni' gubáz quee' ga na' nacu'ë huen dxin na' para si'ë uláz quee' que le ulu'zi'ë, pero huen dxin na' gulündë'ë lë' zi', en bulu'söl-lë'ë lë' cá'asö. ¹¹ Leyúbölö gusöl-lë'ë ia'túë' gubáz quee', ate' légaquië' gulündë'ë lë' ca' zi', en gulu'ë dö' quee', ate' bulu'söl-lë'ë lë' cá'asö. ¹² Leyúbölö gusöl-lë'ë quégaquië' bönni' bunni gubáz quee', ate' bulu'dxië' ca' lë' huë', en bulu'béajë' lë' ní'ilö luyú na'.

¹³ 'Ní'irö guzá' ládxë'ë xani luyú na', gunnë': “¿Nacxi guntsa'? Isöl-la'a zxí'ini caza' nadxi'ida'bi' quégaquië'. Cate' ila'lé'enë'-bi', nadxi ca' ilunë'-bi' bal.” ¹⁴ Ní'irö, cate' yugu' bönni' huen dxin na' bila'lé'enë'-bi', gulún xtídza'gaquië' la' légacasë',

ta'nné': "Bi'i ni guequi queébi' luyú ni. Guli'dá, gútiru'-bi', para guequi queéru' le ral-la' guequi queébi'." ¹⁵ Bulu'béajé'-bi' ní'ilö luyú na', en gulútië'-bi'.

'Na'a, ¿nacxi caz guné' xani luyú na' quégaquië'? ¹⁶ Guídë', en gútië' yugu' huen dxin na', ate' udödë' luyú queë' lu ná'agaca bönnachi yúbölö.

Cate' bönnachi nacuá' ni' bila'yöni lë ni, gula'nné':
—¡Inná Dios biti' gaca caní!
¹⁷ Ní'irö buyué' Jesús légaquië', rnné':
—¿Bizxi sa'yéaj lë na' nazúaj lu guichi lá'ayi,
rnna:
Guïöj na' gula'rú'uné' bönni' huen zö'ö,
guiöj ni chinaca guiöjlen squin zö'ö?
¹⁸ Núti'tës nu ibixi lahui guïöj ni, quitsaj nu na', ate'
nu bönni' tsöjbága' guïöj ni lë', uzxuzzaj lë'.

*Ca naca dumí ta'guizxaj lázagaca bönnachi
(Mt. 21:45-46; 22:15-22; Mr. 12:12-17)*

¹⁹ La' dza ní'isö, yugu' bixúz unná bë' len bönni' yudo' tu'séedinë' gula'zóa gula'bö'ë ila'zönë' Jesús, tu' téquibe'enë' gunné' quégaquië' lë na' bucúdzü'ë didza', pero guládxinë' bi ilún bönnachi zián nacuá' ni'. ²⁰ Ní'irö bulu'yúyenië' Jesús, en gula'söllë'ë yugu' bönni' para ulu'béajé' Lë' didza', bönni' ulu'lui'i cuíngaquië' ca bönni' tsahui', para ilunë' ga bi inné' Jesús, para gaca ulu'dödë' Lë' lu në'ë bönni' rinná bë'enë' uláz queë' César. ²¹ Para ilunë' caní, gula'nábinë' Jesús, ta'nné':

—Bönni' Usedi, nöztu' rnno' le nácatë, en rusédinu' le nácatë, en biti' ruchi'a rusöröu' ca naca le tu'lui'isö lahui bönnachi, pero idútë li naca ca rusédinu' xibá queë' Dios. ²² Gudíxjö'i netu'.

¿Naru' run bayudxi quizzaj laztu' queë' César, bönni' Roma rinná bë'ë, o cabí?

²³ Réquibe'enë' Jesús le té'ënnë' ilunë' queë', ate' rë' légaquië':

—¿Bizz que rizí' bë'ëli' neda'? ²⁴ Buli'lui'itsöqui' neda' tu dumí ridá. ¿Nuzxi lahui da' lë'e ni, en nuzxi le nazúaj ni?

Bulu'bíë didza', ta'nné':

—Queë' César na'.

²⁵ Ní'irö Jesús rë' légaquië':

—Buli'nödzaj queë' César le nequi queë' César, ate' queë' Dios le nequi queë' Dios.

²⁶ Biti' guca ilunë' ga bi innë' Jesús para gaca ulu'zéguië' Lë' didza' lógaca bönachi zián na', pero bulu'báninë' ca naca didza' bubi'ë, ate' bulu'sayaj ruá'agaquië'.

*Ca gaca quégaca nupa ulu'bán lu yöl-la' guti
(Mt. 22:23-33; Mr. 12:18-27)*

²⁷ Ní'irö yugu' bönni' yudo' saduceo, nupa na' ta'nná biti' ulu'bán nupa chinátigaca, bila'dxinë' ni', ate' gula'nábinë' Jesús, ta'nné':

²⁸ —Bönni' Usedi, Moisés buzúajë' queëru' lu guichi, le rnna: "Channö gátië' nu bönni', ate' ugá'ananu nigula queë', en channö cuntu nu zoa bi'i queë', ní'irö bi'i böchi'bi' ral-la' sí'ibi'-nu nigula queë' na', para uzóabi' bi'i queëbi' böchi'bi' na' gútibi'." ²⁹ Gula'cuá'abi' gadxi bi'i bönni' nácagacabi' böchi'bi', ate' bi'i zí'alö na' butsaga ná'alenbi' bi'i nigula, en gútibi', biti' zóabi' bi'i queëbi'. ³⁰ Ní'irö bi'i buropi na' butsaga ná'alenbi'-nu nigula na', ate' gútibi' ca' bi'i ni, biti' zóabi' bi'i queëbi'. ³¹ Butsaga ná'alenbi'-nu bi'i

bunni na', ate' la' tuz ca gulunbi' igádxitëbi', ate' gulátibi', biti' zóabi' bi'i quégacabi'. ³² Ga búdxiteë, gútinu ca' nigula na'. ³³ Na'a, cate' ulu'bán nupa chinátigaca, ¿núzzilöbi' guéquinu nigula na' queëbi', tu' bulu'tsaga ná'alenbi'-nu igádxitëbi'?

³⁴ Ní'irö bubí'ë didza' Jesús, rë' légaquië':

—Tu'tsága ná'agaca böñachi dza ni zóaru' na'a, en tu'nödzjë'-bi' zxí'inigaquië' para ulu'tsaga ná'agacabi'. ³⁵ Na'a, nupa nácagaca lesaca' ulu'bán lu yöl-la' guti, en tsöjcuá' yödzölió si' gata', biti' ilún yöl-la' rizóalen nigula, en biti' ulu'tsaga ná'agaca. ³⁶ Caní gaca, tu' cabirö ilati nupa na' ulu'bán lu yöl-la' guti, pero ilácagaca ca nácagaquië' gubáz lá'ayi queë' Dios, en ilácagaca zxí'ini cazë' Dios. ³⁷ Ca na' ral-la' ulu'bán nupa chinátigaca, ruluí'inë' rë'u Moisés caz ga na' nazúaj lu guichi ca naca que yaga yötsi' régui, ga ni' ru'ë didza' Xanru', rnñë' náquië' Dios queë' Abraham, en Dios queë' Isaac, en Dios queë' Jacob. ³⁸ Dios náquië' Dios, calëga quégaca nupa nátigaca tsaz, pero quégaca nupa nabángaca, tu' nabángaca lahuë' Lë' yúgu'të böñachi, sal-la' gulati luyú ni.

³⁹ Ní'irö bulu'bi'ë didza' bal-lë' bönni' yudo' usedi, ta'nnë':

—Bönni' Usedi, dxí'ado' gunnó'.

⁴⁰ Bítirö bulu'rúguinë' ila'nábinë' Lë' didza'.

¿Nuzxi zxí'ini náquië' Cristo?

(Mt. 22:41-46; Mr. 12:35-37)

⁴¹ Ní'irö Jesús rë' légaquië':

—¿Nacxi caz na' ta'nnë': “Cristo náquië' zxí'inë' David”? ⁴² David caz bë'ë didza' le nazúaj lu guichi lá'ayi ga nazúajgaca salmo, le rnna:

Xanru' Dios gudxë' Xana':

"Gurö'i cuita lë'a ibëla

⁴³ cate' gunra' ga ulu'zechu zxíbigaca lo' nupa
ta'dá'baga' Li".

⁴⁴ David caz na' gunnë' queë' náquië' Xanë'.
¿Nacxi caz naca, rnnali' libí'ili' náquië' zxí'inë?

Jesús ruzégui'ë diza' bönni' yudo' tu'sédinë'

(Mt. 23:1-36; Mr. 12:38-40; Lc. 11:37-54)

⁴⁵ Tsanni ni' yúgu'të bönnachi nacuá' ni' tu'zë
nágagaca Jesús, re' yugu' bönni' usëda queë':

⁴⁶ —Guli'gún chi'i cuinli' quégaquië' bönni'
yudo' tu'sédinë', tu' ta'yaza ládx'i'gaquië' ta'dë'
nácugaquië' lari' tunna, en té'ennë' ulu'lidza
bönnachi légaquië' zxön gapa naca lu yë'ëyi, en
ta'yaza ládx'i'gaquië' ca' ta'bö'ë lataj lo gapa
tu'dubë' tu'sëdë' queë' Dios, en gapa ta'bö'ë tahuë'.

⁴⁷ Ta'gúë' lídxigacanu nigula uzëbido', ate' para
ulu'lui'i tsahui' cuíngaqüië', xidzé tu'lidzë' Dios.
Yugu' bönni' ni, yénni'térö gunë' Dios ga ila'gu'i
ila'záquië'.

21

Gun le gulú'unu tu nigula yechi' lahuë' Dios

(Mr. 12:41-44)

¹ Ga na' zoë' Jesús chila yudo', guchisa lahuë', en
rile'enë' yugu' bönni' dë yöl-la' tsahui' quégaquië',
ta'gu'ë dumí lu guí'ina que dumí gun que yudo'.

² Bilé'enë' ca' tu nigula yechi' uzëbido', rigú'unu
chopa dumí lárido', le nazáca'gaca láti'do'os.

³ Rnnë' Jesús:

—Le nácatë rea' libí'ili', tu le zxöntérö gulú'unu
nigula yechi' uzëbido' ni ca ia'zíca'rö bönnachi na'

ta'gu'ë dumí. ⁴ Yúgu'të', tsca le nadödi bë' dë quégaquië', gula'gu'ë dumí que yudo', pero nigula ni, lu yöl-la' yechi' queénu gulú'unu idútë le dë queénu, le ral-la' gáhuinu.

Riguíxjö'ë Jesús ca ulu'sunítië' yudo'
(Mt. 24:1-2; Mr. 13:1-2)

⁵ Nacuá' ni' nupa tuí'i didza' ca naca que yudo' na', ca na' nazí'i biquitaj que, yugu' guiój nazácalé'egaca, en yugu' gundo' nácagaca lachi, ate' Jesús rë' légaquië', rnnë':

⁶ —Yúgu'të lë ni rilé'eli', huadxín dza cate' bíti'rö ugá'ana guiój lahui luzé'e ni, tu' ulu'suniti böñachi yudo' ni.

Le ilaca bë' cate' si' idxín dza údxi
(Mt. 24:3-28; Mr. 13:2-23)

⁷ Ní'irö gula'nábinë' Jesús, ta'nnë':
 —Bönni' Usedi, ¿bátaxi gaca lë ni? ¿Bixxi gaca bë' chizóa gaca caní?

⁸ Bubi'ë didza' Jesús, rnnë':
 —Guli'gún chi'i cuinli', para cabí nu si' ye'e libí'ili', tu' ila'lá'gaquië' bönni' zián, en ila'zí'i lágäquië' ca lea' neda', ila'nnë' nácagaquië' Cristo, en ila'nnë': "Chizá' gala' dza údxi." Neda' rea' libí'ili': Biti' tséajlenli' légaquië'. ⁹ Cate' yónili' raca gudil-la, en ta'dá'baga' böñachi yúlahui', biti' gadxi idzöbili', tu' run bayudxi ilaca le caní, pero biti' zuítëni dza údxi.

¹⁰ Ní'irö rë' ca' légaquië':
 —Til-la tu yödzö len ia'tú yödzö, ate' böñachi tu ga nu rinná bë' ila'díl-lalen böñachi ia'tú ga nu rinná bë'. ¹¹ Tödigaca budó' zxu', ate' zián lataj gaca

gubín, en ilatsaj yödzöhuë' zxön. Ila'lá'lahui lúzxiba le ilún gadxi böñachi, en le ilaca bë'.

12 'Zí'atëlö cate' si' ilaca lë ni, ila'zön böñachi libí'ili', en ila'bía ládx'i'gaca libí'ili'. Ila'chë'ë libí'ili' gapa tu'dubë' tu'sëdë' queë' Dios para ilútië' libí'ili', en ila'gu'ë libí'ili' lidxi guïë. Ila'chë'ë libí'ili' lógaquië' bönni' ta'nná bë'ë, en lógaquië' bönni' lo, tu' dá'ali' neda'. **13** Gaca caní queëli' para séqui'li' gunli' ba nalí quia' neda'. **14** Tsutsu guli'gún ládx'i'li', para cabí cuéqui ícjali' zí'älö nacxi innali' uláz queëli', **15** tu' gunna' queëli' didza' ubí'ili', en yöl-la' réajni'i, para cabí gaca ulu'cul-lë' libí'ili', en para cabí gaca bi ila'nné' que xtídza'li' bönni' ni' biti' ila'lé'enë' libí'ili' dxi'a. **16** Ní'irö xuz quézili' ulu'dödë' libí'ili', en cá'anqueze yugu' bönni' böchi' quézili', en yugu' di'a dza que quézili', en yugu' böchi' luzë'e quézili', ate' ilútië' bál-lali'. **17** Yugu'të böñachi ulu'zóa libí'ili' tsölá'älö tu' dá'ali' neda', **18** pero biti' initi nitú guitsa' ícjali'. **19** Channö ugá'anali' tsutsu, idéli'li' yöl-la' na'bán idú.

20 'Cate' ilé'eli' bönni' röjáquië' gudil-la nagú'ugaquië' lë'a Jerusalén, inözili' chibidxín dza initi yödzö ni. **21** Ní'irö nupa nacuá' luyú Judea ral-la' ila'zxunnaj ni, en tsöjaca gapa naca guí'ado', ate' nupa nacuá' lu yödzö ni ral-la' ila'rúaj ni, ate' nupa nacuá' la' guixi', biti' ral-la' ulu'dxín lu yödzö ni. **22** Yugu' dza ni' Dios gunë' xíguia' nupa nacuá' yödzö ni para gaca yúgu'të le nazúaj lu guichi lá'ayi ca ral-la' gaca quégaquië'. **23** Cate' idxín dza ni', bica' bayechi' yugu' nigula nuá'gacanu-bi' bí'ido' si' ilaljbi', en nigula tu'gádx'i'nu-bi' bí'ido', tu' ila'gui'i ila'záca'da' böñachi nacuá' ni', ate' Dios

gúndë'ë bönachi ni' xíguia'. ²⁴ Ilátië' ziánë' lu gudilla na', ate' ila'chë'ë ia'bal-lë' nadzúngaquië' ga ila'dxinë' idútë yödzölió, ate' yödzö Jerusalén ni, ulu'léaj ulu'libë' le bönni' zi'tu', cate' izá'arö dza quégaquië'.

*Le ilaca bë' si' huödë' Bönni' Guljë' Bönachi
(Mt. 24:29-35, 42-44; Mr. 13:24-37)*

²⁵ Gunnë' ca' Jesús:

—Ni'irö ila'cuá' le ilaca bë' lu gubidza, en lu beo', en yugu' lu bólaj lúzxiba, ate' luyú ni ulu'chixi bönachi, en iládxiguequi, tu' yön chi'i guziú' yu que nísado', en que le riyasa ridxía nisa na'. ²⁶ Ulu'dú ládzi'gaca lu yöl-la' radxi quéguequi tu' ila'zá' ládzi'gaca quégaca le ral-la' ilaca lu yödzölió, en ila'zxizi le nalá'gaca lúzxiba. ²⁷ Ni'irö ila'lé'enë' neda', Bönni' Guljë' Bönachi, guída' lu böaj lúzxiba, dë lu na'a yöl-la' unná bë', ate' ilá' lahui yöl-la' zxön quia'. ²⁸ Cate' isí lo ilaca lë ni, buli'tipa ládzi'ilí, en guli'chisa loli', tu' chizóa udxina' neda', para huöá'ua' libí'ilí'.

²⁹ Jesús gudxë' ca' légaquië' tu le bucúdzu'ë didza', rnñë':

—Buli'yútsöca' ca raca que yaga higo, en que bíti'tës yaga yúbölö. ³⁰ Cate' rile'eli' ta'lén ni'a në'e huë'ënido', nöz quézili' chizá' gala' cusu ba. ³¹ Lësca' caní, cate' ilé'eli' chitaca yugu' lë ni, inözili' chizá' gala' dza idinná bë'ë Dios luyú ni.

³² 'Le nácatë rea' libí'ilí', biti' ilátigaca bönachi ila'cuá' dza ni' cate' ilaca yúgu'të lë ni. ³³ Ila'dödi que lúzxiba, en que luyú ni, pero xtídza'a, biti' tödi cá'asö, tu' idxín caz ca rnna.

³⁴ 'Guli'gún chi'i cuinli' para cabí güí'ili' lataj tsaza icja ládxi'do'oli' le gun ditaj libí'ili', lë na' naca yöl-la' rágulé'e, en yöl-la' rizudxi, en yöl-la' ruúbi rugui'i, para cate' idxín dza ni', cabí sóali' niti ladxi', ³⁵ en para cabí gaca queéli' ca tu le rizón böñachi, ca naca le gaca quégaca yúgu'të böñachi nacuá' idútë yödzölió. ³⁶ Que lë ni na', guli'soa ban ladxi', en buli'lídzatica'së' Dios, para gaca uláli' lu lë na' ral-la' ilaca, en para cabí utu'ili' cate' idxinli' lahua' neda', Bönni' Guljë' Bönachi.

³⁷ Lahui' dza rizóë' Jesús chila yudo', rusédinë' böñachi, ate' chi'i dzö'ölö rirúajë' ni', en rejë' lu guí'ado' nazí'i le Guí'a Yaga Olivo. ³⁸ Yugu' zila bila'dxín yúgu'të böñachi ga zoë' Jesús chila yudo' para ulu'zë nágagaca xtídzë'ë.

22

Tun xtídz'a'gaquië' ilútië' Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Cate' chizóa idxín laní cate' tahuë' yöta xtila cabí nazí'i cúa zi que, nazí'i le Pascua laní na', ² bulu'dubë' yugu' bixúz unná bë' len bönni' yudo' tu'sédinë'. Ta'zóa ta'bö'ë ilútië' Jesús, pero biti' gula'zéqui'në' tu' tádxinë' bi ilún böñachi.

³ Ní'irö Satanás tu' xihui' yöjtsaga Judas. Judas lë' ca' Iscariote, en nababë' idxínnutë' gubáz nasöl-lë'ë Cristo. ⁴ Guyijë' Judas na', yöjé'lenë' didza' yugu' bixúz unná bë', en bönni' dë lu ná'agaquië' que yudo', nacxi gunë' para udödë' Jesús lu ná'agaquië'. ⁵ Bulu'dzéjanë' bönni' yudo' na', en gula'zi' lu ná'agaquië' ulu'nödzjë' queë'

dumí. ⁶ Raza ládxë'ë Judas lë ni, ate' rizóá ribö'ë udödë' Jesús lu ná'agaquië' bagáchi'sö.

*Le ráguru' le rusá' ládxí'ru' ca gútië' Xanru'
(Mt. 26:17-29; Mr. 14:12-25; Jn. 13:21-30; 1Co.
11:23-26)*

⁷ Bidxín dza na' tahuë' yöta xtila cabí nazí'i cúa zi que, cate' ral-la' ilútië'-ba' bö'cu' zxila' le tahuë' dzö' Laní Pascua. ⁸ Jesús gusöl-lë'ë Pedro, en Juan, rnnë':

—Guli'tséaj, guli'tsöjpá'a queëru' le gáguru' dzö' Laní Pascua.

⁹ Të' Lë':

—¿Gazxi rë'ënu' tsöjpá'atu' queëru'?

¹⁰ Jesús rë' légaquië', rnnë':

—Buli'yútsöca', cate' tsú'uli' lu yödzö ni, irúajë' tu bönni' dutságuië' libí'ili', söjnu'ë tu rö'ö nisa. Guli'tséajlenë' ga idxíntëli' yu'u ga tsázü'. ¹¹ Guli'guíë' xan yu'u na': “Bönni' Usedi rë' li':

¿Gazxi zoa yu'u laní ga gágulena' yugu' bönni' usëda quia' dzö' Laní Pascua?” ¹² Ní'irö ulu'inë' libí'ili' tu yu'u zxön xitsá' ga ni' chinabá'a. Buli'pá'a ni' le gáguru'.

¹³ Ní'irö yøjáquië', en yøjxáca'gaquië' ca na' chigudxë' Jesús légaquië', ate' bulu'pé'ë ni' le ilahuë' dzö' Laní Pascua.

¹⁴ Cate' bidxín dzö' na', gurö'ë Jesús ga ilahuë', ate' bönni' gubáz queë' na' gula'bö'lenë' Lë' tsözxön. ¹⁵ Ní'irö Jesús rë' légaquië':

—Gúcada' ládex'a gágulena' libí'ili' tsözxön xtsö' ni zí'atëlö cate' si' qui'i saca'a, en gátia'. ¹⁶ Rea' libí'ili': Bíti'rö gahua' lë ni cate' idxinxrö dza gaca le rulu'isö xtsö' ni ga ni' rinná bë'ë Dios.

17 Gudélë'ë Jesús tu zxíga'do', en gudxë' Dios: "Xclenu'." Ní'irö rë' légaquië':

—Guli'sí' lë ni, en guli'guí'aj latí' huéaj, **18** tu' rea' libí'ili': Bíti'rö guí'ja' xisi uva cate' idxinxrö le rinná bë'ë Dios.

19 Ní'irö gudélë'ë yöta xtila, en gudxë' Dios: "Xclenu'." Gudödi ni' buzzuzxjë' le, en bë'ë que queégaquië', rnnë':

—Lë ni naca idútë le naca' le rudöda' uláz queéli'. Guli'gún caní para usá' ládxí'li' neda'.

20 Cate' budxi gulahuë', lësca' caní bë'ë didza' que zxíga'do' na', rnnë':

—Zxíga'do' ni rulu'i ca naca didza' cubi rucá'ana tsahui', ate' rön quia' run tsutsu le, rön na' ilalaj ni'a queéli'.

21 'Na'a, bönni' na' udödë' neda' lu ná'agaca böñachi rö'ë rágulenë' neda' tsözxön. **22** Le nácatë huayija' ga ilútië' neda', Bönni' Guljë' Böñachi, en gaca quia' ca na' nazúaj lu guichi lá'ayi ca ral-la' gaca quia', pero bica' bayechi' bönni' na' udödë' neda'.

23 Ní'irö gula'sí lógaquië' ta'nábinë' Lë' tu tuë', ta'nnë':

—¿Núzzilötü' nu gun caní?

Tu'i xtídza'gaquië' núzzilögäquië' gáquië' lo

24 Ní'irö gulu'ë didza' la' légacasë' núzzilögäquië' idéli'në' lataj lo. **25** Jesús gudxë' légaquië':

—Yugu' bönni' unná bë' tu'gunë' dxin yöl-la' unná bë' quégaquië', ta'nná bë'enë' böñachi, ate' nupa ni dë lu ná'agaca yöl-la' unná bë', lëgaquië' bönni' tácalen. **26** Libí'ili' biti' ral-la' gunli' caní, pero nu naca lo ládjali' ral-la' gaca ca nu naca

cuídi'térö, ate' nu rinná bë' ral-la' gaca ca nu run dxin quéguequi luzë'e. ²⁷ ¿Núzxilö na' nácarö lo, nu na' rö'ö ragu, o nu rupá' la' huagu? ¿Naru' calëga nu na' rö'ö ragu nácarö lo? Neda' zóalena' libí'ili' ca nu rupá' la' huagu.

²⁸ 'Libí'ili' ni guzóalenli' neda' cate' ni' bi guca quia', yugu' le gula'zí' bë' neda'. ²⁹ Que lë ni na' udöda' lu ná'ali' tu ga inná bë'ëli', ca na' benë' Xuza', budödë lu na'a ga inná bë'a neda'. ³⁰ Caní guna' para gaca cö'öli', en guí'aj gágulenli' neda' ga ni' inná bë'a, ate' cö'öli' xilataj cázali' ga uchi'a usöröli' idxinnu cö' zxí'ini xi'sóë' Israel.

Rnnë' Jesùs innë' Pedro biti' núnbë'ë Lë'
(Mt. 26:31-35; Mr. 14:27-31; Jn. 13:36-38)

³¹ Gunnë' ca' caní Xanru':

—Simón, Simón. Buyútsöca'. Chigunaba Satanás tu' xihui' libí'ili', para urixi udödi libí'ili' ca nu rurixi rudödi zxoa' xtila, ³² pero chibulidza'-në' Dios, en gunábida' Lë' gácalenë' li', para cabí údxí udú yöl-la' réajlë' quiu' neda'. Na'a, cate' huöácu' quia', butipa ládxí'gaquië' böchi' luzó'o.

³³ Pedro rë' Lë':

—Xan, chizóa' sá'lena' Li', calëgasö tseja' lidxi guíë, pero lësca' gátilena' Li'.

³⁴ Jesùs rë' lë':

—Pedro, rea' li': Zí'alö cödxiba' böra na'a, chigudá'bagu'u tsonna luzuí, innó' cabí núnbë'u neda'.

Le benë' Jesùs cate' chizóa ilútië' Lë'

³⁵ Jesùs gunábinë' légaquië', rnnë':

—Cati' gusöl-la'a libí'ili' cabí nuá'ali' yöxa j yöta,
en calëga buzudi dumí, en calëga chop a cö'
xirächuli', ¿naru' bi biyadzaj queéli'?

Légaquië' ta'nné':

—Biti' bi.

³⁶ Ní'irö rë' légaquië':

—Na'a, nu dë yöxa j yöta que ral-la' guá' le, ate'
lësca' caní ral-la' gun nu dë que buzudi dumí, ate'
nu biti' dë que guíë tuchi' ral-la' guti' lari' rixóa
yeni, en si' tu guíë tuchi'. ³⁷ Rea' libí'ili': Run
bayudxi gaca quia' lë na' nazúaj lu guichi lá'ayi,
rnna: "Guluné' queé' ca tuné' quégaca nupa tua'
dö", ate' ilaca yúgu'të le nazúajgaca lu guichi ca ral-
la' gaca quia'.

³⁸ Ní'irö légaquië' ta'nné':

—Xan, ni dë chop a guíë tuchi'.

Lë' rë' légaquië':

—Chinaca.

*Jesús rulidzë' Dios la' yëla Getsemaní
(Mt. 26:36-46; Mr. 14:32-42)*

³⁹ Ní'irö birúajé' Jesús, en ca run cazë' sa'yéajé'
lu Guí'a Yaga Olivo, ate' yugu' bönni' usëda queé'
söjácalené' Lë'. ⁴⁰ Cate' bila'dxiné' ni', Jesús rë'
légaquië', rnné':

—Buli'lídzë' Dios, inábili'-në' cabí gata' lataj si'
bë' tu' xihui' libí'ili'.

⁴¹ Ní'irö Jesús guzé'ë ga na' nacu'ë, en gudödë'
ia'lati' tsca ga ridxín tu guiój rirú'uniru', ate' ni'
buzúa zxibë', en rulidzë' Dios. ⁴² Rnné':

—Xúz, channö rë'ënu', bucuás a ga zoa' lë na' ral-
la' quí'i saca'a, pero calëga ca rë'ënda' neda', pero
ca rë'ënu' Li' gunu'.

43 Ní'irö bulu'i lahuë' gubáz lá'ayi queë' Dios, zë'ë yehua' yubá, ate' butipë' ládxë'ë Jesús. **44** Lu yöl-la' risëbi ladxi' queë', idú ládxë'ë Jesús bulidzë' Dios, ate' nisa yösa queë' guca ca rön raba' luyú.

45 Cate' budxi bulidzë' Dios, guyasë', en bőajë' ga na' nacu'ë bönni' usëda queë', ate' duxáquië' légaquië' tásie' tu' tu'huí'inigaquië'. **46** Ní'irö Jesús rë' légaquië':

—¿Rásitsali? ¡Guli'chasa, en buli'lidzë' Dios! Inábili'-në' cabí gata' lataj si' bë' tu' xihui' libí'ilí'.

Ta'zönë' Jesús

(Mt. 26:47-56; Mr. 14:43-50; Jn. 18:2-11)

47 Tsanni ni' ru'ë didza' Jesús, la' bila'dxintë' bönni' zián ni', ate' Judas, bönni' na' nababë' idxínnue' bönni' usëda queë' Jesús dzáguië' légaquië', ate' nanóruë' lógaquië' bönni' zián na'. Gubígi'ë ga zoë' Jesús para utsaga lahuë' Lë'. **48** Ní'irö Jesús rë' lë':

—Judas, ¿naru' rudöditso' caní neda', Bönni' Guljë' Bönachi, rutsaga lo' neda'?

49 Cate' yugu' bönni' na' nacuá'lenë' Jesús bila'lé'enë' ca na' raca queë' Lë', të' Lë':

—Xan, ¿naru' güí'itu' légaquië' guíë tuchi'?

50 Tuë' bönni' usëda queë' Jesús benë' huë' guídi náguië' bönni' huen dxin queë' bixúz lo. Burixë' guídi náguië' ibëla. **51** Jesús rnnë':

—Chinaca na'a. Tsca' gaz.

Gudanë' Jesús guídi náguië' bönni' huen dxin na', en bunë' le. **52** Ní'irö rë' yugu' bixúz unná bë', en bönni' dë lu ná'agaquië' que yudo', en bönni' gula tu'zéajni'inë', bönni' na'biti' ta'lé'enë' Lë' dxi'a, rnnë':

—¿Narúajtsali' nuá'ali' guíë tuchi', en yaga para sönli' neda' ca runli' rizönli'-në' gubán? ⁵³ Yugu' dza guzóalen caza' libí'lli' chila yudo', ate' biti' bi benli' quia', pero na'a chibidxín dza queéli', le naca dza dë lu në'e nu na' zoa lataj chul-la.

Rnnë' Pedro: "Biti' núnbë'a-në' Jesús"

(Mt. 26:37-58, 69-75; Mr. 14:53-54, 66-72; Jn. 18:12-18, 25-37)

⁵⁴ Ní'irö gula'zönë' Jesús, en gula'chë'ë Lë' ga na' bulu'sudxinë' Lë' lidxe' bixúz lo. Pedro yöjnahuë' Jesús zi'tu' zí'tu'sö. ⁵⁵ Cate' ni'a në'e bixúz lo chigula'béquië' guí' lõ'a lidxe' bixúz lo na', gula'bö'ë idú gásibi'ilö ra' guí' na', ate' Pedro gurö'lenë' légaquië' tsözxön. ⁵⁶ Cate' tubi' bi'i nigula huen dxin bilé'ebi'-në' Pedro, ni' rö'ösë' ra' guí', buyubi' lë', en rnnabi':

—Bönni' ni dë'ë ca' Jesús.

⁵⁷ Gudá'baguië' Pedro, rnnë':

—Nigúla, biti' ca' núnbë'a-në' bönni' na'.

⁵⁸ Ia'lati' gudzé ia'túë' bönni' bilé'enë' Pedro, ate' rnnë':

—Li' do'o ca' légaquië'.

Pedro gunné':

—Bönni', calëga neda'.

⁵⁹ Ia'lati'sö gudzé, gunné' ia'túë' bönni':

—Le nácatë bönni' ni dë'ë Jesús, tu' náquië' bönni' Galilea.

⁶⁰ Ní'irö Pedro gunné':

—Bönni', biti' nözda' bizxi na' ru'u didza' que.

Tsanni ni' ru'ë didza' ni, la' gurödxitëba' böra.

⁶¹ Ní'irö buécjë' Xanru', en ruyúë' Pedro, ate' yöjenenë' Pedro xtídzë'ë Xanru', ca na' gudxe' lë: "Zí'alö cödxiba' böra na'a, li' chiguda'bagu'u

tsonna luzuí, innó' biti' núnbe' u neda'." ⁶² Burúajë' Pedro ní'ilö, ate' rön caz gurödxë'.

*Tu'titjë' Jesús
(Mt. 26:67-68; Mr. 14:65)*

⁶³ Yugu' bönni' na' nazöngaquië' Jesús bulu'titjë' Lë', ate' gula'guínë' Lë'. ⁶⁴ Ní'irö bulu'sayjë' lahuë' Jesús, ate' gula'gápe'ë lahuë', en gula'nábinë' Lë', ta'nné':

—¡Gunnëya'atsöca'! ¿Nuzxi na' gudapa' Li'?

⁶⁵ Ziánrö ca' gula'nné' queë' le gulu'ë dö' queë'.

Ridxinë' Jesús lógaquië' bönni' yudo' tu'chi'a tu'söröë'

(Mt. 26:59-66; Mr. 14:55-64; Jn. 18:19-24)

⁶⁶ Cate' chizá' rení' dza na', bulu'dubë' bönni' gula tu'zéajni'inë' bönachi judío len yugu' bixüz unná bë', en bönni' yudo' tu'sédinë', ate' gula'chë'ë Jesús lógaquië' bönni' yudo' tu'chi'a tu'söröë', ate' gula'nábinë' Lë', ⁶⁷ ta'nné':

—Gudíxjöi'i netu'. ¿Naru' nactso' Li' Cristo?

Jesús rë' légaquië':

—Channö guía' libíili' naca' Cristo, biti' tséajlë'ëli' neda', ⁶⁸ en channö inábida' libíili' tu didza', biti' ubíili' didza', en biti' usanli' neda'. ⁶⁹ Na'a isí lo, neda', Bönni' Guljë' Bönachi, cö'a cuita lë'ë ibëla Dios, nápatërë' yöl-la' unná bë'.

⁷⁰ Gula'nábinë' Lë' yúgu'të', ta'nné':

—¿Naru' nactso' Li' Zxi'inë' Dios?

Lë' gudxë' légaquië':

—Le nácasö rninali'.

⁷¹ Ní'irö ta'nné':

—¿Núzxirö naquíniru' nu gun ba nalí queë'? La' rë'usö chibiyöniru' didza' ru'ë.

23

Ridxinë' Jesús lahuë' Pilato, bönni' rinná bë'ë uláz queé' César

(Mt. 27:1-2, 11-14; Mr. 15:1-5; Jn. 18:28-38)

¹ Ní'irö gulazuínë' yúgu'të bönni' zián ni', ate' gula'chë'ë Jesús lahuë' Pilato, ² ga ni' gula'sí lógaquië' tu'zéguië' Lë' didza', ta'nnë':

—Bönni' ni, budzölitu' ca runë'. Runë' ga ta'dá'baga' bönachi uládz queétu' yúlahui', en ruzáguë'ë xinözigaca nupa ta'guízxaj laz ruquízxjë' César, en rnnë' lë cazë' náquië' Cristo, bönni' ral-la' inná bë'ë.

³ Ní'irö Pilato gunábinë' Jesús, rnnë':

—¿Naru' nacu' Li' nu inná be'e bönachi judío?

Bubi'ë didza' Jesús, rnnë':

—Le nácasö rnno'.

⁴ Ní'irö Pilato gudxë' yugu' bixúz unná bë', en bönachi nacuá' ni', rnnë':

—Biti' bi rudzölida' le naca xíguia' nunë' bönni' ni.

⁵ Ní'irö gulunrë' tsutsu xtídza'gaquië', ta'nnë':

—Runë' ga tu'tsatsa bönachi, en rusédinë' caní bönachi idú luyú Judea. Gusí lahuë' benë' caní luyú Galilea ga ridxitnë runë' ca' ni.

Ridxinë' Jesús lahuë' Herodes, bönni' rinná bë'ë luyú Galilea

⁶ Cate' biyönnë' Pilato didza' ni, tu'ë didza' que luyú Galilea, ní'irö gunábinë' légaquië' channö náquië' Jesús bönni' Galilea. ⁷ Cate' gunözinë' nababë' Jesús ga ni' rinná bë'ë Herodes, gusöllë'ë Lë' lahuë' Herodes na', tu' zoë' ca' Herodes Jerusalén yugu' dza na'. ⁸ Cate' Herodes na'

bilé'enë' Jesús, budzéjanë', tu' chiguca xidzé rë'ënë' ilé'enë' Lë' tu' chibiyönnë' le zián ca naca queë' Jesús, en runë' löza ilé'enë' tu yöl-la' huáca gunë'.

⁹ Ní'irö Herodes gunábinë' Jesús le zián, pero Jesús biti' bi didza' bubi'ë. ¹⁰ Nacu'ë ca' ni' yugu' bixúz unná bë', len bönni' yudo' tu'sédinë', ate' bulu'zéguidë'ë Jesús didza'. ¹¹ Ní'irö Herodes, en bönni' queë' rójáquië' gudil-la bulu'cá'anë' Jesús cá'asö, en para ulu'titjë' Lë', bulu'gácuë' Lë' tu lari' nazaca' ca rácuë' tu bönni' unná bë', ate' leyúbölö bulu'sudxinë' Lë' lahuë' Pilato. ¹² Dza na' bulu'dzáguië' dxi'a Pilato, en Herodes, tu' zí'alö gula'lé luzë'ë tuë' ia'túë'.

Ta'chúguië' queë' Jesús gátië'
(Mt. 27:15-26; Mr. 15:6-15; Jn. 18:39-19:16)

¹³ Ní'irö butubë' Pilato yugu' bixúz unná bë', en bönni' dë lu ná'agaquië', en bönachi lu yödzö, ¹⁴ ate' rë' légaquië':

—Dujuá'ali'-në' bönni' ni lahua' neda', rnnali' queë' runë' ga tu'tsatsa bönachi, pero cate' gunabi yúdxida'-në', ate' zóatëli' ca' ni, biti' bi budzólida' le naca xíguia' nabáguë'ë, yugu' lë na' ruzégüili'-në' didza'. ¹⁵ Cate' gusól-la'a libí'ili' lahuë' Herodes, biti' bi budzöline' le benë' bönni' ni le naca xíguia' nabáguë'ë para nu ichugu queë' gátië'. ¹⁶ Na'a usaca' zí'a-në', ate' tödi na' usana'-në'.

¹⁷ Run bayudxi tu le gunë' Pilato, usanë' lu ná'agaca bönachi tuë' bönni' nadzunë' cate' raca laní na', ca na' run cazë'. ¹⁸ Ní'irö gulu'ë zidzaj didza' yúgu'të bönni' nacu'ë ni', ta'nnë':

—Bëtië' bönni' ni, en busanë' queëtu' Barrabás.

19 Nadzunë' Barrabás na' lidxi guíë tu' gudí-lalenë' yúlahui' lu yödzö na', en tu' bëtië' böñachi.
20 Bulidzë' Pilato légaquië' leyúbölö, tu' rë'ënë' usanë' Jesús. **21** Leyúbölö gulu'ë zidzaj didza', ta'nnë':
 —¡Budé'ë lë'e yaga cruz! ¡Budé'ë lë'e yaga cruz!

22 Ní'irö Pilato gudxë' légaquië' le bunni luzuí, rnñë':

—¿Bizzi caz le ruá' dö' benë' bönni' ni? Biti' bi budzölida' nunë' le run ga nabáguë'ë xígua' gátie'. Usaca' zi'a-në', ate' ní'irö usana'-në'.

23 Zídzajrö gulu'ë didza', ta'nabë' të'ë Jesús lë'e yaga cruz. Tu' gula'bödxi'ë yenni' yugu' bönni' na', en yugu' bixúz unná bë', gula'déli'në' gaca ca na' të'ënnë'. **24** Ní'irö Pilato guchúguië' queë' Jesús, para gaca queë' ca na' ta'nabë'. **25** Busanë' quégaquië' bönni' na' nadzunë' lidxi guíë tu' gudí-lalenë' yúlahui', en bëtië' böñachi, bönni' na' chigula'nabë', ate' budödë' Jesús para gaca queë' ca na' të'ënnë'.

Dë'ë Jesús lë'e yaga cruz

(Mt. 27:32-44; Mr. 15:21-32; Jn. 19:17-27)

26 Cate' ni' ta'chë'ë Jesús tsöjdá'gaquië' Lë' lë'e yaga cruz, gula'zönë' Simón, bönni' yödzö Cirene, suzé'ë la' guixi', ate' gula'xóë' yen zxicjë' yaga cruz na' para gu'ë le, en tsejë' cùdzu'lë' Jesús.

27 Böñachi zián, enca' yugu' nigula söjnógaca Jesús, ta'bödxinu nigula na', en ta'bödxi yéchi'nu queë' Lë'. **28** Ní'irö buécjë' Jesús, en ruyúë' légacanu, ate' rë' légacanu:

—Libí'ili' nigula Jerusalén. Biti' cödxili' quia' neda', pero guli'cödxí que quézili', en quégacabi' zxí'inili' **29** tu' huadxín dza ila'nná: "Bica' bágaca

yugu' nigula huödx, en nigula biti' guluá'anu-bi' bí'ido', en biti' bulu'gádxí'nu-bi' bí'ido'." ³⁰ Ní'irö ila'sí lógaca ila'nná bönachi, ilé' yugu' guí'a sibi: "Guli'dubága' netu'", en ilé' ca' yugu' guí'ado': "Guli'cachi' netu'." ³¹ Channö caní tunë' quia' neda', naca' ca tu yaga ya'a, ¿narú' cabí ilúnteré' ca' queéli', nácali' ca yaga bidxi?

³² Gula'ché'ë ca' chopë' bönni' tuá' dö', para ilútië' légaquië' tsözxön len Jesús. ³³ Cate' bila'dxinë' lataj nazí'i le Calavera, le rnna len didza' xidza' Lataj Que Böga' Ícjaru', bulu'dé'ë Jesús lë'e yaga cruz. Bulu'dé'ë ca' lë'egaca yaga cruz chopë' bönni' tuá' dö'. Tuë'bulu'dé'ë cuita lë'ë ibëla Jesús, en ia'tué' bulu'dé'ë cuita lë'ë yögöla. ³⁴ Ní'irö Jesús rnné':

—Xuz, buniti lo légaquië', tu' cabí nözguequinë' bi tunë'.

Bönni' röjáquië' gudil-la nacu'ë ni' bulu'lé'ë que queégaquië' le nácuë' Jesús, en bulu'quitjë' le gaca bë' lahui. ³⁵ Bönachi nacuá' ni' tu'yú, en yugu' bönni' dë lu ná'agaquië' bulu'titjë' Jesús, ta'nné':

—Yugu' nu yúbölö busölë' bönni' ni. Na'a ralla' usölá cuinë' channö náquië' Cristo, bönni' gurö cazë' Dios.

³⁶ Yugu' bönni' na' röjáquië' gudil-la bulu'titjë' ca' Jesús. Gula'biguë'ë ga na' zoë', en bulu'gui'jë' Lë' nupi zi, ³⁷ ta'nné':

—Channö nacu' Li' bönni' inná bé'enë' bönachi judío, busölá cuinu'.

³⁸ Da' ca' lë'e yaga cruz icjlë' Jesús tu le nazúaj lu guichi lu didza' griego, en lu didza' latín, en lu didza' hebreo, le rnna caní: "Bönni' Rinná Bé'enë'

Bönachi Judío.” ³⁹ Tuë’ bönni’ huiá’ dö’ na’ dë’ë lë’ e
yaga cruz bulidza zi’ë Jesús, rnnë’:

—Channö nacu’ Li’ Cristo, busölá cuinu’, enca’
netu’.

⁴⁰ Bubi’ë didza’ ia’túë’ bönni’ huiá’ dö’ na’, en
gudil-lë’ luzë’ë na’, rnnë’:

—¿Naru’ cabí rádxinu’-në’ Dios? Lësca’ li’ narugu
quiu’ gátiu’. ⁴¹ Le nácatë rë’u, le rál-la’sö gaca
queéru’ rigui’i rizáca’ru’, ca na’ sa’yéaj dö’ biá’aru’,
pero Bönni’ ni, biti’ bi dö’ nu’ë.

⁴² Ní’irö bönni’ ni rë’ Jesús:

—Yöjnë neda’ cate’ idxinu’ ga ni’ inná bë’u.

⁴³ Jesús rë’ lë’:

—Le nácatë rea’ li’, na’a dza ni sóalenu’ neda’ lataj
lachi quia’.

Ratië’ Jesús

(Mt. 27:45-56; Mr. 15:33-41; Jn. 19:28-30)

⁴⁴ Cate’ bidxín idú huagubidza, guchul-la idútë
yödzölió ga bidxinrö idú ridödi xihuö. ⁴⁵ Guchul-
la gubidza, ate’ lari’ nal-la’ lu yudo’ biröza’ chopá
dí’ilö. ⁴⁶ Ní’irö bë’ë zidzaj didza’ Jesús, rnnë’:

—Xuz, rigu’ a lu no’o bö’ naca caza’.

Cate’ budxi gunnë’ caní, birúajtë bö’ naca cazë’,
gútië’.

⁴⁷ Cate’ bönni’ rinná bé’enë’ bönni’ röjáquië’
gudil-la bilé’enë’ ca na’ guca, gulu’ë Dios yöl-la’ ba,
rnnë’:

—Le nácatë bönni’ ni gúquië’ bönni’ tsahui’.

⁴⁸ Cate’ yúgu’të bönni’ nacu’ë ni’ tu’yúë’
bila’lé’enë’ lë’ na’ guca, yöjhuöjgaquië’ yödzö,
ta’gapa’ luchú’ugaquië’ tu’ tu’báninë’. ⁴⁹ Zí’tu’sö
bulu’gá’ana yúgu’të nupa ni’ núnbe’gaca Jesús, en

yugu' nigula na' yöjácalennu Lë' cate' ni' gudë' luyú Galilea, ate' tu'yúë' lë ni raca.

Rigáchë'ë Jesús yeru ba

(Mt. 27:57-61; Mr. 15:42-47; Jn. 19:38-42)

⁵⁰ Zoë' ca' ni' tu bönni' yödzö Arimatea que luyú Judea, lë' José. Bönni' ni náquië' dxi'a, en tsahui', en nabábalenë' yugu' bönni' yudo' tu'chi'a tu'söröë'.

⁵¹ Biti' benë' tuz nupa na' gula'chugu queë' Jesús gátië', tu' ribözë' ca' José ni le rinná bë'ë Dios.

⁵² Ní'irö guyijë' José na' lahuë' Pilato, en gunabë' lataj u'ë Jesús. ⁵³ Cate' chinuzötjë' Lë', buchölinë' Lë'lari', ate' gulu'ë Jesús yeru ba, le nadaj lë'e guí'a guiøj, ate' lu ba na', cuntu nu nagüí'iguequinë'.

⁵⁴ Dza na' naca dza tu'pë'ë que dza lá'ayi quégaquië' bönni' judío, tu' si' idxín dza na'.

⁵⁵ Yöjácanu ca' ni' nigula na' gula'zá'lennu Jesús, cate' ni' gudë' luyú Galilea, ate' bila'lé'enu yeru ba na', en ca na guca, gula'gu'ë Lë' ni'. ⁵⁶ Cate' yöjhuöjgacanu yu'u, bulu'pá'anu nöri rilá' zxixi, en yugu' le za rilá' zxixi. Ní'irö bulu'zí' ladxí'gacanu dza lá'ayi na' quégaquië' bönni' judío ca na' rinná bë' xibá queë' Dios.

24

Rubanë' Jesús lu yöl-la' guti

(Mt. 28:1-10; Mr. 16:1-8; Jn. 20:1-10)

¹ Cate' bidxín dza risí lo ia'gadxi dza na', cate' ni' naca zílado', bila'dxinnu nigula na' ra' yeru ba queë' Jesús. Nuá'gacanu yugu' le rilá' zxixi, lë na' chinupá'agacanu, ate' dzágagacanu légacanu ia'bál-lanu nigula. ² Cate' bila'dxinnu ni', bila'lé'enu chinadúa guiój na' gudá' ga nu riyaza yeru ba queë'.

³ Cate' gula'yázanu y eru ba na', biti' bulu'dzölinu zoa Xanru' Jesús ni'. ⁴ Cate' ni' ta'bó'önü böninga ni'a que lë ni, chopë' bönni' nácugaquië' lari' répi yösa bení' la' bila'dxintë' ni', en gula'zuínë' ga na' nacuá'anu. ⁵ Ní'irö guládxinu, en bulu'zötaj ícjagacanu, tu'yunu lu yu, ate' chopë' gubáz lá'ayi na' të' légacanu, ta'nné':

—¿Bizz que ruguíajli' nu zoa nabán xilataj nu nati? ⁶ Biti' zoë' ni, tu' chibubanë'. Guli'tsöjnë lë na' chigudxi cazë' libí'ili' cate' ni' zoë' luyú Galilea. ⁷ Gunné': "Run bayudxi nu udödi neda', Bönni' Guljë' Bönachi, lu ná'agaquië' bönni' dul-la', ate' ulu'dé'ë neda'lë'e yaga cruz, ate' ubana' cate' gacatsonna dza."

⁸ Ní'irö yöjnégacanu didza' na' bë'ë Jesús, ⁹ ate' bulu'zá'anu ra' y eru ba na', yöjtíxjöi'iguequinu idxinéajtë' bönni' gubáz queë' Cristo, en ia'zíca'rë' ca', ca naca lë na' guca. ¹⁰ Nigula na' yöjtíxjöi'iguequinu bönni' gubáz na' yugu' lë ni, nácagacanu María Magdalena, en Juana, en María, xiné'ë Jacobo, en ia'bál-lanu nigula na' dzágagacanu légacanu. ¹¹ Gulequinë' bönni' gubáz na' tuí'inu didza' chixi, en biti' gula'yéajlë'ë légacanu.

¹² Ní'irö guyasë' Pedro, en carelö sa'yéajë' ra' y eru ba na'. Cate' buyúë' lu ba na', bilé'enë' yugu' lári'sö nacuá' ni', ate' ní'irö bőajë' lidxë', rubáninë' ca naca lë na' guca.

*Le guca la' nöza ridxintë Emaús
(Mr. 16:12-13)*

¹³ La' dza ná'asö söjáquië' chopë', yú'ugaquië' nöza le ridxintë Emaús, le rö'ö ca chopa hora rizá'aru' Jerusalén. ¹⁴ Yú'ugacasë' ca' nöza, tu'ë

didza' ca naca yúgu'të lë na' guca. ¹⁵ Tsanni ni' yú'ugaquië' nöza, tu'ë didza' la' légacasë', gubígui'ë gala' Lë cazë' Jesús, ate' gudálenë' légaquië' tsözxön. ¹⁶ Biti' bulu'únbë'ë Lë' tu' naca ca tu le nabaga' guiöj lógaquië'. ¹⁷ Ní'irö Jesús gunábinë' légaquië', rnne'ë:

—¿Bizxi didza' na' ruí'ili' la' libí'isili' yú'uli' nöza?
¿Bizx que na' ruhuí'inili'?

¹⁸ *Bubi'ë didza' bönni' na' lë' Cleofas, rë' Lë':*
—¿Nácatso' bönni' zi'tu' lu yödzö Jerusalén, en
tuzu' li' biti' nözinu' lë na' guca néaje nasi ni'?

¹⁹ *Ní'irö Jesús rë' légaquië':*
—¿Bizxi na' guca?

Të' Lë':
—Lë na' guca queë' Jesús, bönni' Nazaret. Gúquië' bönni' bë'ë didza' uláz queë' Dios, ate' len yöl-la' huáca zxön benë' dxin, en bë'ë didza' lahuë' Dios, en lógaca yúgu'të böñachi. ²⁰ Yugu' bixúz unná bë', len bönni' ta'nná bé'enë' netu' bulu'dödë' Lë', en gulunë' ga nu guchugu queë' gátië', ate' bulu'dé'ë Lë' lë'e yaga cruz. ²¹ Netu' bentu' löza gúquië' Lë' bönni' na' ral-la' huöá'uë' böñachi Israel, pero na'a chiguca tsonna dza cate' gulaca lë ni. ²² Ia'stú, bál-lanu nigula nútsa'gacanu netu' gulunnu ga gurö'ötü' böñiga. Yöjácanu ra' yero ba queë' cate' si' gulén gubidza na'a dza, ²³ en cate' biti' bulu'dzölinu Lë', buduhuöjgacanu, en gulënu netu' bila'lé'enu yugu' gubáz lá'ayi queë' Dios, nupa ni' gulë légacanu zoë' nabanë' Jesús. ²⁴ Ní'irö bal-lë' bönni' luzá'atu' yöjáquië' ra' yero ba na', en bila'lé'enë' naca ca na' gula'nnanu nigula na', pero biti' bila'lé'enë' Jesús.

²⁵ *Ní'irö Jesús gudxë' légaquië':*

—Libi’ili’, bönni’ biti’ réajni’ininë’. Nazidi icja ládxi’do’oli’ para cabí tséajlé’ëli’ yúgu’të le gula’nnë’ bönni’ gulu’ë didza’ uláz queë’ Dios. ²⁶ ¿Naru’ cabí ben bayudxi qui’i sáquë’ë Cristo yugu’ lë ni, en tsázië’ ga ni’ tsépisétérë’?

²⁷ Ní’irö gusí lahuë’ Jesús riguíxjöi’inë’ légaquië’ yúgu’të le ruí’i didza’ ca naca queë’ le nazúajgaca lu guichi lá’ayi, ca na’ gusí lo bë’ë didza’ Moisés ga bidxitné yugu’ le gula’nnë’ yúgu’të bönni’ gulu’ë didza’ uláz queë’ Dios.

²⁸ Cate’ bila’dxinë’ yödzödo’ ga na’ söjáquië’, benë’ Jesús ca tu bönni’ zéajtérë’ zi’tu’. ²⁹ Gulunë’ bayudxi ugá’analenë’ légaquië’, ta’nnë’:

—Bugá’analen netu’, tu’ chiridzö’ na’a, en chizóa gal-la.

Ní’irö guyázië’ Jesús yu’u, en bugá’analenë’ légaquië’. ³⁰ Cate’ ni’ Jesús rö’ë rágulenë’ légaquië’, gudélë’ë yöta xtila, en gudxe’ Dios: “Xclenu.” Ní’irö buzzuzxjë’ le, en bë’ë quégaquië’. ³¹ La’ ní’isö bidúa lë na’ gubaga’ guiój lógaquië’, ate’ bulu’únbë’ë Jesús, ate’ Lë’ buniti cuinë’ lógaquië’. ³² Ní’irö gulë luzë’ë tuë’ ia’tué’:

—¿Naru’ cabí böála’tica’ ládxi’do’oru’ tsanni ni’ ruí’ilenë’ rë’u didza’ la’ nöza, en cate’ ni’ ruchila lá’anië’ le nazúaj lu guichi lá’ayi?

³³ La’ ní’isö gula’zuínë’ yöjhuójgaquië’ Jerusalén, ate’ yöjxáca’gaquië’ nudúbigaquië’ idixinéajté’ bönni’ gubáz queë’ Jesús, en nupa nacuá’len légaquië’. ³⁴ Ní’irö yugu’ bönni’ na’ nacu’ë ni’ gulë’ chopë’ na’:

—Chibubán cazë’ Xanru’, en bulu’i lahuë’, ate’ bile’enë’ Simón Lë’.

35 Ní'irö chopë' na' gula'guíxjö'ë ca na' guca quégaquië' la' nöza, en ca na' bulu'únbë'ë Jesús cate' ni' buzxuzzxjë' yöta xtila na'.

*Bönni' usëda queë' Jesús tu'lé'enë' Lë'
(Mt. 28:16-20; Mr. 16:14-18; Jn. 20:19-23)*

36 Tsanni ni' tu'ë didza' ca nácagaca lë ni, la' yöjsóatë' Jesús gatsaj láhui'lö ga na' nacu'ë, ate' rë' légaquië':

—Guli'soa dxí ládxí'li'.

37 Ní'irö guladxi gula'dzöbinë' tu' téquinë' bixín ta'lé'enë'. **38** Jesús rë' légaquië':

—¿Bizx que rö'öli' böniga? ¿Bizx que rizá' ládxí'li' yugu' lë ni? **39** Buli'yútsöca' na'a, en ni'a. Neda' caz ni. Guli'cán neda', en buli'yú neda', tu' cabí da' bixín bëla', en biti' yu'u dxita ca ni rilé'eli' naca quia' neda'.

40 Ni' ruí'isë' ca' didza' ni, buluí'inë' légaquië' në'ë, en ni'ë. **41** Tu' tu'dzéjaguequinë' biti' gula'yéajlë'ë, en gula'bö'ë baniga. Que lë ni na' Jesús gudxë' légaquië':

—¿Dë queéli' ni le gahua'?

42 Ní'irö bulu'nödzjë' queë' láti'do'oba' böla chinégui'ba', en tu quízxi'ba' buz. **43** Guzxi'ë Jesús le, en gudahuë' lógaquië'. **44** Ní'irö rë' légaquië':

—Yúgu' lë na' gulaca quia' gulaca ca na' gudxi caza' libí'ili' cate' ni' zóalena' libí'ili', gunnía': Run bayudxi gaca yúgu'të le nazúaj lu guichi lu xibá queë' Moisés, en le gula'nnë' bönni' gulu'ë didza' uláz queë' Dios, en le nazúaj lu guichi nazí'i le Yugu'Salmo, ca ral-la' gaca quia' neda'.

45 Ní'irö buzáejni'inë' légaquië' lë na' nazúajgaca lu guichi lá'ayi. **46** Rë' légaquië':

—Caní nazúaj lu guichi ca run bayudxi gaca queë' Cristo, qui'i sáquë'ë, en ubanë' lu yöl-la' guti cate' gaca tsonna dza, ⁴⁷ ate' idútë yödzölió ralla' gaca libán ca naca quia' neda' para ulu'bíi ládxi'gaca bönachi para uniti lahuë' Dios dul-la' nabága'gaquië'. Lu yödzö Jerusalén isí lo gaca libán na' ⁴⁸ ate' libí'i cázali' na' bilé'eli' yugu' lë ni ral-la' gunli' ba nalí que. ⁴⁹ Buli'yútsöca', isöl-la'a queëli' le guzxí' lu në'ë Xuza' gunnë' queëli', pero buli'gá'anasö Jerusalén cate' idxinrö queëli' yöl-la' huáca na' za' yehua' yubá.

Ruhuëpë' Jesús yehua' yubá
(Mr. 16:19-20)

⁵⁰ Ní'irö Jesús guché'ë yugu' bönni' dá'gaquië' Lë', söjáquië' yödzö Betania, ate' ni' guchisa në'ë, en bulidza tsáhuë'ë légaquië'. ⁵¹ Tsanni ni' rulidza tsáhui'së' ca' légaquië', buzá'atë' ga na' nacu'ë, buëpë' yehua' yubá. ⁵² Gudödi gula'yéaj ládxi'gaquië' Lë', lu yöl-la' rudzeja quégaquië' yöjhüojgaquië' Jerusalén. ⁵³ Gula'cuá'tica'së' chila yudo', ta'gu'ë Dios yöl-la' ba, en tun zxönë' Lë'. ¡Ca' naca!

**Didza' cubi rucá'ana tsahui'
New Testament in Zapotec, Rincón (MX:zar:Zapotec,
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

cxxxii

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

58bf86df-ae22-508c-81dc-936dbf138c25